

ሌዊ ዓሶ ማጅ ዛሎ ኬኤዛ ማፃአፖ ዓይያ ካር

ሌዊ ዓሶ ዛሎ ኬኤዛ ማፃአፖ ኬኤዛሁ፡- ሚናኦ ዎዶና ዒሰራዔኤሌ ዓሳ ካኣሽካ ካኣዠ ዎጎና ካኣሽኮ ደምቦ ዛላኬ፤ ዬያጉዲ ሃሣ ዬፍ ካኣዠ ዎጎ ማጅ ኩንሢሳኒ ቢታንታ ዓኣ፡ ቄኤሶ ማዔዘንሢ ዛሎዎ ኬኤዛኔ።

ማፃአፔሎኮ ጴኤፖ ማሊፃ፡- ያኦሲ ዲማጴያ ማዔሢ ኬኤዛያኬ፤ ዬያጉዲ ሃሣ ዴራ ዬያ ዲማጴያ ማዔ፡ ዒሰራዔኤሌ ያኦዛሢና ዎላ ዑኬ ማዔ ዒጊንቶና ዎዲ ዒዛ ካኣሽካኒ ኮይሳቴያ ፓይዲ ፓይዲ ኬኤዛኔ።

ሃና ማፃአፖይዳ ሚርጌና ዔርቴ ዓይሢፃ ዬሱሴ «ሃና ላምዓሳ ጴኤፖ ዓይሢያኬ» ጌዔዘኬ፤ ዬይ ዓይሢፃ ሃኖ ማፃአፖኮ (ዓይሢ 19:18ይዳ) ጴዳኔ። ዒዘይዳ «ዓሲ ቢያ ዓዳ ኔና ማሂናሽኬ» ጋዓኔ።

ማፃአፔላ ዲማ ዲማ ዓርቄ ባኮ

ያኦሲም ዒንጎ ባኮኮ ዎጌ ዛላ (1:1—7:38)

ዓኣሮኔና ናኣቶናኮ ቄኤሴ ማዓንዳጉዲ ዶኦሪንቲያ (8:1 — 10:20)

ጌኤሽ ማዔያና ማዒባኣ ባኮ ዛላ ኬኤዚንቲ ዎጌ (11:1 — 15:33)

ዓሶኮ ጎሞ ጌኤሽ ኬሎ ዛላ (16:1-34)

ያኦሲም ዲማዲ ናንጎ ናንጊና ካኣሽኮ ዎጌ ዛላ (17:1—27:34)

ያኦሲም ሚቺ ዒንጊ ካኣሽኮ ካኣዠ

1 ዓፒሎና ማዠንቲ፤ ያኦሲ ዴሮና ካኣማ ማኣሮይዳፓ ናንጊና ናንጋ ጎዳ ሙሴ ዔኤላያ ሂዚ ጌይ ዓይሢኔ፡-

2 ዒሰራዔኤሌ ዴራ ታኣም ዒንጋ ባኮ ዒንጋ ዎዶና ዔያታ ካፓኒ ኮይሳ ዎጋ ያዲኬ፡-

ፔቴ ፔቴ ዓሳ ዒንጎ ባኮ ታኣም ዒንጋ ዎዶና ፔኤኮ ባኣቶፓ፡ ማራቶፓ፡ ዎኣሮፓ ማዔቴያ ዒንጎንጎ፤

3 ዬይ ዓሢ ባኣቶ ባኣካፓ ፔቴ ሚቺ ዒንጎ ዒንጊሢ ዒንጋኒ ኮዔቴ ዔኤቢ ቦሂሳ ባኣዚባኣ፡ ዚያ ጌማይ ዶኦሪ ዔኪ ሙኮንጎ፤ ዬይያ፡ ናንጊና ናንጋ ጎዳ ናሽኪ ዔካ፤ ሚቺ ዒንጎ ዒንጊሢ ማዓንዳጉዲ ዓፒሎና ማዠንቲ፤ ያኦሲ ዴሮና ካኣማ ማኣሮኮ ጌሎ ካሮ ዛሎና ዔኪ ሙኪ ዔቂሶንጎ።

4 ይካገ ይይ ዓሢ ሚቺ ዒንጋኒ ዔኪ ሙኬ ባኮኮ ቶኦካ ፔ ኩጮ ጌሦንጎ፤ ይይ ዒዛኮ ጎሞ ጌኤሻኒ ዳንዳዓ ሚቺ ዒንጎ ዒንጊሢ ዒዛሞ ማዓንዳኔ።

5 ይይ ዓሢ ጌሚ ዒኢካ ሹኮንጎ፤ ይካገ ዓኣሮኔ ፃጰገ ማዔ፥ ቄኤሳ ሱጉፆ ናንጊና ናንጋ ጎዳ ቤርቶ ዔኪ ሙካፆ ዓፒሎና ማዢንቴ፥ ፆኦሲ ዴሮና ካኣማ ማኣሮ ጌሎ ካራ ዓኣ፥ ሚቺ ዒንጎ ባኮኮ ጎኦሶ ዛሎ ቢያ ፑጮንጎ።

6 ይካገ ይይ ዓሢ ዒልፆ ሹኪ ዴማሲ፥ ዓሽኮሞ ሜኤሎና ሜኤሎና ቲቆንጎ፤

7 ቄኤሳሢ፥ ዓኣሮኔ ፃጰ ማዔ ቄኤሳ ሚቺ ዒንጎ ቤዘይዳ ሃንፂሎ ጊኢጊሺ ታሚ ዔኤሦንጎ።

8 ይያይዳሰካገ ቲቄንቴ ዓሽኮኮ ሜኤሎንታ ቶኦኮንታ፥ ሃሣ ማሎሞ ዔኤታ ታሞ ዑፃ ጌሦንጎ።

9 ይይ ዓሢ ጎጰ ባኮና ጊንፆ ቶኮና ዔኪ ሞኣሢና ማሰካዛ ይኖ ዓቦ ማዳ ቄኤሳሢ ፆኦሲም ዒንጎ ቤዘይዳ ጉቤና ሚቸንጎ፤ ይያይዲ ሚቺ ዒንጎ ባኮኮ ጎሞ ናንጊና ናንጋ ጎዳ ሞዛሳያ ማዓኔ።

10 ሚቺ ዒንጎ ባካ ማራይ፥ ሃሣ ሞኣሪ ማዔቴ፡- ዔኤቢ ቦሂሳ ባኣዚባኣ፥ ዓዴ ማራናይ ሃንጎ ኮላይናይ ማፆንጎ።

11 ይያ ዒንጎ ባኮ ዒንጎ ቤዘኮ ኬዶ ዛላ ፆኦሲ ቤርታ ሹኮንጎ፤ ይካገ ቄኤሳ ሱጉፆ ዔኪ ሚቺ ዒንጎ ቤዘኮ ጎኦሶ ዛሎ ቢያ ፑጮንጎ።

12 ይይ ዒንጎ ዓሢ ሹኪንቴ ባኮ ሜኤሎና ሜኤሎና ቲቄሢኮ ጊንፆ ይኖ ዓቦ ማዳ ቄኤሳሢ ሜኤሎ ዓሽኮንታ ቶኦኮንታ ማሎንታ ቢያ ፆኦሲም ዒንጎ ቤዘይዳ ጊኢጊሺንቴ ዔኤታ ታሞ ዑፃይዳ ጌሦንጎ፤

13 ይካገ ዓሢ ጎጰ ባኮንታ ጊንፆ ቶኮንታ ሞኣሢና ማሰካዛ፥ ቄኤሳሢ ይያ ዒንጎ ባኮ ቢያ ፆኦሲም ሚቺ ዒንጎ ባኣዚ ማሂ ሺኢሺ ሚቺ ዒንጎ ቤዘይዳ ሚቸንጎ፤ ይያይዲ ታሚና ሚቺ ዒንጎ ባኮኮ ጎሞ ናንጊና ናንጋ ጎዳ ሞዛሳያ ማዓኔ።

14 ዒንጎ ዓሢ ሚቺ ዒንጎ ባኮ ካፖ ዜርፃገ ዒንጋኒ ኮዔቴ ዶኦሌ ናይ ማዒባኣቴ ኪሬ ናይ ዔኪ ሺኢሻኒ ዳንዳዓ።

15 ቄኤሳሢ ይያ ካፖ ዔኪ ሚቺ ዒንጎ ቤዘ ሺኢሹሰካገ ባቃኖ ዲዲ ዴኡዚ፥ ሚቺ ዒንጎ ቤዛ ዔኤታ ታሞይዳ ዓጊ ሚቸንጎ፤ ሱጉፆኣ ሚቺ ዒንጎ ቤዘኮ ጎኦሶ ዛላ ፆደንጎ።

16 ጎጰ ባኮና ጋፓኖና ዴማሲ፥ ፆኦሲም ዒንጎ ባኮ ዒንጎ ቤዘኮ ዓባ ኬሰካ ዛሎና ቢዲንፆ ላኣሎ ቤዘይዳ ኬኤሮንጎ።

17 ይካገ ጋኣዘንሢ ዓርቄ፥ ሄኮ ሹኦሎንጎ፤ ጋዓንቴ ሹኦሊ ዴማሲ ኬኬሶፓ። ቄኤሳሢ ሚቺ ዒንጎ ቤዘይዳ ዓኣ፥ ታማኣ ዓጊ ቢያ

ሚሾንጎ፤ ይያይዱ ሚቺ ዒንጎ ባኮኮ ሳውማ ናንጊና ናንጋ ጎዳ ዋዛሳያ ማዓኔ።

2

ጾኑሲም ዒንጎ ሃኣኮ

1 ዓይጎ ዓሲታቴያ ናንጊና ናንጋ ጎዳም ሃኣኮ ዒንጋ ዎድና ሺኢቺ ዎድና ዲኢሊ ማዓኒ ኮይሳኔ፤ ይያይዳ ሪሚቶ ዛይቶና ጨቤሾ ዑንጀዋ ዋሆንጎ፤

2 ዩካፓ ዓኣሮኔ ዜርዖ ማዓ። ቁኤሶ ኮይላ ዔኪ ሙኮንጎ፤ ዩኖ ኬሎና ማዳ ቁኤሳሢ ይያ ዲኢሎና ዛይቶናይዳፓ ሾኦፓ ኩሙሢ። ሃሣ ዑንጀ ቢያ ዔኪጋፓ ዩይ ቢያ ናንጊና ናንጋ ጎዳም ዒንጊንቴያ ማዓሢ ዔርዛኒ ሚቺ ዒንጎ ቤዛ ዑፃ ዓኣ። ታሞይዳ ሚሾንጎ፤ ይያይዱ ዒንጎ ሙዖኮ ሳዋ ናንጊና ናንጋ ጎዳ ዋዛሳያ ማዓኔ።

3 ዩካፓ ዓቴ ሃኣኮኮ ዲኢላ ዓኣሮኔ ፃጰ ማዓ። ቁኤሶም ዒንጊንቶንጎ፤ ዩይ፡ ናንጊና ናንጋ ጎዳም ዒንጊንቴሢዳፓ ፓቂ ዔኪንቴያ ማዓሢሮ ጾኑሲም ዲማዴያኬ።

4 ዩይ ዒንጊንታሢ ቦኦቆይዳ ጉኡፒ ላኣዲንቴያ ማዓቴ ሙኦቃ ፃኣዛ ጌሊባኣ። ሪሚቶ ዛይቶና ዲርኪንቴ፡ ሺኢቺ ዲኢሊና ላኣዲንቴ ቫኣዣ ላኣዳ ማዖንጎ።

5 ዒንጊንታ ባካ ቦኦቆይዳ ላኣዲንቴ ላኣዳ ማዓቴ ሙኦቃ ፃኣዛ ጌሊባኣ። ሪሚቶ ዛይቶና ዲርኪንቴ ሺኢቺ ዲኢሊና ላኣዲንቴያ ማዖንጎ፤

6 ዩያ ቡንዲጋፓ ጌዳ ሪሚቶ ዛይቶ ዋሃ። ጾኑሲም ዒንጊንታ ሃኣኮ ማሂ ዒንጌ።

7 ዩና ዒንጊንታ ባካ ታሚ ቦኦቆይዳ ላኣዲንቴ ላኣዳ ማዓቴ ሪሚቶ ዛይቶና ዲርኪንቴ። ሺኢጮ ዲኢሎ ላኣዳና ማዖንጎ።

8 ዩኖ ሃኣኮ ናንጊና ናንጋ ጎዳም ዒንጎ ዒንጊሢ ማሃ። ቁኤሳሢም ዒንጌ፤ ቁኤሳሢያ ጾኑሲም ዒንጎ ቤዛ ሺኢሺ ዒንጎንጎ።

9 ቁኤሳሢ ዩያ ዒንጊንቴ ባኮይዳፓ ዛሎ ዔኪ። ቢያሢ ናንጊና ናንጋ ጎዳም ዒንጊንቴያ ማዓፃ ዔርዛኒ ጾኑሲም ዒንጎ ባኮ ዒንጎ ቤዛይዳ ዓኣ። ታማኣ ሚሾንጎ። ይያይዱ ታሚና ሚቺንቴ ዒንጊንታ ዒንጊኮኮ ሳዋ ናንጊና ናንጋ ጎዳ ዋዛሳያ ማዓኔ።

10 ዓቴ ሃኣኮ ዲኢላ ጋዓንቴ ቁኤሶም ዒንጊንቶንጎ፤ ዩይ፡- ናንጊና ናንጋ ጎዳም ዒንጊንቴሢዳፓ ፓቂ ዔኪንቴያ ማዓሢሮ ሚርጌና ጾኑሲም ዲማዴያኬ።

11 ሚቹ ዲንጎ ዲንገህ ማዒ፥ ናንጊና ናንጎ ጎዳም ዲንገንታ ባኮና ዎላ ሙኑቃ ፃኣዛታቲያ ዔኤሲ ታማ ሚቹንታኒ ኮይሱዎኣህረ ኔኤኒ ያኦሲም ዲንጎ ሃኣካ ቢያ ፔቲታዎ ሙኑቃ ፃኣዛ ጌሊባኣያ ማዎንጎ፤

12 ሌዓ ሌዓ ካፄ ሃኣኮኮ ቤርቲ ማሂ ዲንህሂ ዲንጎ ባኮ ናንጊና ናንጎ ጎዳም ዔኪ ሙኩዎቲ፤ ዬይ ጋዓንቲ ያኦሲም ዲንጎ ባኮ ዲንጎ ቤዛ ሳውማ ናንጊና ናንጎ ጎዳ ዎዛሳንዳጉዲ ጌይ ሚቹንታ፡፡

13 ያኦሲም ዲንጎ ሃኣኮይዳ ቢያ ሶኦጌ ዓኣያ ማዎንጎ፤ ኔ ያኣዛህ ኔኤና ዎላ ጫኣቄ ጫኣቄም ሶኦጌ ባኣያ ጉሪ ዔኪ ሺኢሺፖ፤ ኔ ዲንጎ ሃኣኮ ዲንገይ ቢያ ሶኦጌና ጊኢጊሺ ዔኪ ሺኢሺ፡፡

14 ሌዎ ሃኣኮኮ ቤርቶ ኔ ዲንጎ ዎዶና ሚቹ ቶርሾና ሃንጎ ሸርኮና ቲሾ ማዎንጎ፡፡

15 ዬያይዳ ሪሚቶ ዛይቶንታ ዑንጅንታ ዎሃ፤ ዬይ ያኦሲም ዲንገንቲ ሃኣኮ ዲንገህ ማዓንዳኔ፡፡

16 ቄኤሳህ፥ ዬያኮ ዛሎ ዔኪ ናንጊና ናንጎ ጎዳም ዲንገንቲያ ማዒያ ዔርዛኒ ዛይቶንታ ዑንጅንታ ቢያ ሃኣኮና ዎላ ሚቸንጎ፡፡

3

ፔቱሞና ያኦሲም ዲንጎ ዲንገህ

1 ዓይጎ ዓሲያ ፔኤኮ ባኣቶይዳፓ ፔቱሞና ያኦሲም ዲንገንታ ዲንገይ ዲንጎ ዎዶና ዔኤቢ ቦሂሳ ባኣዚባኣ፥ ፔቲ ጌማይታቲያ ዲንዴ ባይ ዶኦሪ ዔኪ ሙኩንጎ፡፡

2 ዬይ ዲንጎ ዓህ ያኦሲም ዲንጎ ባኣዚ ማሂ ዲንጎ ባኮኮ ቶኦኮይዳ ፔ ኩጮ ጌህ ዓፒሎና ማዢንቲ፥ ያኦሲ ዴርና ካኣማ ማኣርኮ ካርይዳ ሹኮንጎ፤ ዬካፓ ዓኣርኔ ዜርዎ ማዒ፥ ቄኤሳ ሱጉዎ ዔኪ ሚቹ ዲንጎ ቤዛኮ ጎኦሶ ዛሎ ቢያ ፑጮንጎ፡፡

3 ዬያ ዓሸኮኮ ሃካፓ ሊካ ፓይዲንታ ቤዛንህ ሙኡዚ ዲንገህ ማሂ ናንጊና ናንጎ ጎዳም ዲንገንቶንጎ፤ ዬንህያ፡- ጎጶ ባኮ ካንቄ ሃኣቦንታ ዲኢካ ዓኣ ማሎ ጉቤ፡፡

4 ጳሊህና ዲኢካ ዓኣ ማሎ፤ ዬያጉዲ ሃህ ማዮኮ ሻኣዣዳ ቤዘዎ ዔኪ ሸኢኮንጎ፡፡

5 ዬካፓ ቄኤሳ ዬያ ቢያ ሚቹ ዲንጎ ባኮና ዎላ ማሂ ሚቹ ዲንጎ ቤዛይዳ ሚቸንጎ፤ ዬያ ዲንጎ ባኮኮ ሳዎ ናንጊና ናንጎ ጎዳ ዎዛሳያ ማዒ፡፡

6 ፔቱሞና ያኦሲም ዲንጎ ዲንገህ ማዒ ዲንገንታ ባካ ማራይ ሃህ ዎኣሪ ማዒ፡- ቦሂሳ ባኣዚባኣ ዓዴ ማራይ፥ ኮላይ፤ ጊንህ ሃህ ዲንዴ ማራይታቲያ ዎኣሪ ዲማዲ ማዎንጎ፡፡

7 ፔቴ ዓሲ ያኦሲም ዒንጎ ባአዚ ማሂ ዒንጋ ባካ ማራናይ ማዔቴያ ናንጊና ናንጋ ጎዳ ቤርቶ ዔኪ ሙኮንጎ።

8 ዩካፓ ኩጮ ማራናዎኮ ቶኦካ ጌሢ ዓፒሎና ማዢንቴ፥ ያኦሲ ዴሮና ካአማ ማአሮኮ ጌሎ ካራ፥ ቤርቶ ዛላ ሹኮንጎ፤ ቄኤሳ ዩያኮ ሱጉያ ዔኪ፥ ሚቺ ዒንጎ ቤዘኮ ጎኦሶ ዛሎ ቢያ ፑጮንጎ።

9 ዩያይዴሰካፓ ዓሸኮኮ ሃካፓ ሊካ ፓይዲንታ ቤዘንሢ ሙኡዚ ዒንጊሢ ማሂ ናንጊና ናንጋ ጎዳም ዒንጎንጎ፤ ዩንሢያ፡- ማሎንታ ጉይኖ ማጌያ ሄሊሲ ቲቂንቴ ዑንኮ ማላኦ፥ ጎጾ ባኮኮ ዑፃ ዓአ ሃአሶንታ ዒኦካ ዓአ ማሎ ቢያ።

10 ጳላሢንታ ዒኦካ ዓአ ማሎ፤ ዩያጉዲ ሃሣ ማዎኮ ሻአዣዳ ቤዘ ዔኪ ሸኢሾንጎ።

11 ዩካፓ ቄኤሳሢ ዩያ ቢያ ናንጊና ናንጋ ጎዳም ሙኡዚ ዒንጊሢ ማሂ ዒንጊ፥ ሚቺ ዒንጎ ቤዘ ሚቸንጎ።

12 ፔቴ ዓሲ ያኦሲም ዒንጎ ባአዚ ማሂ ዒንጋሢ ዋአሪ ማዔቴያ ናንጊና ናንጋ ጎዳ ቤርቶ ዔኪ ሙኮንጎ።

13 ዩካፓ ዒዚ ፔኤኮ ኩጮ ዋአራሢ ቶኦካ ጌሢጋፓ ዓፒሎና ማዢንቴ፥ ያኦሲ ዴሮና ካአማ ማአሮኮ ቤርቶ ዛላ ሹኮንጎ፤ ቄኤሳ ዩያ ሱጉያ ዔኪ ሚቺ ዒንጎ ቤዘኮ ጎኦሶ ዛሎ ቢያ ፑጮንጎ።

14 ዩያ ዓሸኮኮ ሃካፓ ሊካ ፓይዲንታ ቤዘንሢ ሙኡዚ ዒንጊሢ ማሂ ያኦሲም ዔኪ ሸኢሾንጎ፤ ዩንሢያ፡- ጎጾ ባኮ ካንቄ ሃአሶንታ ዒኦካ ዓአ ማሎ ጉቤ።

15 ጳላሢንታ ዔያቶ ካንቄ ዓአ ማሎ ቢያ፤ ዩያጉዲ ሃሣ ማዎኮ ሻአዣዳ ቤዘዋ ዔኪ ሸኢሾንጎ።

16 ዩካፓ ቄኤሳሢ ዩያኮ ሳዋ ናንጊና ናንጋ ጎዳሢ ዋዛሳ ዒንጊሢ ማዓንዳጉዲ ሚቺ ዒንጎ ቤዘ ሚቸንጎ፤ ማሊ ቢያ ናንጊና ናንጋ ጎዳም ዲማዴያ ማዎንጎ።

17 ዒሰራዔኤሌ ዜርሢ ማዔ ዓሳ ጉቤ ማሊ ማዔ ዓሸኪ፤ ሃሣ ሱጉሢያ ሙዎፓ፤ ዩይ ዒሰራዔኤሌ ዓሳ ናንጋ ቤዘና ናንጋ ዎዶይዳአ ቢያ ናንጊና ካፒ ናንጋ ዎጌ ማዎም።

4

ዔሪባአዎ ማዲንቴ ጎሜ ዛላ ዒንጊንታ ዒንጊሢ

- 1 ናንጊና ናንጋ ጎዳ ሙሴም ሂዚ ጌይ ኬኤዜኔ፡-
- 2 «ዒሰራዔኤሌ ዓሶም ሂዚ ጌዔ፤ ዓይጎ ዓሲያ ዔሪባአዎ ጎሜ ማዴቴ፥ ሃሣ ጊንሣ ናንጊና ናንጋ ጎዳ ዓይሢ ዓይሢያይዳፓአ ፔቴ ዳቤያ ማዔቴ ሃካፓ ሊካ ፓይዲንታ ዳምሶ ኩንሦንጎ፤

3 «ቁኤሶ ቢያኮ ሱኡጌ ማዒ ደኦሪንቴህ ጎሜ ማዲ ዓሶዎ ደቢሼያ ማዒቴ ዔኤቢ ቦሂሳ ባኣዚባኣ፡ ፔቴ ዚያ ጌማይ ናንጊና ናንጋ ጎዳ ቤርቶ ዔኪ ሙኮንጎ፤ ዩካፓ ፔ ጎሞ ዛሎ ያኦሲም ዒንጎ ባኣዚ ማሂ ሹኪ ዒንጎንጎ።

4 ዓፒሎና ማዢንቴ፡ ያኦሲ ዴሮና ካኣማ ማኣሮኮ ካሮ ጌሜ ዔኪ ሙኪ ኩጮ ጌሜ ቶኣካ ጌሂጋፓ ናንጊና ናንጋ ጎዳ ቤርታ ሹኮንጎ፤

5 ዩካፓ ቁኤሶ ቢያኮ ሱኡጋሂ ሱጉፃፓ ዳካ ዔኪ ዓፒሎና ማዢንቴ፡ ያኦሲ ዴሮና ካኣማ ማኣሮ ጌሊ፡

6 ፔ ኬኤሎና ሱጉፃፓ ዔኪ ዔኪ ጌኤዢ ማኣሮኮ ጋራ ጎኦቢንቴ ዓኣ ዓፒሎኮ ቤርቶ ዛሎና ናንጊና ናንጋ ጎዳ ቤርታ ላንካይ ማይንቴ ዉፀርቆንጎ።

7 ዩካፓ ሃሃ ዳካ ሱጉሂ ዔኪ ዓፒሎና ማዢንቴ፡ ያኦሲ ዴሮና ካኣማ ማኣሮኮ ጋራ ዑንጃ ጨቢሶ ቤዞኮ ያይዶ ዛሎይዳ ዓኣ ዳንኮንሂ ተሽኮንጎ፤ ዓቴ ሱጉፃ ማኣሮኮ ጌሎ ካራ ዓኣ፡ ሚቺ ዒንጎ ባኮ ዒንጎ ቤዞ ዴማ ዋሆንጎ።

8 ዩያ ጌሜኮ ማሎ ቢያ ዔኮንጎ፤ ዩይያ፡- ጎጾ ባኮ ካንቁ ዓኣ ሃኣቦንታ ዒኣካ ዓኣ ማሎ ቢያ፡

9 ጳላሂና ዒኣካ ዓኣ ማሎ፤ ዩያጉዲ ሃሃ ማዮኮ ሻኣዢዳ ቤዞዎ ዔኪ ሺኢሹንጎ።

10 ቁኤሶኮ ሱኡጋሂ ዩያ ማሎ ቢያ ዔኪ ሚቺ ዒንጎ ባኮ ዒንጎ ቤዞይዳ ሚቸንጎ፤ ማሎ ኬሲያ ጎይፃ ፔቴሞና ዒንጎ ባኮኮ ማዲንቴ ጎይፃ ማዮንጎ።

11 ጋዓንቴ ዒልዓ፡ ዓሽካ፡ ቶኦኮንታ ቶኮንታ፡ ሩቁንታኣ፡ ጎጾ ባካ፡ ሶኦኮዎ ቢያ፡

12 ጉርዳፓ ዙላ ኬሲ ቢዲንፃ ላኣሎ፡ ካኣዢ ዳሞቦና ጌኤሺ ማዒ ቤዞ ዔኪ ዓኣዲ ኩሊንቴ ዲቢንፃ ዑፃ ታሚ ዔኤሂ ሚቸንጎ።

13 «ጉቤ ዒሰራዔኤሌ ዴራ ዔሩዋዎ ዳቢንቴ ጎሜ ማዴቴ፤ ሃሃ ናንጊና ናንጋ ጎዳ ዓይሂ ዓይሂፃፓ ፔቴ ፓጨሴቴ፡ ዩያ ዴሮም ዳቢንታ ዔርቲባኣያ ማዒቴያ ዔያታ ዳቢንቴያኬ።

14 ዴራ ዩያ ዳቢንቶ ዔሬ ዎዶና ኔጉዋዎ ጎሜ ዛላ ዒንጊንታ ዒንጊሂ ማዒ፡ ፔቴ ዚያ ጌማይ ዔኪ ሙኪ ዓፒሎና ማዢንቴ፡ ያኦሲ ዴሮና ካኣማ ማኣሮኮ ቤርቶ ዛላ ዔቂሶንጎ።

15 ዩካፓ ዴሮኮ ዶንዛ ፔኤኮ ኩጮ ጌሜ ቶኣካ ጌሃም ናንጊና ናንጋ ጎዳ ቤርቶይዳ ዩይ ባኣሂ ሹኪንቶንጎ።

16 ቁኤሶ ቢያኮ ሱኡጋሂ ጌሜ ሱጉፃፓ ዳካ ዔኪ ዓፒሎና ማዢንቴ፡ ያኦሲ ዴሮና ካኣማ ማኣሮ ጌሎንጎ።

17 ዓፒሎና ማዢንቴ፣ ፆኦሲ ዳርና ካአማ ማአርኮ ጋራ ጎኑባና ዓፒሎኮ ቤርቶ ዛላ ዔቂ ፔ ኬኤሎና ሱጉፃፓ ዔኪ ዔኪ ላንካይ ማይንቴ ናንጊና ናንጋ ጎዳ ቤርታ ዉፀርቆንጎ።

18 ሃሣ ዳካ ሱጉሣ ዔኪ ዓፒሎና ማዢንቴ፣ ፆኦሲ ዳርና ካአማ ማአርይዳ ዑንጅ ጩቢሶሣኮ ፆይዶ ዛሎይዳ ዓአ ዳንኮንሣ ናንጊና ናንጋ ጎዳ ቤርታ ቲሽኮንጎ፤ ዩካፓ ዓቴ ሱጉፃ ዓፒሎና ማዢንቴ፣ ፆኦሲ ዳርና ካአማ ማአርኮ ቤርቶ ዛላ ዓአ ሚቺ ዒንጎ ባኮ ዒንጎ ቤዘ ዳማ ዋሆንጎ።

19 ዩካፓ ዩያ ጌሜኮ ማሎ ቢያ ዔኪ ሚቺ ዒንጎ ቤዘይዳ ሚቸንጎ።

20 ጎሞ ዛሎ ቤርታ ዒንጊንቴ ጌሜይዳ ማዲንቴ ጎይፆማ ዩያ ጌሜያ ዒማይዶንጎ፤ ዩያይዲ ቁኤሳሣ ዳርኮ ጎሞ ዛሎ ዒንጌም ዳርኮ ጎማ ጌኤሽካንዳኔ።

21 ዩካፓ ጌሜ ጉርደኮ ዙሎ ኬሲ፣ ቤርታአ ጌሜ ሚቺ ጎይፆማ ዩያአ ሚቸንጎ፤ ዩይ ዳርኮ ጎሞ ጌኤሻያ ማዓንዳኔ።

22 «ዳሬኮ ዓርና ማዒ ዔኪ ዓአዳ ፔቴ ዓሲ ዔሩዋፆ ዳቢንቴ ጎሜ ማዳቴ፣ ናንጊና ናንጋ ጎዳ ዓይሣ ባኮይዳፓአ ፔቴ ባአዚ ፓጩሲ ጴዳቴ ዒዚ ዳቤያ ማዓኔ።

23 ዒዚ ዳቢንቶ ፔኤሲ ዔሬቴ ኔጉዋፆ ዔኤቢ ቦሃሳ ባአዚባአ፣ ኮላይ ፔኤኮ ጎሞ ጌኤሻንዳ ዒንጎ ዒንጊሣ ማሃ ዔኪ ሙኮንጎ።

24 ዩካፓ ፔኤኮ ኩጮ ኮሌኮ ቶኦካ ጌሣ፣ ሚቺ ዒንጎ ቤዘኮ ኬዶ ዛላ ሚቺ ዒንጎ ቆልማ ሹኪንታ ቤዘ ናንጊና ናንጋ ጎዳ ቤርታ ሹኮንጎ፤ ዩይ ጎሞ ጌኤሻ ዒንጊሣ ማዓንዳኔ።

25 ቁኤሳሣ ኮሌኮ ሱጉፆይዳፓ ኬኤላና ዳካ ዔኪ ሚቺ ዒንጎ ቤዘኮ ፆይዶ ዛሎይዳ ዓአ፣ ዳንኮ ቲሽኮንጎ፤ ዩካፓ ዓቴ ሱጉፃ ሚቺ ዒንጎ ቤዘኮ ዳማ ዋሆንጎ።

26 ፔቱሞና ዒንጊንታ ዒንጊፆ ሚቺ ጎይፆ ማሎ ጉቤ ሚቺ ዒንጎ ቤዘ ሚቸንጎ፤ ቁኤሳሣ ዩያይዲ፣ ዩያ ዓሣኮ ጎሞ ዛሎ ዒንጎንጎ፤ ዓሣኮዋ ጎማ ጌኤሽካንዳኔ።

27 «ዳር ባአካፓ ፔቴ ዓሲ ዔሩዋፆ ዳቢንቴ ጎሜ ማዳቴ፤ ሃሣ ናንጊና ናንጋ ጎዳኮዋ ዓይሣይዳፓ ፔቴ ፓጩሴያ ማዔቴ ዩይ ዓሣ ዳቢንቴያኬ፤

28 ዒዚ ዳቢንቴያ ማዔሣ ዔዔራፆ ዔኤቢ ቦሃሳ ባአዚባአ፣ ዒንዴ ዋአሪ ጎሞ ዛሎ ዒንጎ ባአዚ ማሃ ዔኪ ሽኢሽንጎ።

29 ዩካፓ ፔኤኮ ኩጮ ዒ ዔኪ ሙኬ ዋአሬሎ ቶኦካ ጌሣ፣ ሚቺ ዒንጎ ቤዘኮ ኬዶ ዛላ ሚቺ ዒንጎ ቆልማ ሹኪንታ ቤዘ ሹኮንጎ።

30 ይያይደደሰካገ ቁኔሳህን ዋኔራሎኮ ሱጉግገገ ደካ ከኤላና ዔኪ ሚቸ ዒንጎ ቤዘኮ ያይደ ዛላ ዓኣ፣ ደንኮ ቲሽኮንጎ፤ ዩካገ ዓቴ ሱጉግ ሚቸ ዒንጎ ቤዘኮ ደማ ዋሆንጎ።

31 ፔቱሞና ዒንጎ ቆልሞይዳገ ዔኪንቴ ጎይያ ዋኔራሎ ማሎዋ ዒማይዲ ኬሶንጎ፤ ሳዋ ናንጊና ናንጋ ጎዳ ዋዛሳንዳጉዲ ቁኔሳህን ሚቸ ዒንጎ ቤዘ ሚቸንጎ፤ ይያይዲ ይያ ዓህኮ ጎሞ ዛሎ ዒንጎንገታ ዒንጎገያ ዒንጎንጎ፤ ይያ ዓህኮዋ ጎማ ዓቶም ጌይንታንዳኔ።

32 «ፔቱ ዓሲ ጎሞ ዛሎ ማራናይ ዒንጎያ ማዔቴ ቦሂሳ ባኣዚባኣ፣ ዒንጎይ ማራይ ሸኢሸንጎ።

33 ይይ ዓህ ይኖ ማራዔሎኮ ቶኦካ ኩጮ ጌህ፣ ሚቸ ዒንጎ ቤዘኮ ኬደ ዛላ ሚቸ ዒንጎ ቆልሞ ሹኮ ቤዘ ሹኮንጎ።

34 ቁኔሳህን ማራያ ሱጉግገገ ከኤላና ደካ ዔኪ ሚቸ ዒንጎ ቤዘኮ ያይደ ዛላ ዓኣ ደንኮ ቲሽኮንጎ፤ ዩካገ ዓቴ ሱጉግ ቢያ ሚቸ ዒንጎ ቤዘኮ ደማ ዋሆንጎ።

35 ዓሳ ፔቱሞና ዒንጎ ማራያኮ ማሎ ከሴ ጎይያ ማሎ ቢያ ከሶንጎ፤ ዩካገ ቁኔሳህን ሚቸ ዒንጎ ቤዘይዳ ናንጊና ናንጋ ጎዳ ዋዛሳያ ማዓንዳጉዲ ሚቸንጎ፤ ይያይዲ ዓህኮ ጎሞ ዛሎ ዒንጎ ባኮ ዒንጎንጎ፤ ይያ ዓህኮ ጎማ ጌኤሽካንዳኔ።»

5

ዔሩዋያ ማደንቴ ደቢንቴ ዛላ ዒንጎንገታ ዒንጎገያ ዓይጎር ማዔቴያ

1 ናንጊና ናንጋ ጎዳ ሃሃ ከኤዛዎ፡- «ፔቱ ዓሲ ዎጌ ዎጊንታ ቤሲዳ ማርካቶ ማርካደንዳጉዲ ዔኤሊፃ ሄሌንቴ ዒ ዛጌ ባኮና ዔራ ባኮ ዛሎ ማርካዲያ ዒዲ ሃሹቴ ደቢንቴያ ማዒ ያኦጪንታንዳኔ።

2 «ፔቱ ዓሲ ዔሩዋያ ዓይጎ ባኣዚያ ማዎም ዳሞቦ ጎይያና ቁፃ ማዔ ባኣዚ ጌይፃ፡- ካይዚ ቦያታቴያ ዓሲ ቆሌ ቆሎኮ ሃሃ ሳዓና ጎቹንቴ ሃንታ ቦያኮ ሃይቄ ሌሲ ካኣሜቴ ዬይ ዓህ ዒኢቴ፣ ደቤያ ማዓኔ።

3 «ፔቱ ዓሲ ዔሩዋያ ዓሲ ዑሰካገ ሾኦታ ዓይጎ ባኣዚያ ማዎም ዒኢሳ ባኣዚ ሄሌቴ፣ ዒዚ ደቤያ ማዓኔ።

4 «ፔቱ ዓሲ ፑርቱሞም ማዔቴያ ኮሹሞም፣ ዓይጎ ባኣዚርዋ ማዎም ማሊ ዔኩሞና ናኣቢ ናኣቤቴ ዒ ማዴ ማዴ ደቢንቴ ዒዛም ማዓኔ።

5 «ፔቱ ዓሲ ዬንሂዳገ ፔቱማ ማዴ ደቢንቴቴ ዎማ ማዴ ደቤቴያ ከኤዚ ቡኤፃንዳያ ኮይሳኔ።

6 ዲ ዲቤ ዲቢንቶ ዛሎሮ ዳንዲ ዲንዴ ማራይታቲያ ዋኦሪ ናንገና ናንጋ ጎዳም ዲንጎ ባኣዚ ማሂ ዔኪ ሙኮንጎ፤ ዩካፓ ቄኤሳሂ ዩያ ዓሂኮ ጎሞ ዛሎ ሚቹ ዲንጎ ዲንገሂ ማሂ ሹኪ ዲንጎንጎ።

7 «ፔቲ ዓሲ ማራይ ማዔቲያ ዋኦሪ ዲንጋኒ ዳንዳዒባኣቲ ለምዖ ደኦሌ ሃንጎ ለምዖ ኪሬ፤ ፔቲማ ጎሞ ዛሎ ዲንገንታያ ማሂ፣ ለምዓሳማ ሚቹ ዲንጎ ዲንገሂ ማሂ ናንገና ናንጋ ጎዳም ሹኢሹንጎ።

8 ዓዚ ዩንሂ ዔኪ ሙኪ ቄኤሳሂም ዲንጎንጎ፤ ዩካፓ ቄኤሳሂ ለምዖ ካፖንሂ ፔቲማኮ ቶኦኮ ቲቁዎዖ ዲዲ ሜንሂ ዲቢንቲኮ ዲንጎ ዲንገሂ ማሂ ሹኢሹንጎ።

9 ዩያ ሱፑያይዳፓ ዳካ ዔኪ ሚቹ ዲንጎ ቤዘኮ ጎኦቦ ዛላ ፑጮንጎ፤ ዓቲ ሱፑያ ሚቹ ዲንጎ ቤዘኮ ዴማ ዋሆንጎ፤ ዩይ ጎሞ ዛሎ ዲንገንታ ዲንገሂ ማዓንዳኔ።

10 ቄኤሳሂ፣ ሃንጎ ካፖማ ዎጋ ዓይሂ ጎይያ ሚቹ ዲንጎ ዲንገሂ ማሂ ሹኢሹንጎ፤ ዩያይዲ ዓሂኮ ጎሞ ዛሎ ዲንገንታ ዲንገያ ዲንጎንጎ፤ ዳቤ ዓሂኮዎ ጎማ ጌኤሽካንዳኔ።

11 «ዩይ ዓሂ ለምዖ ደኦሎንሂና ለምዖ ኪሮንሂ ዔኪ ዲንጋኒ ዳንዳዒባኣያታቲ ፔቲ ኪሎ ማዓንዳ ሹኢቹ ዲኢሊ ዲ ማዳ ጎሞ ዛሎ ዲንገንታያ ማሂ ዔኪ ሙኮንጎ፤ ዩይ ጎሜ ዛላ ዲንገንቲያ ማዔሂሮ ዛይቲታቲያ ዑንጃ ገዳ ዋሆፓ።

12 ዩካፓ ዔኪ ሙኪ ቄኤሳሂም ዲንጎንጎ፤ ቄኤሳሂ ዲኢሎይዳፓ ሹኦፓና ዔኪ ቢያሂ ናንገና ናንጋ ጎዳም ዲንገንቲያ ማዓዖ ዔርዘኒ ሙኡዚ ዲንገሂ ማዒ ዲንገንታ ዲንገያና ዎላ ሚቹ ዲንጎ ቤዘይዳ ናንገና ናንጋ ጎዳም ታሚና ሚቹንጎ፤ ዩይ ጎሞ ዛሎ ዲንገንቲ ዲንገሂ ማዓንዳኔ።

13 ዓሂ ዩንሂዳፓ ፔቲማ ዳቢ ጎሜ ማዳቲ ቄኤሳሂ ዩያይዲ ጎሞ ዛሎ ዲንገንታ ዲንገያ ዲንገም፣ ጎማ ዓሂኮ ዓቶም ጌይንታንዳኔ፤ ዓቲ ዲኢላ ሃኦኮ ዲንገያ ማዲንታ ጎይያ ቄኤሳሂሮ ማዖንጎ።»

ዳቢንቶ ዛሎ ጨጋኒ ዲንገንታ ዲንገሂ

14 ናንገና ናንጋ ጎዳ ሙሴም ሃካፓ ለካ ዓኣ ዳምቦ ኬኤዜኔ፡-

15 «ዓይጎ ዓሲያ ማዖም ናንገና ናንጋ ጎዳም ዳማዳ ዲንገሂ ዲንጎንድንቲ ዔሩዎዖ ሃሺ ጎሜ ማዳቲ ዳቤ ዳቢንቶ ዛሎ ጨገንታ ጋሌ ማሂ፣ ቆልሞ ባኣካፓ ዓዴ ማራይ ናንገና ናንጋ ጎዳም ሹኢሹንጎ፤ ሃንጎ ዩማ ቆልሞማ ቄኤሳ ሃዲ ኬሳንዳኔ ጌዔ ጎይያና ሚኢሹ ዓዚ ጨጎንጎ፤ ዩይ ዳቢንቶኮ ዲንገንቲያ ማዓንዳኔ።

16 ጾኦሱም ዳማዳ ባኮኮ ዓዚ ዲንጋንዳዖ ፓጨሴ ቤዘ ኩንሦንጎ፤ ጌይዖ፡- ዎንዴ ዲንገንታንዳሂዳ ደንጎ ኩቸፓ ፔቲ ማዓያ

ቃሲ ዔኪ ሙኪ ቄኤሳሢሞ ዒንጎንጎ፤ ቄኤሳሢ ዬያ ባኮ ማራዒሢና ሞላ ጳቢንቶ ዛሎ ዒንገንታ ዒንገሢ ማሂ ሺኢሾንጎ፤ ዒሢኮሞ ጎማ ጌኤሽካንዳኔ።

17 «ፔቴ ዓሲ ዔሩሞናንገናናንጋ ጎዳ ዓይሤ ዓይሢያይዳፓ ፔቴ ፓጪሴቴ ዬይ ዒሢ ጳቢንቲያ ማዒ ምጠንታንዳኔ።

18 ዒዚ ፔኤኮ ቆልሞ ባኣካፓ ቦሂሳ ባኣዚባኣ ዓዴ ማራይ ጳቢንቶ ዛሎ ጪጎ ዒንገሢ ማሂ ቄኤሳሢሞ ዔኪ ሙኮንጎ፤ ዬይ ሻንቺንቲ ኬሳንዳ ሚኢሻ ላዲ ኬሳንዳኔ። ጌይንቲ ጎይያ ሚኢሾ ማያም፤ ዬይ ዒሢ ዔሩሞኣያ ጳቢ ጳቢንቶ ዛሎ ቄኤሳሢ፤ ዬያ ዒንገንቲ ባኮ ናንገናናንጋ ጎዳ ቤርቶ ሺኢሾንጎ፤ ዬያ ዒሢኮሞ ጎማ ጌኤሽካንዳኔ።

19 ዒሢ ናንገናናንጋ ጎዳም ሞይዞ ዒዲ ጳቢ ጳቢንቶ ጌኤሻ ዒንገሢ ዬይ ማዓንዳኔ» ጌዔኔ።

6

1 ናንገናናንጋ ጎዳ ሃሃ ሙሴም ሃካፓ ሊካ ዓኣ ዳምቦ ኬኤዜኔ፡-

2 «ዓይጎ ዓሲያ ማያም ዓሲ ኮርካፓ ታልዔ ባኣዚ፤ ሃሃ ገንሃሃ ዒዛ ኮራ ጌሦና ባኣዚ ታ ዔሩሞሴ» ጌይ ማሂ ዒንጎ ዒዲ፡ ጎሜ ማዲ ናንገናናንጋ ጎዳም ጉሙርቲሞያ ማዔቴ፡ ሃሃ ዓሲ ባኣዚ ጌሺ ቡሪ ዔኬቴ፡

3 ዬያጉዲ ሃሃ ባይቄ ባኣዚ ዴንቄ ዔካያ ታ ዴንቄባኣሴ። ጌይ ለኡዙሞና ጫኣቄ፤ ዓሲ ማዳ ዬያጉዴ ጎሞፓ ፔቴ ማዲ ጳቢንቲቴ፡

4 ዓይጎ ዓሲታቴያ ዬያይይቴ ዒዚ ዉኡቄ ባኮ፡ ጌሺ ቡሪ ዔኬ ባኮ፡ ማዒባኣ ካራና ዓሲሮ ዔኬ ባኮ፡ ዒዛ ኮራ ጌሦና ባኮ ዒ ዔኬሢ፡ ዓሲኮ ባይቄያታንቲ ዒ ዴንቄ ዔኬ ባኮ፡

5 ለኡዙሞና ዒ ጫኣቄ ዔኬ ባኮ ቢያ ማሆንጎ፤ ሃሃ ዒ ጳቢንቶ ዛሎ ናንገናናንጋ ጎዳም ዒንጋ ሞዶና ዒ ዔኬ ባኮኮ ዶንጎይዳፓ ፔቴ ኩቺ ማዓያ ቃሲ ዔቦ ዓዶም ማሂ ጪጎንጎ።

6 ዒ ጳቢ ጳቢንቶኮ ጋሎ ጪጎ ማዓንዳጉዲ ቆልማፓ ዔኤቢ ቦሂሳ ባኣዚባኣ፡ ዓዴ ማራይ ዒንጎ ባኣዚ ማሂ ናንገናናንጋ ጎዳም ዔኪ ሙኮንጎ፤ ዬያ ዔኪ ሙኪ ቄኤሳሢሞ ዒንጎንጎ፤ ዬይ ሻንቺንቲ ኬሳንዳ ሚኢሻ ላዲ ኬሳንዳኔ። ጌይንታ ጎይያ ሚኢሾ ማያም።

7 ቄኤሳሢ ዬያ ዒሢኮ ጎሞ ዛሎ ዒንጎ ባኣዚ ማሂ ናንገናናንጋ ጎዳ ቤርቶ ሺኢሾንጎ፤ ዒዛ ጳቢንቲያ ማሂ ጎማኣ ጌኤሽካንዳኔ» ጌዔኔ።

ጉቤ ሚቺ ዒንጎ ዒንገሢ ዛላ

6:7 ፓይ. ማፃ 5:5-8::

8 ናንገና ናንጋ ጎዳ ሃሣ ሂዚ ጌይ ሙሴ ዓይሄኔ፡-

9 «ዓኣሮኔና ዒዛኮ ናኣቶናም ሚቺ ዒንጎ ዒንገይ ደምቦ ዛሎ ኔ ኬኤዛንዳሢ ያዲኬ፤ ሚቺ ዒንጎ ባካ ዋንቶ ጉቤ ሚቺ ዒንጎ ቤዘይዳ ማዔም ታማ ዔኤቴ ጎይሣ ዎርቆንጎ፤

10 ቄኤሳሢ ሚዛጶ ሱኡፖና ኮሺንቴ ቃሚሾንታ ቆንዎ ማይንቴ ቱኡቴሰካፓ ሚቺ ዒንጎ ቤዘይዳ ሚቺንቴ ቢዲንዎ ዓኣሢ ዔኪ ሚቺ ዒንጎ ቤዘኮ ኮይላ ላኣሎንጎ፤

11 ዩካፓ ዓፒሎ ኬሴ፡ ሜሌ ማኣዎ ማይንቴጋፓ ዩያ ዲቢንዎ ዔኪ ጉርዶኮ ዙላ ዓኣ ካኣዙ ደምቦና ጌኤሺ ማዔ ቤዛ ላኣሎንጎ፡፡

12 ሚቺ ዒንጎ ቤዛ ዓኣ ታማ ቢያ ዎይ ሃይቁዎ ዔኤቴ ዴዎንጎ፤ ቄኤሳሢ ጉቴ ጉቴ ሃንፂሎ ታማ ዓጎንጎ፤ ዩያ ታምይዳ ሚቺ ዒንጎ ባኮ ገኢጊሺ ጌሢ፡ ፔቱሞና ዒንጎ ባኮ ማሎ ዒኢካ ሚቸንጎ፡፡

13 ዩይ ታማ ቢያ ዎይ ሃይቁዎ ሚቺ ዒንጎ ቤዘይዳ ዔኤቶንጎ፡፡»

ሃኣኮ ዒንገሢ ዛላ

14 «ሃኣኮ ዒንገሢ ዛላ ኬሴንቴ ደምቦ ጎይፃ ያዲኬ፡- ዓኣሮኔ ፃጲፓ ማዔ ቄኤሳ ሃኣኮ ዒንገይ ሚቺ ዒንጎ ቤዘኮ ቤርቶ ዛላ ዔኪ ሙኪ ናንገና ናንጋ ጎዳ ቤርታ ሺኢሾንጎ፡፡

15 ዩካፓ ቄኤሳሢ ዛይቶና ዲርኪንቴ ዲኢላፓ ፔቴ ሾኣፓ ዔኪ፤ ሃሣ ዩያ ሃኣኮ ዒንገይይዳ ዓኣ ዑንጃ ጉቤ ዔኪ ያኦሲም ዒንገንቴያ ማዔያ ዔርዛኒ ሚቺ ዒንጎ ቤዘይዳ ሚቸንጎ፤ ዩያኮ ሳዎ ናንገና ናንጋ ጎዳ ዎዛሳ ዒንገሢ ማዓንዳኔ፡፡

16-17 ዓቴ ባኮ ቄኤሳሢ ሙዎንጎ፤ ዩያ ሙኑቃ ፃኣዛ ገዳ ጌልዚባኣዎ ላኣዳ ላኣዲ ዓፒሎና ማዢንቴ፡ ታኣም ዲማጴ ማኣሮኮ ቤርቶ ዛላ ቃምዎ ጋራ ሙዎንጎ፤ ዓይጎር ጌዔቴ ዩያ ሙዎ ዒንገይ ሚቺ ዒንጎ ዒንገይና ዎላ ቄኤሶር ማዓንዳጉዲ ታኣኒ፡ ናንገና ናንጋ ጎዳ ዓይሄኔ፤ ዩይ ጎሞ ዛሎ ዒንጎ ባኮንታ ዲቢንቶ ዛሎ ጨጎ ባኮጉዲ ሚርጌና ታኣም ዲማጴያኬ፡፡

18 ሙካ ዎደ ቢያይዳ ዓኣሮኔ ዜርፃፓ ሾይንቴ ዓቴንቁ ቢያ ታኣም ዒንገንታ ባኮይዳፓ ዓቴሢ ዒዛርታሢር ሙዓኒ ደንዳዓኔ፤ ዓይጎዎ ማዎም ዩያ ባኮ ካኣማ ባኣዚ ቢያ ያኦሲም ዲማጴያ ማዓንዳኔ፡፡»

19 ናንገና ናንጋ ጎዳ ሃሣ ሂዚ ጌይ ሙሴ ዓይሄኔ፡-

20 «ቄኤሳ ደኦሪንታ ኬሎና ቢያ ዎይ ሃኣኮ ዒንገይ ዒንገንታሢና ዎላ ሃኮ ማዔ ፔቴ ኪሎ ገራኣሜ ማዓ ሺኢቺ ዲኢሊ ዔኪ ሙኮንጎ፤ ዩያኮ ዛላ ጉቴ፡ ዛላ ዒባኒ ታኣም ዒንጎያ ማዔ ሺኢኮንጎ፡፡

21 ገኢጊሺ ዛይቴና ዲርኪ ቦኦቆይዳ ላኣዲንቶንጎ፤ ዩካፓ ዩያ ሃኣኮ ዒንገይ ቡንፂ ሳዎ ታና ዎዛሳያ ማዓንዳጉዲ ሃኣኮ ዒንገሢ ማሂ ዒንገንቶንጎ፡፡

22 ሙካ ዎዶ ቢያይዳ ቁኤሴ ማዔ ማዳ፣ ዓኣሮኔ ዜርፃ ቢያ ዬያ ዳምቦ ኩኅሦንጎ፤ ዬይ ታኣም ዒንገንታ ሚቺ ዒንጎ ዒንገሢ ማዔ ጉቤ ሚቺንቶንጎ።

23 ቁኤሳሢ ዒንጎ ሃኣኮ ዒንገይይዳፓ ሙይንታይ ባኣያ ማዔ ቢያ ሚቺንታንዳያ ኮይሳኔ።»

ጎሜ ዛላ ናንገና ናንጋ ጎዳም ዒንጎ ዒንገሢ

24 ናንገና ናንጋ ጎዳ ሃዚ ጌይ ሙሴ ዓይሢ፡-

25 «ጎሞ ዛሎ ሚቺ ዒንጎ ዒንገይ ዛሎኮ ዓኣሮኔ ናኣቶም ኔ ኬኤዛንዳ ዳምባ ያዲኬ፤ ሚቺ ዒንጎ ቆልማ ሹከንታ፣ ያኣሲም ዒንጎ ባኮ ዒንጎ ቤዘኮ ኬዶ ዛላ ጎሞ ዛሎ ዒንገንታ ቆልማ ናንገና ናንጋ ጎዳ ቤርታ ሹከንቶንጎ፤ ዬይ ሚርጌና ታኣም ዲማዴያ ማዓንዳኔ።

26 ቆልሞ ሸኢሺ ዒንጎ ቁኤሳሢ ዬያ ዓሸኮ ዓፒሎና ማዢንቴ፣ ያኣሲ ዴርና ካኣማ ማኣሮኮ ቃምፃ ጋራ ታኣም ዲማዴ ቤዘይዳ ሙዎንጎ።

27 ዓሲታቴያ ዓይጎ ባኣዚያ ማዎም ዬያ ዓሸኮ ካኣሜቴ ዬይ ታኣም ዲማዴያ ማዓንዳኔ፤ ሃሃ ዓይጎ ዓፒላኣ ማዎም ዬይ ሱጉፃ ካኣሜቴ ታኣም ዲማዴ ቤዘይዳ ማሰኪንቶንጎ።

28 ዓሸካ ካሢንቴሢ ዓይጎ ያቲዳታቴያ ዬኖ ያቶ ዎዳንዳያ ኮይሳኔ፤ ጋዓንቴ ዓሸካ ካሢንቴሢ ዓንገ ያቲዳ ማዔቴ ኮሺ ዶርቺ ዎኣሢና ማሰኪንቶንጎ።

29 ቁኤሶ ማኣሮይዳፓ ማዔ፣ ዓቲንቄ ቢያ ዬያ ሙዓኒ ዳንዳዓኔ፤ ዬይ ሚርጌና ታኣም ዲማዴ ዒንገሢኬ።

30 ጋዓንቴ ሱጉፃ ጎሞ ጌኤሺያ ዳምቦሮ ዓፒሎና ማዢንቴ፣ ታኣም ዲማዴ ማኣሮ ዔኪ ጌሊንቴያ ማዔቴ ዬይ ዓሸካ ሙይንቴዎፃ ቢያ ታሚና ሚቺንቶንጎ።»

7

ዳቢንቲ ዛላ ጨጋ ማሂ ዒንጎ ዒንገሢ

1 ናንገና ናንጋ ጎዳ ሃሃ ኬኤዛዎ፡- «ሚርጌና ታኣም ዲማዴያ ማዔሢሮ ዳቢንቶ ዛሎ ጨጋ ማሂ ዒንጎ ዒንገይ ጎይፃ ያዲ ማዎንጎ፡-

2 ዳቢንቶ ዛሎ ዒንገንታ ቆልማ ያኣሲም ዒንጎ ባኮ ዒንጎ ቤዘኮ ኬዶ ዛላ ዓኣ ቤዘይዳ ሹከንቶንጎ፤ ሱጉፃ ሚቺ ዒንጎ ቤዘኮ ያይዶ ዛሎ ጎኦቦይዳ ፑጨንቶንጎ።

3 ዬያኮ ማላ ቢያ ሹከንቲ ዔውቲ ሸኢኮንጎ፤ ዬይያኣ፡- ዐንኮ ማላ፣ ጎጰ ባኮ ካንቄ ሃኣቦ ማላ፣

4 ጳላሢና ዲኤካ ዓኣ ማላ፤ ዬያጉዲ ሃሣ ማዮኮ ሻኣዠጳ ቤዛኣ ሺኢሺንቶንጎ።

5 ቄኤሳሢ ናንገና ናንጋ ጎዳም ሚቹ ዲንጎ ዲንገሢ ማዓንዳጉዲ ሚቹ ዲንጎ ቤዛይዳ ጌሢ ዬያ ሚቾንጎ፤ ዬይ ጳቢንቲ ዛላ ዲንገንታ ዲንገሢ ማዓኔ።

6 ቄኤሶ ፃጳፓ ማዔ ዓቲንቃ ቢያ ዬያ ዓሽኮ ሙዓኒ ዳንዳዓኔ፤ ዬይ ሚርጌና ታኣም ዲማዴያታሢር ታኣም ዲማዴ ቤዛ ሙዮንጎ።

7 «ጎሞ ዛሎ ዲንገንታ ዲንገይና ጳቢንቶ ዛሎ ጨጋ ማሂ ዲንጎ ዲንገይኮ ዳምባ ፔቴኬ፤ ዬይያ፡- ዲንገንቲ ባካ ዲንጎ ዳምቦ ከኑሢ ቄኤሳሢም ዲንገንታ።።

8 ዓይጎ ዓሲማኣ ማዖም ሚቹ ዲንጎ ዲንገሢ ማዔ ዲንገንቲ ቆልሞኮ ዲልዓ ሹኪንቲ ዬኖ ዲንገይ ያኦሲም ዲንጌ ቄኤሳሢም ዲንገንቶንጎ።

9 ቦኦቆይዳ ጉኡፒ ላኣዲንቲ ላኣዳ፡ ያቲዳ ካሢንቲያ፡ ቦኦቆይዳ ጉሪ ላኣዳናያኦ ቢያ ዲንጎ ባኮ ያኦሲም ዔኪ ሺኢሺ ቄኤሳሢም ዲንገንቶንጎ።

10 ዛይቶና ዲርኪ ጊኢጊሾናሢ ማዔቴያ ማሌ ጉሪ ዲንገንቲ ሃኣኮ ዲንገይ ዓኣርኔ ፃጳ ማዔ፡ ቄኤሶም ቢያ ዲንገንቲም ዔያታ ሄኮ ጊሽቲ ዔኮንጎ።።»

ፔቱሞና ያኦሲም ዲንጎ ዲንገሢ

11 «ናንገና ናንጋ ጎዳም ዲንገንታ ፔቱሞና ዲንጎ ዲንገይኮ ዳምባ ያዲ ማዓንዳኔ፤

12 ፔቲ ዓሲ ያኦሲም ጋላታር ዲንጋ ዲንገሢ ማዔቴ ዲዚ ዲንጋ ቆልሞና ዎላ ሙኑቃ ፃኣዛ ጌሊባኣ ላኣዳ፡ ዛይቲና ዲርኪ ሻኣዠሲ ላኣዳና ላኣዳ፡ ዛይቲና ዲርኮና ሺኢቹ ዲኢሊያ ሺኢሾንጎ።

13 ጋላቶር ዲንገንታ ፔቱሞ ዲንገይና ዎላ ሙኑቃ ፃኣዛ ዎሂ ላኣዲንቲ ካሢ ሺኢሾንጎ።

14 ዲማ ዲማ ካሦኮ ቶኦካፓ ቶኦካፓ ፔቲ ፔቲ ዔኪ ናንገና ናንጋ ጎዳም ዲማዴ ዲንገሢ ማሂ ሺኢሾንጎ፤ ዬይ ባካ ቆልሞ ሱጉያ ዔኪ ሚቹ ዲንጎ ቤዛኮ ጎኦሶ ፑጨ፡ ቄኤሳሢም ማዖንጎ።

15 ዬይ ዲንገንቲ ዓሽካ ዒዞ ኬሎ ሙይንቲ ጋጋፖንጎ፤ ዓቲ ዎርቆፓ።

16 «ፔቲ ዓሲ ናኣቤ ናኣባ ኩሜሢር ጌይ፤ ሃሣ ፔ ማሊሢና ዔኪ ዲንጋያ ማዔቴ ዲንገንቲ ኬሎ ሙይንቶንጎ፤ ዓቲሢ ዚር ጉቲ ቢያ ሙይንቶንጎ።

17 ዬካፓ ዓቲ ሃይሣሳ ኬሎ ሄላንዳኣና ዴዔቴ ዓሽካ ታሚና ሚቹንቶንጎ።

18 ዓቲ ዓሽካ ሃይሣሳ ኬሎ ዎማይዲ ማዕቴያ ሙይንቴቴ ዬያ ዓሢኮ ዒንጊያ ያኦሲ ዔካያቱዋሴ፤ ዬይ ዒንጊያኣ ዒንጊንቴያ ማዓዓከ፤ ዬይ ዒኢቲ ባኣዚ ማዓንዳኔ፤ ዬያ ሙዔ ዓሢ ማቶ ዔካንዳኔ።

19 ዒኢቲ ባኣዚና ካኣሜ ዓሽካ ሚሚቸንቶን፣ ሙይንቶ።

«ሜሌ ዓሽኮ ጋዓንቴ ካኣኸ ዳምቦ ጎይያና ጌኤሺ ማዔ ዓይጎ ዓሲያ ሙሙዎን፤

20 ጋዓንቴ ፔቴ ዓሲ ዳምቦ ጎይያና ጌኤሺቱዋያ ዬያ ሙዔቴ ያኦሲ ዴር ባኣኮይዳ፣ ያኦሲ ዓሲ ማዒ ፔቴታዎ ፓይዲንቶ።

21 ዳምቦ ጎይያና ጌኤሺ ማዒባኣ፣ ዓሲፓ ማዎም ቆልሞፓ ኬሰካ ዒኢሳ ባኣዚ፤ ሃሣ ዓይጎዋ ዒኢሳ ባኣዚ ሄሌዎ ናንጊና ናንጋ ጎዳም ዒንጊንቴ፣ ፔቱሞና ዒንጎና ዒንጊያኮ ዓሽኮ ሙዔቴ ዬይ ዓሢ ያኦሲ ዴሬፓ ዲማዲ ባባይቆን፤» ጌዔኔ።

22 ናንጊና ናንጋ ጎዳ ሙሴም፡-

23 «ዒሰራዔኤሌ ዴርም ሂዚ ጌዔ፤ ባይና ማራይና ዋኣሪናኮ ማሊ ሙይፖቴ፤

24 ጉሪ ሃይቄ ቆልሞንታ ቦዎ ዎዴ ቆልሞንታኮ ማላ ሜሌ ባኣዚ ማዲንቶን፤ ዓሲ ሙሙዎ።

25 ያኦሲም ሚቸ ዒንጎያ ማሂ ዒንጊንቴ ቆልሞኮ ማሎ ሙዓ ዓይጎ ዓሲያ ያኦሲ ዴር ባኣካፓ ባይቆን፤

26 ዒሰራዔኤሌ ዓሳ ዓንኮ ቤሰካኣ ማዎም ናንጋ ቤዞ ቢያይዳ ካፒርታቴያ ቆልሞ ሱጉሢ ሙዎ።

27 ዓይጎ ዓሲያ ማዎም ሱጉሢ ሙዓ ዓሲ ያኦሲ ዴር ባኣካፓ ባይቆን፤» ጌዔኔ።

28 ናንጊና ናንጋ ጎዳ ሃሣ ሙሴም፡-

29 «ዒሰራዔኤሌ ዴርም ሂዚ ጌዔ፤ ዓይጎ ዓሲያ ማዎም ፔቱሞና ዒንጎ ዒንጊያ ያኦሲም ዒንጋቴ ዬያይዳፓ ፓቄ ፔ ዛሎ ዒንጎ ባኣዚ ማሂ ናንጊና ናንጋ ጎዳም ዔኪ ሺኢኮን፤

30 ዬያ ሚቸ ዒንጎ ዒንጊሢ ማሂ ያኦሲም ፔ ኩቻ ዒንጎን፤ ማሎ ዚኢርና ዎላ ሺኢሺ፣ ዚኢርዋ ዠጊ ናንጊና ናንጋ ጎዳም ዒንጊሢ ማሂ ሺኢሺን፤

31 ቄኤሳሢ ዬያ ማሎ ሚቸ ዒንጎ ቤዛ ሚቸን፤ ዚኢር ጋዓንቴ ቄኤሶም ዒንጎን፤

32 ዬና ዒንጊያኮ ሚዛቆ ዛሎ ላባዎ ዬያ ቄኤሳሢም ዒንጎን፤

33 ሚዛቆ ዛሎ ላባኣ ሱጉያንታ ማሎንታ ዔኪ ፔቱሞ ዒንጊያ ማሂ ያኦሲም ሺኢሺ ቄኤሳሢ ዛላ ማዎን፤

7:27 ማዢ. ማፃ 9:4፤ ሌዊ. ዓኬ 17:10-14፤ 19:26፤ ላሚ. ዎማ 12:16፤ 23፤ 15:23።

34 ዠገገንቴ ዘኢሮና ዔኪ ሺኢሸና ላባዎ ዒሰራዔኤሌ ዴራ ዒንጌ ዒንገገጋ ዔኪ፥ ቄኤሳሢ ዓኣሮኔና ዒዛኮ ናኣቶናም ናንገና ዔያቶሮ ማዓንዳጉዲ ታ ዒንጌ» ጌዔኔ።

35 «ዓኣሮኔና ናኣቶና ቄኤሌ ማዓንዳጉዲ ጾኦሲ ዶኦሬ ኬሎና ጾኦሲም ዒንገገጋ ማቺ ዒንጎ ዒንገጾኮ ቄኤሶ ዛሎ ማዓንዳጉዲ ዲማሶናሢ ዬያኩ።

36 ዬኖ ኬሎና ዬያ ዒንገገገገጋ ዩጋጋ ቄኤሶ ሄላ ዛላ ዔያቶም ዒንገገገገጋንዳጉዲ ናንገና ናንጋ ጎዳ ዓይሤኔ፤ ዬይ፡- ኬሰካ ዎዶ ቢያይዳ ዒሰራዔኤሌ ዓሳ ኩንሢኒ ኮይሳ ዳምቤኩ።»

37 ዓካራ፡- ማቺ ዒንጎ ዒንገገገጋ ዳምባ፥ ሃኣኮ ዒንጎሢ፥ ጎም ጌኤሻኒ ዒንጎ ዒንገገገጋ፥ ዳቢንቶ ዛሎ ዒንጎ ዒንገገገጋ፥ ቄኤሶ ዶኦሬጾም ጌይ ዒንጎ ዒንገገገጋንጋ ፔቱሞና ዒንጎ ዒንገገገጋ ዳምባ ያዲኩ።

38 ዒሰራዔኤሌ ዴራ ጾኦሲም ዒንጎ ባኮ ዒንጋንዳጉዲ ዓሲ ናንጉዎ ዳውሎኮ ሲና ዲኮ ኮይላ ዔያቶም ኬኤዚንቴያና ናንገና ናንጋ ጎዳ ሙሴም ዬያ ዳምቦ ኬኤዜኔ።

8

ዓኣሮኔና ናኣቶና ቄኤሌ ማዓንዳጉዲ ዶኦሬንጉጾ (ኬሲ. ማፃ 29:1-37)

- 1 ናንገና ናንጋ ጎዳ ሙሴም፡-
- 2 «ዓኣሮኔንጉ ዒዛኮ ዓቲንቆ ናኣቶንጉ ዓፒሎና ማዠንጉቴ፥ ታኣኒ ዴርና ካኣማ ማኣሮ ካሮ ዔኪ ዓኣዴ፤ ዒማና ቄኤሳ ማይንጉ ዓፒላ፥ ቲኩ ዛይታ፥ ጎሜ ጌኤሻኒ ዒንጎ ጌሜ፥ ላምዎ ዓዶ ማራታ፥ ሙኑቆ ፃኣዛ ጌሊባኣ ላኣዳ ዓኣ ሌኤማቶዎ ዔኪ ሺኢሸ።
- 3 ሃሣ ዒሰራዔኤሌ ዴሮ ቢያ ፔቱይዳ ዔኤሊ ዒኢካ ቡኩሴ» ጌዔኔ።
- 4 ናንገና ናንጋ ጎዳ ዓይሤ ጎይጾ ሙሴ ማዴኔ፤ ዴራኣ ሙኪ ቡካዛ፥
- 5 ዔዚ ዔያቶም፡- «ሃሢ ታ ዒንሢኮ ቤርታ ማዳንጉ ዒንሢ ዛጋንዳሢ ናንገና ናንጋ ጎዳ ታና ዓይሤ ባኮኩ» ጌዔኔ።
- 6 ሙሴ ዓኣሮኔንጉ ዒዛኮ ዓቲንቆ ናኣቶንጉ ዓሶ ቤርቶ ሺኢሸ፥ ዎኣያና ማሰቲጾ ዳምቦ ኩንሢኒ ማሰኬኔ።
- 7 ዬያይዴሰካፓ ቄኤሳ ማኣዓ ጾዶዞ ቃሚሾ ዓኣሮኔ ማይሲ፥ ዴኤፒ ኮኦቴያ ማይሲ፥ ኬርና ቱኮ ባኮዎ ቱኡሲ፥ ዔፑዴ ጌይንጉ ባቃና ዓጎ ባኮዎ ዓጊ፥ ዲማ ጎይሢና ሚዛጲሲ ኮሾና ቃልሾና ዬያ ዔፑዶ ዓይሤ ኬርና ቱኬኔ፤

8 ዔቸደኮ ገዳ፡- ዳዶ ቡራሾ ሲኪ፥ ዑሪሚና ቱሚሚ * ጌይንታ ባኮንሢ ጋራ ዓገኔ፤

9 ሃሣ ቶኦኮይዳ ዓፒላ ማሬኔ፤ ዬያኮ ባሊቶ ዛሎይዳ ናንገና ናንጋ ጎዳ ዒዛ ዓይሤ ጎይያና ዋርቄና ኮሺንቱ ያኦሲም ዲማዴያ ማዒያ ዔርዛ ማላታ ማዔ፥ ቦንቸሳ ቆኦቦ ዓገኔ።

10 ዬካፓ ሙሴ ቲዡ ዛይቶ ዔኪ ዓፒሎና ማዢንቱ፥ ያኦሲ ዳርና ካኣማ ማኣርንታ ጋራ ዓኣ ባኮዋ ቲሽኬኔ፤ ዬያይዲ ቢያ ባኮ ያኦሲ ማዶም ዲማሴ።

11 ቲዡ ዛይቶይዳፓ ዳካ ዔኪ ያኦሲም ዒንጎ ባኮ ዒንጎ ቤዛ ዑፃ ለንካይ ማይንቲ ፑጩኔ፤ ዬኖ ጎይያ ያኦሲ ማዶም ዲማዴያ ማዓንዳጉዲ ሚቺ ዒንጎ ቤዛና ዒኢካ ዓኣ፥ ማዶንቶ ሚሆ ቢያሢ፤ ሃሣ ዋኣፆ ማሰቶ ሳኣኖንታ ጌሆ ቤዛዋ ቢያ ፑጩኔ።

12 ቲዡ ዛይቶ ዓኣርኔ ቶኦካ ዋሂ፥ ዒዚ ያኦሲ ማዶም ዲማዳንዳጉዲ ቲሽኬኔ።

13 ዬካፓ ሙሴ ናንገና ናንጋ ጎዳ ዒዛ ዓይሤ ጎይያና ዓኣርኔኮ ዓቲንቆ ናኣቶ ዓሶ ቤርቶ ሸኢሸ፤ ቄኤሳ ማይንታ ያደዘ ቃሚሾ ማይሲ፥ ኬርኖ ቱኮ ቃልሾ ቱኪ፥ ቶኦኮይዳኣ ዔያቶም ቆኦቦ ዓገኔ።

14 ዬካፓ ሙሴ ጎሞ ጌኤሻኒ ዒንገንቱ ጌሜ ዔኪ ሙካዛ፥ ዓኣርኔና ናኣቶና ጌሚኮ ቶኦኮይዳ ኩጮ ጌሢ።

15 ዬያይዳሰካፓ ሙሴ ጌሜ ሹካፆ ሱጉያይዳፓ ኬኤላና ዔኪ ያኦሲም ዲማዴያ ማዓንዳጉዲ ዒንጎ ባኮ ዒንጎ ቤዛኮ ያይዶ ዛላ ዓኣ ዳንኮ ቲሽኪ ጌኤሽ፤ ዓቲ ሱጉያ ዒንጎ ባኮ ዒንጎ ቤዛኮ ዴማ ዋሂ፤ ዬያይዲ ዒንጎ ባኮ ዒንጎ ቤዛ ያኦሲም ዲማሴ።

16 ሃሣ ዒዚ ጌሚኮ ጎፆ ባኮ ዑፃ ዓኣ ማሎ ቢያ፥ ማዶኮ ሻኣዡዳ ቤዛንታ ጳላሢያኣ ዒኢካ ዋላ ዓኣ ማሎና ቢያ ዔኪ ሚቺ ዒንጎ ቤዛ ሚቺ።

17 ጌሚኮ ዒልዶ፥ ሃንጎ ዓሽኮ፥ ሩቁንቶንታ ሶኦኮዋ ዔኪ ናንገና ናንጋ ጎዳ ዓይሤ ጎይያ ጉርደኮ ዙላ ኬሲ ሚቺ።

18 ዬካፓ ሙሴ ሚቺ ዒንጎም ገኢገሺንቱ ማራዓሢ ዔኪ ሙካዛ፥ ዓኣርኔና ናኣቶና ማራዓሢኮ ቶኦካ ኩጮ ጌሢ።

19 ዬያይዳሰካፓ ሙሴ ማራዓሢ ሹኪ ሱጉያ ሚቺ ዒንጎ ቤዛኮ ያይዶ ዛሎ ፑጩኔ።

20-21 ማራዓሢኮ ዓሽኮ ሜኤሎና ሜኤሎና ቲቁ፥ ጎፆ ባኮንታ ገንፆ ቶኮንታ ዋኣሢ ማሰኬኔ፤ ዬካፓ ናንገና ናንጋ ጎዳ ዒዛ ዓይሤ ጎይያ ቶኦኮንታ ማሎንታ ማራዓሢኮ ዓቲ ዓሽኮዋ ቢያ ሚቺ ዒንጎ

* 8:8 ዑሪሚና ቱሚሚ ዬንሢ ባኮንሢ፡- ያኦሲ ማሊያ ዲማሲ ዔራሪ ዓጎ ባኣዚኬ።

ቤዛ ሚቼኔ፤ ዬያ ሚቸ፣ ዒንጎናሢኮ ሳዎ ናንጊና ናንጋ ጎዳ ዎዛሳ ሙኡዚ ዒንጊሢ ማዔኔ።

22 ቄኤሶ ዶኦሪያ ዛሎ ላሚ ዒንጊንጋ ማራዒሢ ዔኪ ሙካዛ፣ ዓኣሮኔና ናኣቶና ኩጮ ማራዒሢኮ ቶኦካ ጌሢኔ፤

23 ዬካፓ ሙሴ ማራዒሢ ሹኪ ሱጉፃፓ ዳካ ዔኪ ዓኣሮኔኮ ሚዛቆ ዎዮ ቤርቶ፣ ሚዛቆ ኩጮና ቶኦናኮ ዶኦሞ ኬኤሎ ቲሽኬኔ፤

24 ሃሃ ዓኣሮኔኮ ናኣቶ ዓሶኮ ቤርቶ ዔኪ ሺኢሻያ ሚዛቆ ዎዮ ቤርቶ፣ ሚዛቆ ኩጮና ቶኦናኮ ዶኦሞ ኬኤሎ ዔያቶኮ ቲሽኬኔ፤ ዬያይዲ ዓቴ ሱጉያ ያኦሲም ዒንጎ ባኮ ዒንጎ ቤዘኮ ያይዶ ዛሎ ጎኦሶ ፑጮኔ፤

25 ዬያይደሰካፓ ማላኦ፣ ዑንኮ ማላ፣ ጎጾ ባኮ ካንቂ ዓኣ ማሎ ቢያ፣ ማዮኮዎ ሻኣዦዳ ቤዘ፤ ጸላሢንጋ ዒኢካ ዓኣ ማሎንጋ ሚዛቆ ዛሎ ላባዎዎ ዔኬኔ፤

26 ያኦሲም ደማዴያ ማዔ፣ ሙኦቃ ፃኣዛ ጌሊባኣ ላኦዶ ጌሃ ለማቶይዳፓ ፔቴ ላኦዶ ዔኪ፤ ዬያጉዲ ሃሃ ዛይቶና ዲርኪ ላኦዶና ላኦዶ፣ ሻኣዦ ላኦዶኣ ዔኪ ማሎና ላባዎ ዓሽኮናኮ ዑፃ ጌሢኔ።

27 ዬያ ሙያ ቢያ ዔኪ ዓኣሮኔና ናኣቶናም ዒንጋዛ ዔያጋ ዬያ ዠጊ፣ ናንጊና ናንጋ ጎዳም ዒንጊኔ።

28 ዬካፓ ሙሴ ካሃ ዔያቶ ኩጮፓ ዔኪ፣ ቄኤሶ ዶኦሪያሮ ሚቸ፣ ዒንጎ ባኮይዳ ቃሲ ጌሢ ሚቸ፣ ዒንጎ ቤዛ ሚቸኔ፤ ዬያኮ ሳዎ ናንጊና ናንጋ ጎዳ ዎዛሳ ሙኡዚ ዒንጊሢ ማዔኔ።

29 ዬያይደሰካፓ ሙሴ ዚኢሮ ዔኪ ዠጊ፣ ናንጊና ናንጋ ጎዳም ዒንጊኔ፤ ዬይ ቄኤሶ ዶኦሪያሮ ዒንጎ ማራያኮ ሙሴ ሄላ ቤዘኬ፤ ሙሴያ ናንጊና ናንጋ ጎዳ ዒዛ ዓይሢ ጎይያ ቢያ ባኮ ማዴኔ።

30 ሃሃ ሙሴ ቲዦ ዛይቶና ዒንጎ ባኮ ዒንጎ ቤዛ ዓኣ ሱጉፃፓኣ ዳካ ዔኪ ዓኣሮኔና ናኣቶናኮ ዑፃ፤ ጊንሃ ሃሃ ዔያቶኮዎ ዓፒሎይዳኣ ቢያ ፑጮኔ፤ ዬያይዲ ዒዚ ዔያቶንጋ ዔያቶኮ ዓፒሎንጋ ናንጊና ናንጋ ጎዳም ደማሴኔ።

31 ዬካፓ ሙሴ ዓኣሮኔና ናኣቶናም «ዓፒሎና ማዢንቴ፣ ያኦሲ ዴሮና ካኣማ ማኣሮ ካራ ዓሽኮ ካሠዎቴ፤ ናንጊና ናንጋ ጎዳ ታኣም ዓይሢ ኬኤዜ ጎይያ ቄኤሶ ዶኦሪያሮ ዒንጎ ካሃ ጌሃ፣ ለኤማቶ ጋራ ዓኣ ካሃና ዎላ ሙዑዎቴ።

32 ዓቴ ዓሽኮ ማዔቴያ ላኦዶ ታሚና ሚቸዎቴ፤

33 ዒንሢኮ ቄኤሶ ማሃ ዶኦሪያ ዳምባ ማዴንቴ ኩማንዳሢ ላንካይ ኬሊዳታሢሮ ዬይ ማዴንቴ ጋፓኦዳ፣ ላንካዎ ኬሎ ሄላንዳኣና ዓፒሎና ማዢንቴ፣ ያኦሲ ዴሮና ካኣማ ማኣሮ ካራፓ ዓኣዲፖቴ።

34 ጎሞ ዒንሢኮ ጌኤሻኒ፣ ሃያ ኑ ሃኖ ማዴ ባኮ ኩንሣንዳጉዲ ናንጊና ናንጋ ጎዳ ኑና ዓይሄያኩ።

35 ዬያሮ ናንጊና ናንጋ ጎዳ ዓይሄ ባኮ ቢያ ማዲ ኩንሠብቲ፤ ለንካዎ ኬሎዎ ጉቤ ዋንቴና ሮኦሪና ዓፒሎና ማከንቴ፣ ጾኦሲ ዴሮና ካኣማ ማኣሮ ካራ ዴዐብቲ፤ ዬያ ዒንሢ ማዲባኣቴ ጋዓንቴ ሃይቃንዳኣኩ፤ ዬይ ቢያ ናንጊና ናንጋ ጎዳ ታና ዓይሄ ዎጌኩ» ጌዔኔ።

36 ዓኣሮኔንታ ናኣቶንታ ናንጊና ናንጋ ጎዳ ሙሴ ዛሎና ዔያቶ ዓይሄ ባኮ ቢያ ማዲ ኩንሄኔ።

9

ዓኣሮኔ ናንጊና ናንጋ ጎዳም ዒንጎ ባኮ ዒንጌሢ

1 ለንካይ ኬሊዳ ቄኤሶ ደኦሪያ ዳምባ ማዲንቲ ጋፔ ኬሎኮ ዚሮ ጉቴሎ ሙሴ ዓኣሮኔንታ ናኣቶንታ፤ ዬያጉዲ ሃሣ ዒሰራዔኤሌ ዴሮኮዎ ሱኡጎ ዔኤሌኔ፤

2 ዒማና ዒዚ ዓኣሮኔም፡- «ዔኤቢ ቦሂሳ ባኣዚባኣ፣ ፔቴ ዎፓናና ፔቴ ማራይ ዓዴና ዔኪ፤ ዎፓናሢ ጎሞ ጌኤሻኒ ዒንጊንታ ዒንጊሢ፣ ማራዓሢ ሚቺ ዒንጎ ዒንጊሢ ማሂ ናንጊና ናንጋ ጎዳም ሺኢሹ።

3 ዒሰራዔኤሌ ዴራ ጎሜ ጌኤሻሢም ዒንጎ ዒንጊሢ ማዓ ፔቴ ኮላይ፤ ሃሣ ዓይጌያ ቦሂሳ ባኣዚባኣ፣ ፔቴ ሌዔ ማዔ ጌማናይ፣ ፔቴ ሌዔ ማዔ ዓዴ ማራናይ ሚቺ ዒንጎ ዒንጊያም ዔኪ ሙካንዳጉዲ ኬኤዜ፤

4 ዬያጉዲ ሃሣ ፔቴ ዚያ ጌማናይ፣ ዓዴ ማራናይ፤ ፔቴሞና ዒንጎ ዒንጊያም ዔኪ ሙኮንጎ፤ ዬንሢ ዛይቴና ዲርከንቴ ሃኣኮ ዒንጊያና ዎላ ማሂ ናንጊና ናንጋ ጎዳም ዔያታ ሺኢሹንጎ፤ ዬያ ቢያ ማዲንጎ፤ ዓይጎሮ ጌዔቴ ሃኖ ናንጊና ናንጋ ጎዳ ዒንሢም ፔጋዲ ጴዳንዳይ» ጌዔኔ።

5 ዔያታ ሙሴ ዓይሄ ባኮ ቢያ ጾኦሲ ዴሮና ካኣማ ማኣሮ ካሮ ዔኪ ሙኩኔ፤ ዴራ ቢያ ዒማና ናንጊና ናንጋ ጎዳ ዚጊ ካኣሸካጊ ዒኣካ ቡኪ ዔቄኔ።

6 ዬካፓ ሙሴ ዔያቶም፡- «ዓኣፓ ዲካ፣ ናንጊና ናንጋ ጎዳኮ ቦንቾ ፖፋ፣ ዒንሢም ፔጋዲ ጴዳንዳሢሮ ዬያ ቢያ ማዲንዳጉዲ ዒዚ ዒንሢ ዓይሄኔ» ጌዔኔ።

7 ሃሣ ሙሴ ዓኣሮኔም፡- «ጾኦሲም ዒንጎ ባኮ ዒንጎ ቤዞ ባንሢ ደጩ፣ ኔ ጎሞንታ ዴሮ ጎሞዎ ጌኤሻኒ ጎሞ ዛሎ ዒንጎ ባኮንታ ሚቺ

ዒንጎ ዒንጊያዎ ያኦሲም ሺኢሺ፤ ዬያ ዒንጊንታ ባኮ ዴሮኮ ጎሞ ጌኤሺሳኒ ናንጊና ናንጋ ጎዳ ዓይህ ጎይያ ዒንጊ።»

8 ዬካፓ ዓኣሮኔ ያኦሲም ዒንጎ ቤዘ ዓኣዳዎ ቤርታሲ ፔ ጎሞ ጌኤሻኒ ዒንጊንታ ዎፓናሂ ሹኬኔ፤

9 ዒዛኮ ናኣታ ሱጉያ ዒዛም ዔኪ ሙካዛ፣ ዒዚ ሱጉያ ኬኤሎና ዔኪ ዔኪ ያኦሲም ዒንጎ ባኮ ዒንጎ ቤዘኮ ያይዶ ዛላ ዓኣ፣ ዳንኮ ቲሽካያ ዓቴ ሱጉያ ዒንጎ ባኮ ዒንጎ ቤዘኮ ዴማ ዎሃኔ፤

10 ዬካፓ ማሎንታ ጳላሂንታ ማዮኮዎ ሻኣዳፋ ቤዘ ዔኪ ናንጊና ናንጋ ጎዳ ሙሴ ዓይህ ጎይያ ያኦሲም ዒንጎ ባኮ ዒንጎ ቤዘይዳ ሚቹኔ።

11 ዓሽኮና ዒልዎና ጋዓንቴ ጉርዶኮ ዙላ ኬሲ ሚቹኔ።

12 ዬያይዳሰካፓ ዓኣሮኔ ሚቹ ዒንጎ ዒንጊያም ዔኪ ሺኢሸናሂ ሹካዛ፣ ዒዛኮ ናኣታ ሱጉያ ዒዛም ዔኪ ሙኬም ያኦሲም ዒንጎ ባኮ ዒንጎ ቤዘኮ ያይዶ ዛሎ ዒ ፑጩኔ፤

13 ሃሃ ዒዛኮ ናኣታ ቶኦኮንታ ዓቴ ዓሽኮኮ ሜኤሎ ሜኤሎ ኬሲ ዔኪ ሙካዛ፣ ዓኣሮኔ ዬያ ቢያ ሚቹ ዒንጎ ቤዘ ሚቹኔ።

14 ዬካፓ ሃሃ ጎጾ ባኮና ጊንያ ቶኮ ዎኣሂና ማሰካዎ፣ ሚቹ ዒንጎ ባኮኮ ዑፃ ጌሂ ዎላ ሚቹኔ።

15 ዬያይዳሰካፓ ዒዚ ዴሮ ዛሎ ዒንጎ ባኮ ሺኢሺ፣ ዓሶኮ ጎሞ ዛሎ ዒንጊንታ ኮሌ ቲቄኔ፤ ዬያኣ ቤርታ ዒ ፔ ጎሞ ዛሎሮ ማጴ ጎይያ ማዲ ያኦሲም ሺኢሺ።

16 ሃሃ ሚቹ ዒንጎ ዒንጊያም ማዓ ቆልሞ ዳምቦ ጎይያና ዔኪ ሙኪ ሹኪ ዒንጊ።

17 ሃኣኮ ዒንጊያዎ ዔኪ ሙኪ፤ ዲኢሎይዳፓ ሾኣፓ ኩሙሂ ዑጩ ዔኪ፤ ጉቴ ጉቴ ዒንጊንታ ሚቹ ዒንጎ ዒንጊያይዳ ቃሲ ሚቹ ዒንጎ ቤዘ ሚቹኔ።

18 ጌሚና ዓዶ ማራዓሂና ሹኪ፣ ዴራ ፔቱሞና ዒንጋ ዒንጊሂ ማሂ ዒንጌም ዒዛኮ ናኣታ ሱጉያ ዒዛም ዔኪ ሙኬኔ፤ ዬያ ሱጉያ ዒዚ ሚቹ ዒንጎ ቤዘኮ ያይዶ ዛሎይዳ ፑጩኔ፤

19 ዬካፓ ዒዚ ጌሚና ማራዓሂናኮ ማሎ ቢያ፤ ጌይያ፡- ዑንኮ ማላ፣ ጎጾ ባኮ ካንቄ ዓኣ ሃኣባ፣ ጳላሂንታ ማዮኮዎ ሻኣዳፋ ቤዘዎ ቢያ ዔኪ፣

20 ላምዎ ቆልሞንሂኮ ዚኢሮይዳ ጌሂሰካፓ ሚቹ ዒንጎ ቤዘይዳ ማሎ ሚቹኔ፤

21 ዚኢሮንሢንታ ሚዛቆ ዛሎይዳ ዓኣ ገንፆ ቶኮንሢ ሙሴ ጌዔ ጎይዖና ቁኤሶ ዛላ ማዓንዳጉዲ ዠገጌ፣ ናንገና ናንጋ ጎዳም ሺኢሹኔ።

22 ዓኣሮኔ ዬያ ባኮ ቢያ ዒንገጊ ጋፒሴሰካፓ ኩጮ ዳሮ ባንሢ ማሂ ዓንጃዖ፣ ሚቺ ዒንጎ ቤዛፓ ኬዴኔ።

23 ዬካፓ ሙሴና ዓኣሮኔና ዓፒሎና ማዠኘ፣ ፆኦሲ ዳሮና ካኣማ ማኣሮ ጌሊ ዒኢካፓ ኬሰካዖ ዳሮ ዓንጃኔ፤ ዒማና ናንገና ናንጋ ጎዳኮ ቦንቻ ፔጋዲ ጴዳ፣ ዓኣፓ ዲካ ፖዓ ዳሮ ቢያሢም ፖዒ ጴዳኔ፤

24 ናንገና ናንጋ ጎዳ ኮሮ፣ ጫሪንጫፓ ታሚ ሙኪ ሚቺ ዒንጎ ቤዘይዳ ዓኣ፣ ዒንጎና ባኮንታ ማሎዋ ቢያ ሙዔኔ፤ ያኣዒ ማዓኣና ዳራ ቢያ ዬያ ዛጋዖ ዒላሺሢና ባሊቶ ሳዖ ሄሊሲ ዚጊ ፆኦሲ ካሽኬኔ።

10

ናኣዳኣቤና ዓቢሁና ዳቢንቲ ማዲ ሃይቄ ሃይቦ

1 ናኣዳኣቤና ዓቢሁና ጌይንታ ላምዖ ዓኣሮኔ ናኣቶንሢ ፔኤኮታዋ ጩቢሾ ኩንፆይዳ ታሚ ቁንሢ ካኣሺ ዔኪ፣ ጌዳ ዑንጃ ዓገ፤ ናንገና ናንጋ ጎዳ ዓይሢባኣ ታሚ ዔኪ ናንገና ናንጋ ጎዳ ቤርቶ ሺኢሹኔ፤

2 ዬያሮ ዔርቲባኣንቲ ናንገና ናንጋ ጎዳ ኮራፓ ታሚ ኬዲ ዔያቶ ሙዔሢሮ ዔያታ ሃይቄኔ።

3 ዬካፓ ሙሴ ዓኣሮኔ ኮራ፡- «ናንገና ናንጋ ጎዳ ታ ቤርቶ ሺኢኪ፣ ታኣም ማዳሢ ቢያ ታኣኮ ዲማዴያ ማዒዖ ጌኤሹዋ ቦንቻንጎ፤ ታኣኒ ታ ዳሮ ቢያሢ ቤርታ ቦንቻንቲያ ማዓንዳኔ፣ ጌይ ኬኤዜሢ ዬያቱዋዓዳ?» ጋዓዛ፣ ዓኣሮኔ ዔኤቢ ጎዑዋዖ ዚቲዮ ጌዔኔ።

4 ዬካፓ ሙሴ ዓኣሮኔኮ ዓደ ዒሾ፣ ዑዚዔኤሌ ጎዖሰኬያኮ ናይ ሚሻዔኤሌና ዔልፃፓኔና ዔኤላዖ፡- «ሃኒ ዬይጋፓ ሃንሢ ዒንሢ ጌርሲንሢኮ ሌዞ ዓፒሎና ማዠኘ፣ ፆኦሲም ዲማዴ ማኣራፓ ዔኪ ጉርደ ዙሎ ኬሱዋቲ» ጌዔኔ።

5 ዔያታ ሙኪ ሙሴ ዔያቶ ዓይሢ ጎይዖ ሃይቄዞንሢኮ ቁኤሱዋ ማኣዓሢ ኬሱዋዖ ዋላ ኬዲ ዔኪ ጉርደፓ ዙሎ ኬሴኔ።

6 ዬካፓ ሙሴ ዓኣሮኔና ዒዛኮ ናኣቶ ዓላዜሬንታ ዒታማሬንታዎ፡- «ሲዬ፣ ቶኦኮ ዒንሢኮ ጉኡሊፖቲ፤ ማኣዓሢያ ዳርዚፖቲ፤ ዬያ ዒንሢ ማዴቲ ሃይቃንዳኣኬ፤ ናንገና ናንጋ ጎዳ ዳሮ ዑፃ ዳጋዳንዳኔ፤ ጋዓንቲ ናንገና ናንጋ ጎዳ ታዋና ባይዜ፣ ዒንሢኮ ዓሽኮ ማዔዞንሢ ዒሰራዔኤሌ ዓሳ ዬኤካኒ ዳንዳዓኔ።

7 ዓፒሎና ማዠኘ፣ ፆኦሲ ዳሮና ካኣማ ማኣሮ ሃሺ ዒንሢ ኬሰኪፖቲ፤ ናንገና ናንጋ ጎዳ ዓይሢ ጎይዖና ዛይቲና ቲሽኪንቲ

9:22 ገይ. ማፃ 6:22-26።

ዲዛም ዲንሢ ዲማዲያታሢር ዲንሢ ያፓ ኬሰኬቴ ሃይቃንዳኣኬ»
ጋዳዛ፣ ዔያታ ሙሴ ዓይሢ ጎይፆማ ማዲኔ።

ቄሌሳ ማዲ ኩንሣንዳጉዲ ኬሲንቴ ዳምቤ

8 ናንገና ናንጋ ጎዳ ዓኣሮኔም፡-

9 «ኔኤና ኔ ናኣቶና ዎይኖ ዑዠታቲያ ማሌ ማሣ ዑሺ ዑሺኪ ዓፒሎና ማዢንቴ፣ ታኣኒ ዴሮና ካኣማ ማኣሮ ዲንሢ ጌሉዋጉዲ ዲንሢና ዔሩዋቴ፤ ዲንሢ ዬያይዳቴ ሃይቃንዳኣኬ፤ ዬይ ዲንሢንታ ዲንሢኮ ገንፃፓ ሙካ ሾይንታ ካፓንዳ ዳምቤ ማፆንጎ፡፡

10 ታኣም ዲማዲ ባኮንታ ዲማዲባኣ ባኮ፣ ዲኢቴ ባኮንታ ጌኤዠ ባኮንታኮ ባኣካ ዓኣ ዲሙሞ ዔሪ፡፡

11 ሙሴ ዛሎና ታ ዲንሢም ዲንጌ ዳምቦ ቢያ ዲሰራዔኤሌ ዓሶ ዔርዘዋቴ» ጌዔኔ፡፡

12 ዬካፓ ሙሴ ዓኣሮኔና ዲዛኮ ላምፆ ናኣቶ ዓላዜሬንታ ዲታማሬንታም፡- «ናንገና ናንጋ ጎዳም ዲንገንቴ ሃኣኮ ዲንገይይዳፓ ዓቴ ዲኢሎ ዔኪ ሙኑቃ ፃኣዛ ጌሊባኣ ላኣዳ ላኣዳዋቴ፤ ዬይ ዑሣ ዓኣዲ ፆኦሲም ዲማዲ ዲንገሢ ማዔሢር ታኣም ዲንጎ ባካ ዲንገንታ ቤዘ ኮይላ ሙዑዋቴ፡፡

13 ዬይ ናንገና ናንጋ ጎዳም ዲንገንታ ሃኣኮ ዲንገይይዳፓ ፓቂንቴ ኔኤና ኔ ናኣቶና ዛላ ማዔሢር ፆኦሲም ዲማዲ ቤዘ ሙዑዋቴ፤ ፆኣዲ ዲንሢ ማዲንዳጉዲ ናንገና ናንጋ ጎዳ ታና ዓይሢ፡፡

14 ዲሰራዔኤሌ ዓሳ ፔቱሞና ዲንጋ ዲንገይይዳፓ ዲንሢ ዛሎ ማዲ ዲንገንቴሢር ዡጎና ዚኢሮንታ ላባዎንታ ኔናንታ ኔኤኮ ዓቴንቆ ናኣቶንታ ዉዲሮ ናኣታኣ ቢያ ካኣዠ ዳምቦ ጎይፆና ጌኤሺ ማዔ ቤዘ ሙዑዋቴ፡፡

15 ማላ ናንገና ናንጋ ጎዳም ሙኡዚ ዲንገሢ ማዲ ዲንገንታ ዎድና ላባዎንታ ዚኢሮንታ ዔያታ ዔኪ ሺኢሾንጎ፤ ዬይ ቢያ ናንገና ናንጋ ጎዳ ዓይሢ ጎይፆና ኔኤና ኔ ናኣቶናም ናንገና ዲንሢ ዛላ ማዲንዳኔ» ጌዔኔ፡፡

16 ሙሴ ጎሞ ጌኤሺፆር ዲንገንቴ ዎኣራሢ ዎዎዲንቴቴያ ፆኦጪ ታማኣ ሚቶናያ ማዔሢ ዔራፆ ዓኣሮኔ ናኣቶ፣ ዓላዜሬና ዲታማሬና ዑፃ ዲጋዲ፡፡

17 «ጎሞ ጌኤሺሮ ዲንገንቴ ዲንገይ ዓይጎር ፆኦሲም ዲማዲ ቤዘ ዲንሢ ሙዑዎፆ ሃሺይ? ዬይ ዑሣ ዓኣዲ ፆኦሲም ዲማዲያኬ፤ ዬይ ዴሮኮ ጎሞ ጌኤሻያ ማዲንዳጉዲ ናንገና ናንጋ ጎዳ ዲንሢም ዲንጌያኬ፤

18 ይያኮ ሱጉፃ ዓፒሎና ማዢንቴ፣ ያኦሲም ደማዴ ማኦር ጌሊባኣሢር ታ ዲንሢም ዓይሢ ጎይዖና ያኦሲም ደማዴ ቤዛ ዲንሢ ዬያ ዓሽኮ ሙሙ-ዓንዳዖ ዓቴኔ!» ጌዔኔ።

19 ዲማና ዓኣርኔ ሙሴም፡- «ጎሞ ጌኤሻኒ ዲንጊንቴ ዲንጊዖ ሃኖ ታ ሙዔያ ማዔቴ ናንጊና ናንጋ ጎዳ ሞዛሳንዳያ ናንዳ? ዴራ ጎሞ ጌኤሽዖ ዛሎንታ ሚቺ ዲንጎ ዲንጊዖ ዛሎናር ዲንጎ ባኮ ሃኖ ዔኪ ዬዔኔ፤ ጋዓንቴ ያኣዴ ያኣዴ ባኣዚ ታና ሄሌኔ» ጌይ ኬኤዜኔ።

20 ሙሴ ዬያ ሞይዛዖ ዲ ጌዔ ባኮ ጎኔኬ ጌይ ዔኬኔ።

11

ዓሽኪ ሙይንታ ባኣዚና ሙይንቱሞ ባኣዚ (ለሚ. ሞማ 14:3-21)

- 1 ናንጊና ናንጋ ጎዳ ሙሴና ዓኣርኔናም፡-
- 2 «ዲሰራዔኤሌ ዴሮም ሂዚ ጎዑሞቴ፤ ጎይዳ ናንጋ ባኮይዳፓ ዓሽኪ ዲንሢ ሙዓንዳዛንሢ ሃንሢኬ፡-
- 3 ሹቁላ ላምዖ ፓቂንቲ ዓኣ፣ ዓሌ ዳዓ ባኮንሢኮ ዓሽኪ ሙዑሞቴ፤
- 4-6 ጋዓንቴ ጋኣሎንታ ሸኦኖንታ ሞሪሌንታ ዓሌ ዳዓያ ማዔቴያ ዔያቶኮ ቶኮ ሹቁላ ላምዖ ፓቂንቲባኣያ ማዔሢር ሙዲፖቴ፤ ዲንሢኮ ቁፃ ማዖንጎ።
- 7 ሃሃ ጉዳንሢያ ሙይፖቴ፤ ዔያቶኮ ሹቁላ ላምዖ ፓቂንቲያ ማዔቴያ ዓሌ ዔያታ ዳዑሞሢር ዲንሢኮ ቁፃ ማዖንጎ።
- 8 ዬይ ባካ ቁፃ ማዔሢር ዬያቶ ሙይፖቴ፤ ሃይቁ ለዘሞ ዔያቶኮ ካኣሚፖቴ።»
- 9 «ጋኣሲንታ ቁኡሪ ማላ ዲልዲንታ ዓኣ፣ ዴኤፖ ባዘና ሞርናይዳ ናንጋ ሞላሢ ዜርዖ ዲንሢ ሙዓኒ ዳንዳዓኔ፤
- 10 ጋዓንቴ ሞኣዖይዳ ናንጋ፣ ጋኣሲና ዲልዲናባኣ ሜሌ ማዢንታ ቢያ ሙይንታንዳያ ኮይሱሞሴ።
- 11 ዬያጉዴ ባካ ዲንሢኮ ቁፃ ማዓኒ ኮይሳኔ፤ ዬያቶ ሙይዖ ዓታዛ ሃይቁ ለዘታዖ ዔያቶኮ ዲንሢ ካኣማንዳያ ኮይሱሞሴ፤
- 12 ዬያር ሞኣዖይዳ ናንጋ ጋኣሲና ቁኡሪ ማላ ዲልዲናባኣ ማዢንታ ቢያ ዲንሢ ሻሻኣካ ባኣዚ ማዖንጎ።»
- 13-19 «ካፖ ዜርዖይዳፓ ዲንሢም ቁፃ ማዔ፣ ሙይንታኒ ሻኣካንዳያ ኮይሳ ባኮንሢ ሃንሢኬ፡- ዚኢጊላ፣ ሃምፑራ፣ ኮኦኬ፣ ኪላንቁ፣ ዱማ ዱማ ዜኤጌ፣ ዱማ ዱማ ቁራኬ፣ ቱኡቴ፣ ሃንጋ ሃንጎ፣ ጫሬ ካፒ፣ ዱማ ዱማ ጋርማ ዜርሢ፣ ኩኩቴ፣ ሶኦሃ ሃምፑራ፣

ሙኡታሌ፣ ባዚ ካፒ፣ ቶኮ ኬኤላ ዋላ ካኣሜ ባዞ ካፓ፣ ጫውራ፣ ቦኦካ፣ ቆልሞና ሃንታ ቦኦሬ ካፓ፣ ማኦሎንታ ፓቃቴንታኬ።

20 «ጋኦሲ ዓኣያታዎ ያይዶ ቶኪና ሃንታኒ ዳንዳዓ፣ ዳካ ባኦዚ ቢያ ዒንሢሞ ቁፄ ማዎንጎ፤

21 ጋዓንቲ ዔያቶይዳፓ ሳይይዳ ኮኦማ ጨገቺ ዓኦ፣ ዳኮ ባካ ሙይንታኒ ዳንዳዓኔ፤

22 ዬያታ ዓቢሢንታ ጎሞቦንታ ማኮንታኬ።

23 ጋዓንቲ ጋኦሲ ዓኣያታዎ ያይዶ ቶኪና ሃንታ፣ ዳኮ ባካ ጉቤ ዒንሢሞ ቁፄ ሃሣ ሻኦካያ ማዎንጎ።

24 «ዬንሢ ባኮ ዒንሢ ካኣሜቲ ዒኢታንዳኦኬ፤ ዬንሢ ባኮኮ ሃይቄ ሌዞ ካኣሜ ዓሲ ሳዓ ዓማንዳያ ሄላንዳኦና ዒኢቲያ ማዎንጎ፤

25 ዬያ ባኮኮ ሌዞ ዔኪ ሺኦሻ ዓሲ ቢያ ፔኤኮ ማኦሣሢ ማሰኮንጎ፤ ያዲ ማዔቲያ ዴንዲ ሳዓ ዓማንዳያ ሄላንዳኦና ዒኢቲያ ማዓንዳኔ።

26 ቶኪ ሹቁሊ ዓኣያታዎ ሹቁላ ላምዎ ፓቂንቲ ባኦያ፣ ሃሣ ዓሌ ደዑዋ ባኦዚ ቢያ ዒንሢኮ ቁፄ ማዎንጎ፤ ዬያ ባኮኮ ሌዞ ካኣሜ ዓሲ ቢያ ዒኢቲያ ማዎንጎ።

27 ያይዶ ቶኪና ሃንታ ባኮይዳፓ ቢያ ፔ ቃኦቆና ሄርቄ ሃንታ ባካ ቢያ ዒንሢኮ ቁፄ ማዎንጎ፤ ዬያ ባኮኮ ሃይቄ ሌዞ ካኣማ ዓሲ ቢያ ሳዓ ዓማንዳያ ሄላንዳኦና ዒኢቲያ ማዎንጎ፤

28 ዬያ ባኮኮ ሃይቄ ሌዞ ካኣማ ዓሲ ፔኤኮ ማኦሣሢ ማሰኮንጎ፤ ያዲ ማዔቲያ ዴንዲ ሳዓ ዓማንዳያ ሄላንዳኦና ዒኢቲያ ማዓንዳኔ፤ ዬይ ባካ ዒንሢኮ ቁፄ ማዎንጎ።

29-30 «ዎኦቻ፣ ሂኦዲ፣ ሂኦዲ ሶይና፣ ሞዳ፣ ጎርሻ፣ ጌኤጌ፣ ጉርጉራ፣ ጋኦሹንቻ፣ ጎኦሺ ጎዳ፤ ያኦቶንታ ያኦቶጉዴ ማከንታ ቢያ ዒንሢኮ ቁፄ ማዎንጎ፤

31 ያኦቶ ባኮኮ ዑይታቲያ ሃይቄ ሌዞ ካኣማ ዓሲ ቢያ ሳዓ ዓማንዳያ ሄላንዳኦና ዒኢቲያ ማዎንጎ።

32 ዬያቶ ባኮኮ ሌዞ ካኣሜ ሜሄያኦ ቢያ ዒኢቲያ ማዎንጎ፤ ዬይ ሜሃ ሚሢፓ ኮሽና ባኦዚ፣ ማኦዓ፣ ዜዲ፣ ሱርባ፤ ያኦቶንታ ዬያጉዴ ባኮ ቢያ ማዓኒ ዳንዳዓኔ፤ ዬይ ሜሃ ዋኦሢዳ ዓገንቲ ዴዎንጎ፤ ሳዓ ዓማንዳያ ሄላንዳኦና ዒኢቲያ ማዎንጎ።

33 ሌዞ ዔያቶኮ ዓጨፓ ማከና ሜሄ ሄሌቲ ዬያ ባኮኮ ጋራ ዓኦ ባካ ዒኢቲያ ማዓሢር ዬያ ባኮ ዋዎዲዋቲ።

34 ዓይጎጉዴ ሙኡዚ ማዎም ዬያጉዴ ሜሃፓ ዋኦሢ ያዲ ሄሌቲ ዬይ ሙዓ ዒኢቲያ ማዎንጎ፤ ዬያ ሜሆይዳ ዑሽኮ ዑሽ ዓኦቲያ ዒኢቲያኬ፤

35 ይህ ሃይቁ ባኮኮ ሌዛ ካላሜ ባካዚ ቢያ ዒኢቲያ ማዓሢር ቁፄ ማሂ ሻኦኪንቱዋቲ፤ ናኦሶ ማዔቲያ ሶቲታቲያ ዋዲ ኬኤሩዋቲ፤

36 ይንሢ ባኮኮ ሌዛ ካላሜ ባካዚ ቢያ ዒኢታያ ማዔቲያ ዋኦሢ ዓልቃ ቤሲና ዋኦሢ ዔቲና ዒኢታዓኬ፤ ጋዓንቲ ሌዛ ካላማ ዓሲ ዒኢቲያ ማዓንዳኔ።

37 ይንሢ ባኮኮ ሌዛ ዜርቃኒ ጊኢጊሸና ዜርሢ ካላሜቲ ዜርፃ ዒኢታዓኬ፤

38 ጋዓንቲ ዜርፆይዳ ዋኦሢ ዋሂንቲሰካፓ ይያ ባኮኮ ሌዛ ካላሜቲ ዒንሢኮ ይይ ዜርፃ ዒኢቲያ ማዖንጎ።

39 «ዒንሢ ዓሸኮ ሙዓ ቆልማ ሃይቁም ሌዛ ካላማ ዓሲ ሳዓ ዓማንዳያ ሄላንዳኦና ዒኢቲያ ማዓንዳኔ።

40 ዓይጎ ዓሲያ ማዖም ይያ ቆልሞኮ ዓሸኮይዳፓ ሙዔያ ማዔቲ ማኦሢ ፔኤኮ ማሰኮንጎ፤ ያዲ ማዔቲያ ዴንዲ ሳዓ ዓማንዳያ ሄላንዳኦና ይይ ዓሢ ዒኢቲያ ማዓንዳኔ፤ ሃሢ ዓይጎ ዓሲያ ማዖም ይያ ባኮኮ ሌዛ ካላሜ ኬዴቲ ማኦሢ ፔኤኮ ማሰኮንጎ፤ ይይ ዓሢያ ዴንዲ ሳዓ ዓማንዳያ ሄላንዳኦና ዒኢቲያ ማዖንጎ።

41 «ሳፆይዳ ዳዶና ጎቺንቲ ሃንታ፥ ዳኮ ማዢንታ ቢያ ዒንሢኮ ቁፄ ማዔ፥ ሻኦካያ ማዖንጎ፤ ሙይፖቲ።

42 ሳፆይዳ ዳዶና ጎቺንቲ ሃንታ ባካ፥ ፆይዶ ቶኪናታፆ ጎቺንቲ ሃንታ ባኮንታ ሚርጌ ቶኪ ዓኦ ባኮንታ ቢያ ቁፄ ማሂ ሻኦኪንቱዋቲ፤ ሙይፖቲ።

43 ይንሢ ባኮይዳፓ ዓይጎ ባኦዚያ ማዖም ሙዒ ዒንሢ ቶኦኮ ዒኢሲፖቲ፤

44 ታኦኒ ናንጊና ናንጋ ጎዳ ማዔ ዒንሢኮ ሶኦዛሢኬ፤ ታኦኒ ዲማዴያታሢር ዒንሢያ ዒንሢ ታኦም ዲማዴያ ማሁዋቲ፤ ሳፆይዳ ዳዶና ጎቺንቲ ሃንታ ዳኮ ማዢንቶ ሙዒ ዒንሢ ዒኢሲፖቲ።

45 ዒንሢኮ ሶኦሲ ማዓኒ ጊብፄ ዓጮይዳፓ ዒንሢ ዔኪ ኬሴ ናንጊና ናንጋ ጎዳሢ ታናኬ፤ ይያር ታኦኒ ዲማዴያ ማዔሢር ዒንሢያ ታኦም ዲማዴያ ማዕታ።

46 «ዓካሪ ሃይ፥ ዋኦሢዳ ናንጋ ባኮንታ ሳፆይዳ ናንጋ ዳኮ ማዢንቶንታ፤ ሃሢ ካፖ ዛሎዋ ዒንሢም ኬሲንቲ ዎጌኬ፤

47 ዎጎ ጎይዖና ቁፄ ማዔሢና ሻቲ ማዔ ባኮናኮ ባኦኮይዳ ዓኦ ዲሙሞ ዔራራ ሙዖ ባኮና ሙዕታ ባኮናኮ ባኦካ ዓኦ ዲሙሞ ኮሺ ዔራዋቲ» ጌዔ።

11:44 ሌዊ. ዓኬ 19:2፤ 1ጴፂ. 1:16።

12

ላኦሊ ሾዔሰካፓ ኩንሣ ዳምቤ

1 ናንጊና ናንጋ ጎዳ ሙሴም፡-

2 « ዒሰራዔኤሌ ዓሶም ሂዚ ጌዔ፤ ፔቴ ላኦሊ ጎጶዲ ዓተንቄ ናይ ሾዔያ ማዔቴ ላኦሊኮ ሻቱሞ ጶዳዛ ማዲንታ ጎይፆ ላንካይ ኬሊ ሄላንዳኣና ዒዛ ዒኢቲያ ማዓንዳኔ።

3 ሳላሳ ኬሎና ናፆኮ ዓተንቶ ቤርቶ ቲቃንዳያ ኮይሳኔ።

4 ዩካፓ ዑፃ ዒዘኮ ፃኣዳንዳ፣ ሃይሢታሚ ሃይሃ ኬሊ ሄላንዳኣና ፆኦሲም ዲማጄ ዓይጎ ባኣዚያ ዒዛ ካኣማኒ ኮይሱሞሴ፤ ሃሣ ዒዘኮ ማሰቲፆ ኬላ ጋፓንዳያ ሄላንዳኣና ታኣም ዲማጄ ማኣሮ ጌሎፓ።»

5 «ዩያጉዲ ሃሣ ፔቴ ላኦሊ ዉዱሮ ናይ ሾዔቴ ላኦሊኮ ሻቱማ ጶዳኣና ማዲንታ ጎይፆ ታጶ ፆይዶ ኬሊ ሄላንዳኣና ዒዛ ዒኢቲያ ማፆንጎ፤ ዩካፓ ዑፃ ዒዘኮ ፃኣዲ፣ ማሰቲፆ ጋፓንዳኣና ላሂታሚ ላሆ ኬሊ ዴፆንጎ።»

6 «ዒዘኮ ማሰቲፆ ኬላ ጋፔሰካፓ ዓተንቄ ናይ ማዔቴያ ዉዱሮ ናይ ዛላ ሚቹ ዒንጎ ዒንጊሢ ማዓንዳ፣ ፔቴ ለዔ ማዔ ማራናይና ጎሞ ጌኤሽፆ ዛሎ ማዓ ፔቴ ዶኦሌ ማዔቴያ ፔቴ ኪሬ ናይ ዓፒሎና ማዢንቲ፣ ፆኦሲ ዴሮና ካኣማ ማኣሮ ካሮ ዔኪ ሙኪ ዒኢካ ማዳ ቄኤሳሢም ዒዛ ዒንጎንጎ።

7 ቄኤሳሢያ ዒዛ ዒንጌ ባኮ ዔኪ ናንጊና ናንጋ ጎዳ ቤርቶ ሸኢሾንጎ፤ ዩካፓ ዒዘኮ ሱጉፃ ሾኦቲሢሮ ዒዛ ዒኢቲ ዒኢቲፆ ጋፔሞ ዒዘ ሻቲንቄሲፆ ዳምባ ያዲዲ ኩማንዳኔ፤ ዒዛ ጌኤሽኬያ ማዓንዳኔ፤ ዩይ፡- ላኦሊ ሾዔሰካፓ ማዲ ኩንሣ ዳምቤ ማዓንዳኔ።

8 «ላኦሊ ማራናይ ዔኪ ሙካኒ ዳንዳዒባኣያ ማዔቴ ላምፆ ዶኦሌታቲያ ኪሬ ዔኪ ሙኮንጎ፤ ዔያቶይዳፓ ፔቴማ ሚቹ ዒንጎ ዒንጊሢ ማሂ ጊንሣ ዓቲማ ጎሚ ጌኤሻኒ ዒንጎ ዒንጊሢ ማሂ ዒንጎንጎ፤ ዩያይዲ ቄኤሳሢ ዒዘኮ ዒኢቲፆ ጋፔሲ፡ ዒዛ ሻቲንቃንዳ ዳምቦ ኩንሣንጎ፤ ዩካፓ ዒዛ ፆጎ ጎይፆና ዳምቦ ካፒ ኩንሢ ጌኤሽኬያ ማዓንዳኔ» ጌዔኔ።

13

ዓሲኮ ዑሰካ ኬሰካ ዶርፆ ዛላ ኬኤዚንቲ ዳምቤ

1 ናንጊና ናንጋ ጎዳ ሙሴና ዓኣሮኔናም፡-

12:3 ማዢ. ማፃ 17:12፤ ሉቃ. 2:21። 12:7 ሉቃ. 2:24።

2 «ዳይጎ ዓሲያ ማገገም ፔኤኮ ዑፃ ዲንጫ ኬሰኬቴ፣ ቃፃ ዓርቁቴ፤ ሃሣ ዑሰካ ኬሰካ ደርፆ ማዒ ማዒ ዴንዳ ዒላንታ ጴዴቴ ዓኣርኔ ፃጺ ማዒ፣ ቁኤሶ ኮራ ዓሳ ዒዛ ዔኪ ሙኮንጎ።

3 ዩካፓ ቁኤሳሣ ዬያ ዓሣኮ ዑፃ ዓኣ ኪያ ዛገ፣ ዬያ ኪያይዳ ዓኣ ጋፓና ቦኦራያ ማዒቴ፤ ሃሣ ኪያኮ ኮይሎይዳ ዓኣ ዑፃ ሃንጎ ዑፃፓ ቁልፒ ዔታዳያ ማዒቴ፣ ዬይ ዓሲዳፓ ዓሲ ዓርቃኒ ዳንዳዓ ዑሰካ ኬሰካ ደርፆ ማዒሣረ ዓሣ ካኣኸ ዳምቦና ዒኣቴያ ማዒሣ ዔርዘንጎ።

4 ጋዓንቴ ኪያ ኮይላ ዓኣ ዑያይዳፓ ቁልፒ ዔታዳ ዴዳዎያ ማዒቴ፤ ሃሣ ጋፓና ቦኦራዎያ ማዒቴ ቁኤሳሣ ዬያ ዓሣ ላንካይ ኬሊ ሄላንዳኣና ፔቴ ጋርሲዳ ዲማሲ ጌሣ ዛጎንጎ።

5 ዩካፓ ቁኤሳሣ ላንካሳ ኬሎና ዓሣ ላሚ ዛጎንጎ፤ ዒ ዛጋ ዎደና ኪያ ዲማዴ ባኣዚ ባኣያ ማዒቴ፣ ሃሣ ላንካይ ኬሊ ዲማሲ ዴይሃንጎ።

6 ሃሣ ቁኤሳሣ ላንካሳ ኬሎና ዓሣ ዛጎንጎ፤ ዒዚ ዛጋ ዎደና ኪያ ዳልገይይዳፓ ሹሊ ጴዴቴ ኪያ ቃፃ ማዒሣ ኬኤዚ ዬይ ዓሣ ዳምቦ ጎይያና ጌኤሽ ማዒሣ ዔርዘንጎ፤ ዬይ ዓሣ ዎጎ ጎይያና ጌኤሽኪያ ዔርዘን ማኣዓሣ ፔኤኮ ማሰኮንጎ።

7 ጋዓንቴ ቁኤሳሣ ዬያ ዓሣ ዛገ ጌኤሽኬ ጌዔሰካፓ ኪያ ዳልገ ዳልገ ዴንዳያ ማዒቴ ዓሣ ላሚ ቁኤሳሣ ቤርቶ ሽኢኮንጎ፤

8 ዩካፓ ቁኤሳሣ ዒዛ ላሚ ዛጎንጎ፤ ዒ ዛጋንቴ ኪያ ዳልገ ዴንዳያ ማዒቴ ዬይ ዑፃኣ ኬሰካ ደርዓሣ ማዒሣረ ዳምቦና ዒኣቴያ ማዒሣ ዔርዘንጎ።

9 «ዳይጎ ዓሲያ ማገገም ዓሲፓ ዓሲ ዓርቃኒ ዳንዳዓ፣ ዑሰካ ኬሰካ ደርዓ ዓርቁቴ ዬያ ዓዲንቴ ዓሣ ዓሳ ቁኤሳሣ ኮራ ዔኪ ዬያንጎ፤

10 ዩካፓ ቁኤሳሣ ዬያ ዓሣ ዛጎንጎ፤ ዑፃ ኬሰኬ ባካ ዑርታንዳ ባኣዚጉዲ ዴዒ፣ ጌዳ ዓኣ ጋፓና ቦኦሪሻ ኪሣ ማዒ ጴዴቴ፣

11 ዬይ ዑሰካ ኬሰካ ደዲ ደርፆ ማዒሣረ ቁኤሳሣ ዬይ ሃርጌ ዓሣ ዒኣቴያ ማዒሣ ዔርዘንጎ፤ ዬያኮ ዒኣቴያ ፔጌና ዔርቱሣረ ዬያጉዴ ዓሲ ጋርሲዳ ዲማሲ ዛጎንደያ ኮይሱዋሴ።

12 ዑፃ ኬሰካ ደርዓሣ ዓሣኮ ቶኮ ፀንጋፓ ዴንዳ ቶኦኮ ሄላንዳኣና ባይዚ ኬሰኬያ ማዒሣ ዔርቱ፣

13 ቁኤሳሣ ላሚ ዒዛ ዛጎንጎ፤ ዓሣኮ ዑፃ ቢያይዳ ኬሰኪ ዓኣያ ማዒ ጴዴቴ ዬይ ዓሣ ዎጎ ጎይያና ጌኤሽኪያ ማዒሣ ዔርዘንጎ፤ ዑፃ ዒዛኮ ጉቤና ቦኦራሣረ ዳምቦ ጎይያና ጌኤሽኪያ ማዒ።

14 ጋዓንቴ ላሚ ሃሣ ኔጉዎያ ኪያ ጌኤሽጉዲ ዴይ ጴዴያ ማዒቴ ዳምቦ ጎይያና ዒ ዒኣቴያ ማዒ።

15 ይያር ቁኔሳሣ ገንሣ ዛገ፡ ገኢሺጉዲ ዴዒ ዓኣ ከሣ ዴንቁቴ ዬይ ዓሣ ዳምቦ ጎይያና ዒኢቲያ ማዕዒሣ ዔርዘንጎ፤ ዓይጎር ጌዔቴ ዬይ ከፃ ዑፃ ከሰካ ዶርዓሣ ማዕዒሣር ዬይ ዓሣ ዒኢቲያኩ።

16 ከፃ ፖዓዖ ላሚ ገንሣ ቦኦሪ ናኩቴ ቁኔሳሣ ኮይላ ዓኣዶንጎ፤

17 ቁኔሳሣ ላሚ ዒዛ ዛገ ከፃ ሹሊ ቦኦሪያ ማዒ ዴዴቴ ዬይ ዓሣ ዳምቦ ጎይያና ጌኤሽኬያ ማዕዒሣር ዓሣ ጌኤሽ ማዕዒሣ ዔርዘንጎ።

18 «ፔቴ ዓሲኮ ዲንጫ ከሣ ዓኣፖ ፓዲ ዲኢዳዴ ቤሲ ዓኣቶ፡

19 ዳካ ጌዔሰካፓ ዲኢዶ ቤዘይዳ ገኢሺጉዴ ባኣዚ ዴዒ፤ ሃሣ ዑርታኒ ጋዓ ከሣ ከሰከ ዴዴቴ ዬይ ዓሣ ቁኔሳሣ ኮራ ዓኣዶንጎ፤

20 ቁኔሳሣ ዒዛ ዛገ ከፃ ዓኣ ቤዛ ማሌ ዑያይዳፓ ቁልፒ ዔታዲ ዴዴቴ፤ ሃሣ ገዳ ዓኣ ጋፓናኣ ቦኦሪያ ማዕቴ፡ ዓሣ ዒኢቲያ ማዕዒሣ ዔርዘንጎ፤ ዓይጎር ጌዔቴ ዬይ ዲንጫ ከያና ማዒ ዓርቁ ዑሰካ ከሰካ ዶርዓ ማዕዒሣርኩ።

21 ቁኔሳሣ ዛጋንቴ ዒኢካ ዓኣ ጋፓና ቦኦሪያ፤ ሃሣ ማሌ ዑያይዳፓ ዲማዲ ቁልፒ ዔታዲያ፤ ሹላኒ ጋዓና ማዕቴ ዓሣ ላንካይ ከሊ ዲማሲ ጌሣ ዛጎንጎ።

22 ከፃ ዓኣ ቤዛፓ ዳልገ ዳልገ ዓኣዳያ ማዕቴ ዬይ ዓሣ ዑፃ ከሰካ ዶርዓሣና ዓዲንቴያ ማዕዒሣር ዒኢቲያታሣ ዔርዘንጎ።

23 ጋዓንቴ ዲማዲ ዔርቲያ፤ ሃሣ ዑያይዳ ዳልገ ዳልገ ዴንዳዎና ማዕቴ ዲንጫ ከያኮ ዲኢዲ ማዕዒሣር ዎጎ ጎይያና ጌኤሽ ማዒያ ዓሣኮ ዔርዘንጎ።

24 «ፔቴ ዓሲኮ ዑሣ ታሚ ሙዔም ታማ ሙዔ ቤዛ ቦኦሪ፤ ሃሣ ገንሣ ዖዳልቃያ ማዒ ዴዴቴ፡

25 ቁኔሳሣ ዬያ ዛጎንጎ፤ ከፃ ዓኣ ቤዘይዳ ዓኣ ጋፓና ቦኦሪያ ማዕቴ፡ ሃሣ ሃንጎ ዑያይዳፓ ቁልፒ ዔታዲያ ማዕቴ ታማ ሙዔሣና ማዒ ዓርቁ፡ ዑፃ ከሰካ ዶርዓሣ ማዕዒሣር ዬይ ዓሣ ዒኢቲያ ማዕዒሣ ዔርዘንጎ።

26 ጋዓንቴ ዬያ ቤዘይዳ ከሰካ ጋፓና ቦኦሪያ ማዕቴ ሃሣ ዑፃ ማሌ ዑያይዳፓ ቁልፒ ዔታዲያ፤ ጉሪ ዑፃ ላኣሚንቴያታቴ ቁኔሳሣ ዬያ ዓሣ ላንካይ ከሊ ጋርይዳ ዲማሲ ጌሣ ዛጎንጎ።

27 ዬካፓ ላንካሳ ከሎና ቁኔሳሣ ላሚ ዓሣ ዛጎንጎ፤ ዒዛ ዛጋንቴ ከፃ ዳልገ ዴንዳያ ማዒ ዴዴቴ ዑፃ ከሰካ ዶርዓሣ ማዕዒሣር ዬይ ዓሣ ዒኢቲያ ማዕዒሣ ዔርዘንጎ።

28 ጋዓንቴ ከፃ ዓኣ ቤዛፓ ዲማዲያ ማዒ፡ ጉሪ ዑፃ ላኣሚንቴያታቴ ዑፃ ከሰካ ዶርዓሣቲያንቴ ታማ ሚቹ ዲኢዶ ማዕዒሣር ዬይ ዓሣ ዳምቦ ጎይያና ጌኤሽ ማዕዒሣ ዔርዘንጎ።

29 «ፔቴ ዓቲንቄኮ ማዕቴያ ላኣሊኮ ቶኦካ ማያም ጋጋጫ ከህ ኬሰኩቴ።

30 ቄኤሳህ ዬያ ኪያ ዛጎንጎ፤ ዬይ ቤዛ ኮይላ ዓኣ ዑያይዳፓ ቁልፒ ዔታዳያ ማዕቴ፤ ሃሃ ዒኢካ ዓኣ ጋፓና ጉኡያያ ማዒ ጋላፔቴ ዑያ ኬሰካ ደርዓህ ማዕህረ ዬይ ዓህ ዒኢቴያ ማዕህ ዔርዘንጎ።

31 ጋዓንቴ ቄኤሳህ ዛጋ ዎዶና ኪያ ኮይላ ዓኣ ዑያይዳፓ ቁልፒ ዔታዳዎያ ማዕቴ፤ ሃሃ ዒኢካ ዓኣ ጋፓና ፒዜ ጋፓኔ ማዒባኣቴ ዬያ ዓህ ለንካይ ኬሊ ዲማሲ ጌህ ዛጎንጎ።

32 ዬካፓ ለንካሳ ኬሎና ለሚ ቄኤሳህ ዛጋንቴ ኪያ ዳልጉዎያ ማዒ፤ ጋፓና ጋላፑዎያ ማዕቴ፤ ሃሃ ሜሌ ዑያይዳፓ ቁልፒ ዔታዳዎያ ማዕቴ።

33 ኪያ ዓኣ ቤዛ ሃሻያ ሃንጎ ጋፓኖ ቢያ ሜኤዳዛ፤ ቄኤሳህ ሃሃ ለንካይ ኬሊ ሄላንዳኣና ዒዛ ዲማሲ ጌህ ዛጎንጎ።

34 ለንካሳ ኬሎና ለሚ ሃሃ ቄኤሳህ ዬያ ኪያ ዛጎንጎ፤ ዒ ዛጋንቴ ኪያ ዳልጉዎያ ማዕቴ፤ ሃሃ ኪያ ዓኣ ቤዛ ሜሌ ቤዛፓ ቁልፒ ዔታዳብኣያ ማዕቴ ዬይ ዓህ ዳምቦ ጎይያና ጌኤሺ ማዕህ ዔርዘንጎ፤ ዬካፓ ዓህ ፔኤኮ ዓፒሎ ማሰኪ ጌኤሺ ማያንጎ።

35 ጋዓንቴ ጌኤሺ ማዒያ ኬኤዚንቴሰካፓ ኪያ ዳልጊ ዳልጊ ዓኣዳያ ማዕቴ።

36 ቄኤሳህ ለሚ ዒዛ ዛጎንጎ፤ ዒዛ ዛጋንቴ ኪያ ጎኔ ዳልጋያ ማዕቴ ጋላፒ ጋፓኔ ዓኣቴያ ባኣቴያ ዓህ ዒኢቴያ ማዕህ ዔርቴያኬ።

37 ጋዓንቴ ቄኤሳህ ዛጌ ጎይያና ኪያ ሙይ ዳልጉዎያ፤ ሃሃ ቃራ ጋፓኔያ ኬሰኪ ጴዳያ ማዕቴ ኪያ ፓዌያ ማዕህረ ዳምቦ ጎይያና ዓህ ጌኤሺ ማዕህ ዔርዘንጎ።

38 «ፔቴ ዓቲንቄ ማዕቴያ ላኣሊኮ ዑያይዳ ዒላንታ ኬሰኩቴ።

39 ቄኤሳህ ዬያ ዛጎንጎ፤ ዬይ ኬሰካ ባካ ሸኤማዴያ ማዒ ጴዳቴ ሚርጌ ሜታሱዎ ዑህዳ ኬሰካ ዒላንቶታህረ ዬይ ዓህ ዳምቦ ጎይያና ጌኤሺኬ።

40-41 ፔቴ ዓሲኮ ቶኦኪ ዴንካፓታቴያ ባሊታፓ ባሌያ ማዕቴ ዬይ ባሊያ ዓህ ዒኢቴያ ማሃኒ ዳንዳዑዎሴ።

42 ጋዓንቴ ባሎይዳ ዑርታንዳጉዳ ጊኢሺ ዓኣ ከህ ጴዳቶ ዬይ ዑያ ኬሰካ ደርዓህኬ።

43 ቄኤሳህ ዬያ ዛጌም ዑያ ኬሰካ ደርዓህ ማላ፤ ዑርታንዳጉዳ ጊኢሺ ዓኣ ከህ ማዒ ጴዳቴ።

44 ዬይ ዓህ ዒኢቴያ ማዕህ ዔርዘንጎ፤ ዬያ ባሎና ማዒ ዓርቄ ዓሲፓ ዓሲ ዓርቃኒ ዳንዳዳ ዑያ ኬሰካ ደርዓህኬ።

45 «ዩያጉዴ ዑፃ ኬሰካ ዶርዓሢ ዓርቄ ዓሲ ቱርጨዴ ማኣዖ ማይንቶንጎ፤ ቶኦኮዋ ፒዖፓ፤ ሃሣ ሙሱር ካንቄ ዓኣቺ ታኣኒ ዒኢቲያኬ! ዒኢቲያኬ!» ጌይ ጌይ ዒላቶንጎ።

46 ዩይ ዓሢ ዶርዓሢ ፖዓንዳያ ሄላንዳኣና ዒኢቲያ ማዓሢር ዓሲዳፓ ዲማዲ፣ ዓሲ ናንጉዋ ቤሰካ ፔኤኮ ዴዖንጎ።»

ማኣዖይዳ ኬሰኪ ጴዳ ቡኡዒሢ ዛላ

47 «ቡኡዒ ባኣዚ ማራይ ጋፓኔና ማዕቴያ ሱኡፔና ኮሺንቴ ዓፒላይዳ ጴዴቴ።

48 ዶርዘ ዲዒ ማኣዖይዳታቴያ ኩቻ ማዦና ማኣዖኮ ሻላሢዳ ማዕቴያ ቃጨኖይዳ፤ ዩያጉዲ ሃሣ ሱኡፔናኣ ማዖም ዒልዒና ኮሺንቴ ማኣዖይዳ ቡኡዒፃ ጴዴቴ።

49 ማኣዓሢኮ ዑፃ ጴዴ ቡኡዒፃ ጮልዔ፤ ሃንጎ ዘቃያ ማዕቴ ሜሌ ዓፒላ ዓርቃኒ ዳንዳዓያታሢር ቄኤሳሢ ዛጌቴ ቃራኬ።

50 ቄኤሳሢ ዛጌ፣ ዩንሢ ዓፒሎንሢ ላንካይ ኬሊ ሄላንዳኣና ፔቴ ቤሰካ ዲማሲ ጌሢ ዛጎንጎ።

51 ላንካሳ ኬሎና ገንሣ ዒ ዛጋ ዎዶና ቡኡዒፃ ዳልገ ዳልገ ዴንዳያ ማዕቴ ዩያጉዴ ማኣዓሢ ቢያ ዒኢቲያኬ።

52 ዩያጉዴ ማኣዓሢ ታሚና ሚቺንቶንጎ፤ ዩይ ቡኡዒፃ ዳልገ ዳልገ ዴንዳ ቡኡዒሢ ማዕሢር ቄኤሳሢ ሚቺንጎ።

53 «ጋዓንቴ ቄኤሳሢ ዛጋ ዎዶና ቡኡዒፃ ዳልገ ዳልገ ዓኣዳያ ማዒ ጴዲባኣቴ።

54 ዩይ ዓፒላ ማሰኪንቴ ላንካይ ኬሊ ሄላንዳኣና ዲማዲ ጌሢንቴም ዛጎንጎ።

55 ዩካፓ ሃሣ ላሚ ዛጎንጎ፤ ዒ ላሚ ዛጋንቴ ቡኡዒፃ ዳልገ ዴንዲባኣያ ማዕቴያ ማላሢ ቤዘማካ ዓኣቴ ዩይ ዒኢቲያ ማዕሢር ጋርይዳ ማዖም ዙሎይዳ ቡኡዒሢ ጴዳ ማኣዓ ሚቺንቶንጎ።

56 ጋዓንቴ ቄኤሳሢ ላሚ ዛጋ ዎዶና ቡኡዒፃ ባይቃንዳ ጎይሢ ዳኪ ጴዴቴ ቡኡዒፃ ዓኣ ቤዘማ ሌሊ ዓፒሎይዳፓታቴያ ዒልዒ ማኣዖፓ ዳርዘ ኬሶንጎ።

57 ቡኡዒፃ ላሚ ጴዴቶ ጋዓንቴ ዩይ ዳልገ ዳልገ ዓኣዳንዳሢር ዒቦኮ ዓዴ ዩኖ ታሚዳ ሚቺንጎ።

58 ማኣዓሢ ማሰኪንታ ዎዶና ቡኡዒፃ ባይቄቴ ላሚ ሃሣ ማሰኪንጎ፤ ዩካፓ ዳምቦ ጎይዖና ጌኤሽኬያ ማዓንዳኔ» ጌዔ።

59 ዩይ ዓካሪ ኮሺ ሱኡፖና ማዕቴያ ማራይ ጋፓኔና፤ ሃሣ ዒልዒና ኮሻና ዓፒላኮ ቃጨኖይዳ ማዕቴ፣ ሻላሢዳ ጴዳ ቡኡዒሢ ዛላ ዒኢቲያ ሃሣ ሻቲ ማዒፃ ዔር ዎጌኬ።

14

ዑፃ ከሰካ ደርዳራ ጌኤሾ ጎይሢ

1 ናንገና ናንጋ ጎዳ ሙሴም:-

2 «ፔቴ ዓሲ ዑፃ ከሰካ ደርዳራ ፖዔያ ማዔቴ ጌኤሾኪያ
ዛሎ ዒንገንቴ ዳምባ ያዲኬ፤

3 ቁኤሳሢ ዩያ ዓሢ ጉርዶኮ ዙላ ከሲ ዛጎንጎ፤ ዓሢ ደርዳሳካፓ
ፖዔያ ማዔቴ፡፡

4 ዳምቦ ጎይያና ሙይንታኒ ዳንዳዓ ላምዎ ካፒና ዴኤሊ ዚቢቂ
ዳካ ማንሢ ዔኪ፤ ሃሃ ዞቄ ሚዛጲ ፓቴሌና ሂሶጶ ጌይንታ ባኬሎኮ
ዒላሸና ዎላ ዔኪ ዩዓንዳጉዲ ዓይሃንጎ፡፡

5 ዩካፓ ዓሢ ካፖንሢዳፓ ፔቴማ ገኢሲ ዓልቃ ዎኣሢ ዱይ
ጌሢንቲ ዓኣ ታሚ ቦኣቆይዳ ሹካንዳጉዲ ቁኤሳሢ ዓይሃንጎ፤

6 ዓቴ ካፖማ ዴኤሎ ዚቢቆ ሚያ ማቂያማና ዞቄ ሚዛጲ
ፓቴሎሎና ሂሶጶ ዒላዙና ዎላ ዔኪ ቤርታ ሹኪንቴ ሱጉያይዳ
ዓጎንጎ፤

7 ዩያ ሱጉያ፡ ዑፃ ከሰካ ደርዳራዳፓ ጌኤሾካ ዓሢ ዑፃ ላንካይ
ማይንቲ ፑጮንጎ፤ ዩካፓ ዒ ጌኤሾኪያ ማዔያ ዔርዘንጎ፤ ሃሃ
ሽምፖና ዓኣ ካፖማ ባራኒ ዴንዳንዳጉዲ ዙላ ከሲ ሃሾንጎ፡፡

8 ዑፃ ከሰካ ደርዳሳካፓ ጌኤሾካ ዓሢ ማኣዓሢ ፔኤኮ
ማሰኮንጎ፤ ቶኦኮዎ ጉኤሎንጎ፡ ዑያዎ ዎኣሢና ማሰቶንጎ፤ ዩካፓ
ዳምቦ ጎይያና ዒ ጌኤሾኪያ ማዔሢሮ ጉርዶ ጌላኒ ዳንዳዓኔ፤
ጋዓንቴ ዴንዲ ላንካይ ከሊ ሄላንዳኣና ፔ ከኤያ ጌሎዎ ዙላ
ዴያንጎ፡፡

9 ላንካሳ ከሎና ቶኦካኣ፡ ቡኤጫ፡ ሂኢፖ ጋፓና፤ ዩያጉዲ ዑፃ
ዓኣ ጋፓና ቢያ ሜኤዲ ማኣዓሢያ ፔኤኮ ዎኣሢና ማሰኪ ዑያዎ
ፔኤኮ ማሰቶንጎ፤ ዩካፓ ዒ ዳምቦ ጎይያና ጌኤሾኪያ ማዓንዳኔ፡፡

10 «ሳላሳ ከሎና ዔኤቢ ቦሂሳ ባኣዚባኣ፡ ላምዎ ዓዴ ማራናይና
ፔቴ ለዔ ማዔ ዑዞ ማራናይ ዔኪ ሙኮንጎ፤ ዩያና ዎላ ሪሚቶ
ዛይቶና ዲርከንቴ ሃይሃ ኪሎ ማዓንዳ ሺኢቺ ዲኢሊና ዶሎዘኮ
ገዲሚሽ ማዒባኣ ዛይቴና ዔኪ ሙኮንጎ፡፡

11 ቁኤሳሢ፡ ዩይ ዓሢ ዔኪ ሙኬ ባኮንታ ዓሢንታ ዎላ ዓፒሎና
ማዙንቴ፡ ያኦሲ ዴሮና ካኣማ ማኣሮ ካሮ ናንገና ናንጋ ጎዳ ቤርቶ
ዔኪ ሺኢሾንጎ፤

12 ዩካፓ ቁኤሳሢ፡ ላምዎ ዓደ ማራቶ ናኣቶንሢፓ ፔቴማና
ዶሎዘኮ ገዲሚዙ ማዒባኣ ዛይቶና ዔኪ ዳቢንቶኮ ጨጋ ማሂ

14:2 ማቴ. 8:4፤ ማር. 1:44፤ ሉቃ. 5:14፤ 17:14።

ዒንጎ ዒንገይ ማዓንዳጉዲ ሺኢሾንጎ፤ ሃሃ ዬይ ቁኤሳሢ ዛላ ማዓንዳጉዲ ዠፍገ ናንገና ናንጋ ጎዳም ዒንጎንጎ።

13 ጎሞ ጌኤሻኒ ሹኪ ዒንገንታ ቆልማ ሹኪንታ፡ ያኦሲም ዲማጅ ቤዛ ማራዓሢ ሹኪንጎ፤ ዬያ ዒ ማዳሢ ዳቢንቶ ዛሎ ጨጋ ማሂ ዒንጎ ባካ ጎሞ ጌኤሻ ዒንገይጉዲ ቁኤሳሢሮ ማዒ ዒንገንታሢሮኬ፤ ዬይ ማርጌና ያኦሲም ዲማጅያኬ።

14 ቁኤሳሢ ማራናዓሢኮ ሱጉፃፓ ዳካ ዔኪ ጌኤሽኪያይዳ ዓኣ ዓሢኮ ማዛቆ ሞሮ ቤርቶ፡ ማዛቆ ኩጮና ቶኮናኮ ደኦሞ ኬኤሎ ቲሽኮንጎ።

15 ሃሃ ቁኤሳሢ ዛይቶይዳፓ ዳካ ዔኪ ፔኤኮ ሻውሎ ኩጮ ቃኣቆይዳ ሞሆንጎ፤

16 ዬካፓ ሻውሎ ቃኣቃ ዓኣ፡ ዛይቶይዳ ፔኤኮ ማዛቆ ኩጮ ኬኤሎ ዳኪ ዳኪ ናንገና ናንጋ ጎዳ ቤርታ ላንካይ ማይንቲ ዉጹርቆንጎ፤

17 ቃሲ ሃሃ ቃኣቆይዳ ዓኣ ዛይቶፓ ዳካ ዔኪ ጌኤሽኪያይዳ ዓኣ ዓሢኮ ማዛቆ ሞሮ ቤርቶና ማዛቆ ኩጮና ቶኮናኮ ደኦሞ ኬኤሎንሢ ሞንዴ ዳቢንቶ ዛሎ ጨጋ ማሂ ቲሽኮና ሱጉፃኮ ገዳ ቲሽኮንጎ፤

18 ዬካፓ ዒዛኮ ቃኣቃ ዓቲ ዓኣ ዛይቶንሢ ጌኤሽኪያይዳ ዓኣ ዓሢኮ ቶኣካ ሞሆንጎ፤ ዬያይዲ ዓሢ ጌኤሽይ ዳምቦ ናንገና ናንጋ ጎዳ ቤርታ ኩንሆንጎ።

19 «ዬያይዳሰካፓ ቁኤሳሢ ዓሢኮ ጎሞ ጌኤሽይሮ ዒንጎ ዒንገይ ዒንገ ጎሞ ጌኤሽይ ዳምቦ ኩንሆንጎ፤ ሄሊሳዎ ሃሃ ማቺ ዒንጎ ዒንገይ ማዒ ዒንገንቲ ቆልሞ ሹኪንጎ፤

20 ዬያ ሃኣኮ ዒንገይ ማዔ ዒንገይና ሞላ ማቺ ዒንጎ ቤዛ ጌሢ ማቸንጎ፤ ዬያይዲ ጌኤሽይ ዳምቦ ኩንሄም ዬይ ዓሢያ ዳምቦ ጎይያና ጌኤሽኪያ ማዓንዳኔ።

21 «ዓሢ ዬያ ባኮ ቢያ ዔኪ ሙካኑሞ፡ ማንቆ ማዔቲ ፔኤኮ ጌኤሽኪያ ዛሎ ማዓ ፔቲ ዓዴ ማራናይ ሌሊ ዔኪ ሙኮንጎ፤ ዬይ ዳቢንቶ ዛሎ ጨጋ ማሂ ዒንገንታ ዒንገሢ ማዒ ዠፍገ ዒንጎ ዒንገሢ ማዓንዳኔ፤ ሃሃ ዛይቲና ዲርኪንቲ ፔቲ ኪሎ ማዓንዳ ሺኢቺ ዳኢሊ ሃኣኮ ዒንገሢ ማሂ ዔኪ ሙኮንጎ፤ ዬያጉዲ ሃሃ ደሎዘኮ ገዳሚሽ ማዒ ሞዛይቶ ሞኪ ሺኢሾንጎ፤

22 ሃሃ ዒዛም ዳንዳዒንታ ጎይያ ላምዎ ደኦሌ፡ ሃንጎ ላምዎ ኪሬ፤ ፔቲማ ጎሞ ጌኤሻ ዒንገሢ ማሂ ፔቲማ ገንሃ ማቺ ዒንጎ ዒንገሢ ማሂ ዔኪ ሙኮንጎ።

23 ጌኤሽይ ዳምቦ ኩንሆ ሳላሳ ኬሎና ዬንሢ ቢያ ዔኪ ሙኪ ዓፒሎና ማኲንቲ፡ ያኦሲ ዴርና ካኣማ ማኣሮ ካራ ናንገና ናንጋ ጎዳ

ቤርታ ቁኤሳሣም ዲንጎንጎ።

24 ዩካፓ ቁኤሳሣ ዳቢንቶ ዛሎ ጨጋ ማሂ ዲንጎንታ ማራናያና ዛይቶና ዔኪ ዠፍጊ ናንጊና ናንጋ ጎዳም ሸኢሸንጎ።

25 ዩካፓ ዳቢንቶ ዛሎ ጨጋ ማሂ ዲ ዲንጌ ማራዓሢ ሹኮንጎ፤ ዬያ ሱጉያ ዳካ ዔኪ ጌኤሽኪያይዳ ዓአ ዓሢኮ ሚዛቆ ዛሎ ዋዮ ቤርቶ፣ ሚዛቆ ኩጮና ቶኮናኮ ደአም ኬኤሎ ቲሽኮንጎ፤

26 ዬያይዳሰካፓ ቁኤሳሣ ዛይቶይዳፓ ዳካ ፔኤኮ ሻውሎ ኩጮ ቃአቆይዳ ዋሂ ዔኮንጎ፤

27 ዔኬሰካፓ ሚዛቆ ኩጮ ኬኤሎና ዬያ ዛይቶፓ ዔኪ ዔኪ ላንካይ ማይንቲ ናንጊና ናንጋ ጎዳ ቤርታ ዉጡርቆንጎ።

28 ሃሃ ዬያ ዛይቶፓ ዳካ ዔኪ ቤርታ ዲ ሱጉያ ቲሽኬ ቤዞ፤ ጌይያ፡- ዓሢኮ ሚዛቆ ዋዮ ቤርቶና ሚዛቆ ኩጮና ቶኮናኮ ደአም ኬኤሎንሢ ቲሽኮንጎ።

29 ዩካፓ ቁኤሳሣ ፔ ኩጮይዳ ዓቲ ዛይቶ ዓሢኮ ቶአካ ዋሆንጎ፤ ዬያይዳ ዓሢኮ ጎም ጌኤሽያ ዳምቦ ኩንሆንጎ።

30 ዬያይዳሰካፓ ደኣሎንሢፓታቲያ ኪሮንሢፓ ፔቲማ ጎማ ጌኤሽሢ ዛላ ማሂ።

31 ዓቲማ ሚቶ ዲንጎ ዲንጎሢ ማሂ ሃአኮ ዲንጎያና ዋላ ሸኢሸንጎ፤ ዬያይዳ ዓሢኮ ጎም ጌኤሽያ ዳምቦ ኩንሆንጎ፤

32 ዑያይዳ ኬሰካ ደርዓ ዓአ ዓሲ ዳምቦ ጎይያና ጌኤሽኪያር ዓይሢንታ ባኮ ማንቆ ማዒ ባሽንታያታቲ ማዲንታንዳ ዋጋ ያዲኬ» ጌዔኔ።

ማአሪዳ ኬሰካ ቡኡዒሢ ዛላ

33 ናንጊና ናንጋ ጎዳ ሙሴና ዓአሮኔናም፡-

34 «ዲንሢር ማሂታ ዲንሢም ዲንጋንዳ፣ ካአናኔ ዓጮ ዲንሢ ጌሌ ዋደና ፔቲ ዓሲኮ ዋርቆ ማአሮ ታአኒ ቡኡዒሴያ ማዔቲ።

35 ማአሮ ዓዴ ቁኤሳሣ ኮይላ ዓአዲ ታ ማአሮይዳ ቡኡዒሢጉዴ ባአዚ ታ ዴንቄኔ» ጌይ ኬኤዞንጎ።

36 ዩካፓ ቁኤሳሣ ዴንዲ ቡኡዒያ ዛጊ ዔራንዳሢኮ ቤርታዲ ማአራ ዓአ ሚሆ ቢያ ዓሢ ኬሰንዳጉዲ ኬኤዞንጎ፤ ያዲ ማዒባአያታቲ ጋራ ዓአ ሚሃ ቢያ ዲኢታንዳኔ፤ ዬያይዳሰካፓ ጋር ጌሊ።

37 ቡኡዒያ ዓይጎታቲያ ዛጎንጎ፤ ዲዚ ዛጋንቲ ኩጮ ደይሳኒ ጋዓ፣ ጮልዔ፤ ሃሃ ጊንሢ ዞቃንዳጉዴ ቡኡዒሢ ዓርቂ ጴዴቲ።

38 ዬኖ ኬኤዴሎፓ ኬሰኪ ላንካይ ኬሊ ሄላንዳና ዬይ ዋዲንቲ ዴዓንዳጉዲ ማሆንጎ።

39 ለንካሳ ኬሎና ቁኔሳሣ ገንሣ ዛጎንጎ፤ ዒ ዛጋንቴ ቡኡዒፃ ኮጮይዳ ዳልገ ዳልገ ዓኣዳፃ ማዔቴ።

40 ቡኡዒፃና ዓዲንቴ ሹጮንሣ ቦኦኪንቴ ዔውቴ ጉርዶኮ ዙላ። ካንቶይዳ ኬኤሪንታንዳጉዲ ዓይሦንጎ።

41 ዬካፓ ኮጮኮ ጋሮ ዛላ ቢያ ዓርሲንቴም ዓርሲንቴ ባካ ቢያ ጉርዶ ዙላ ዒኢቴ ቤዛ ኬኤሪንታንዳጉዲ ማሦንጎ፤

42 ዬያይዳሰካፓ ቦኦኪንቴ ዔውቴ ሹጮንሣ ቤዛ ማሌ ሹቸ ገሣንቴ ማሌ ደቃሌና ዲይ ዓይሣንቶንጎ።

43 «ሹጮ ከሰኪ፣ ኮጮኦ ማሌ ደቃሌና ዲይንቴሰካፓ ቡኡዒፃ ማላቴላ ላሚ ጴዳፃ ማዔቴ።

44 ቁኔሳሣ ዴንዲ ዛጋንዳፃ ኮይሳኔ፤ ዒ ዛጋንቴ ቡኡዒፃ ጋሮይዳ ዳልገ ዳልገ ዴዴንዳ ማዒ ጴዳቴ ዬና ማኣሪላ ዒኢቴያኬ።

45 ዬያሮ ዬና ማኣራ ሻሂንታንዳፃ ኮይሳኔ፤ ሹጮንታ ሚፆንታ ማኤቸና ባካኣ ቢያ ጉርዶኮ ዙላ ዒኢቴ ቤዛ ኬኤሪንቶንጎ።

46 ዬና ማኣሪላ ዎዲንቴ ዓኣንቴ ዓይጎ ዓሲያ ማፆም ዒኢካ ጌሌቴ ዴንዲ ሳዓ ዓማንዳፃ ሂላንዳኣና ዒኢቴያ ማዓንዳኔ፤

47 ዬኖ ማኣሪሎይዳ ጌሊ ላሂ ዓሲ ዓኣቴ፣ ሃሣ ሙኡዚ ዴዒ ሙዔ ዓሲ ዓኣቴ ማኣዓሣ ፔኤኮ ማሰኮንጎ።

48 «ጋዓንቴ ማኣራ ዲይንቴ ኮሽኬሰካፓ ቁኔሳሣ ሙኪ ዛጋ ዎዶና ቡኡዒፃ ዳልገ ዴንዳፃ ማዒባኣቴ ዬኖ ማኣሪሎ ቡኡዒፃ ሃሹጭ ዳምቦ ጎይፆና ጌኤሺ ማዔሣ ዔርዞንጎ፤

49 ዬኖ ማኣሮ ጌኤሻኒ ላምፆ ካፒ፣ ዳካ ዴኤሊ ዚቢቁ ማንሥሣ፣ ዘቁ ሚዛጶ ፓቲሎና ሂሶጶ ዒላሺያኣ ዔኪ ሺኢኮንጎ።

50 ካፖይዳፓ ፔቴማ ገኢሲ ዎኣሣ ዓልቃ ቤሰካፓ ዴፆና ዎኣሣ ዓኣ ታሚ ቦኦቆይዳ ሹኮንጎ፤

51 ዬካፓ ዴኤሎ ዚቢቆ ሚፆና ሂሶጶ ዒላዞና ሃሣ ሚዛጶ ዘቁ ፓቲሎና ሹምፖና ዓኣ ካፖማንታ ዎኣፆና ሱጉፆናይዳ ዓገጋፓ ማኣሮ ላንካይ ማይንቴ ፑጮንጎ።

52 ዬያይዲ ቁኔሳሣ ዬኖ ማኣሮ ካፖ ሱጉፆና ጌኤዞ ዎኣፆና ሹምፖና ዓኣ ካፖማና፤ ሃሣ ዴኤሎ ዚቢቆ ሚፆና ሂሶጶ ዒላዞና ዘቁ ሚዛጶ ፓቲሎናኣ ጌኤሻንጎ።

53 ዬካፓ ሹምፖና ዓኣ ካፖማ ጉርዶኮ ዙሎ ኬሲ ባራኒ ዴንዳንዳጉዲ ሃሹንጎ፤ ዬያይዲ ቡኡዒፃ ጴዳ ማኣሪሎ ጌኤሺፆ ዳምባ ኩማኔ፤ ማኣራኣ ዳምቦ ጎይፆና ጌኤሺኬያ ማዓንዳኔ።

54-56 «ዬይ ቢያ ዑሰካ ኬሰካ ዶርዓ፣ ቃፃ፣ ዑሰካ ኪፃ ባኣዚ፣ ዒላንታ፤ ዬያጉዲ ሃሣ ማኣፆና ማኣሪናይዳ ኬሰኪ ጴዳ ቡኡዒሣ ዓርቁ ዎዶና ጌኤሺፆሮ ማዲ ኩንሦ ዎጌኬ።

57 ፔቴ ባአዚ ጌኤሺ፤ ሃሣ ዒኢቴያ ማዒያ ዬያ ዎጎና ደመዲ ዒርታኔ» ጌዔኔ።

15

ዓሲኮ ዑሰካፓ ሾኦቲ ዓሲ ዒኢሳ ባአዚ

1 ናንገና ናንጋ ጎዳ ሙሴና ዓኣርኔናም፡-

2 «ዒሰራዔኤሌ ዴርም ሂዚ ጌዔ፤ ዓይጎ ዓሲኮዎ ማፆም ሃርጌ ዛላና ዓቲጎቴይዳፓ ዓልቃ ባአዚ ከሰከቴ ዬይ ዓሢ ዒኢቴያከ፤

3 ዓሢኮ ዑፆፓ ዓልቃ ባካ ዓልቃ ጎይሣታቴያ ሃሺቴያ ዬይ ዓሢ ዒኢቴያከ፤ ዬይ ዓልቃ ባካ ዒኢሳያ ማዓሢ ያዲዲከ፡-

4 ዬይ ዓሢ ላሃ ቤዛ ቢያ ዒኢቴያ ማዓንዳኔ፤ ሃሣ ዴዔ ባካኣ ቢያ ዒኢቴያ ማዓንዳኔ።

5 ዒዚ ላሃ ሸኣሎ ካኣሜ ዓሲ ዓኣቴ፡

6 ሃሣ ዒ ዴዔ ባአዚ ቢያይዳ ዴዓ ዓሲ ቢያ ማኣዓሢ ፔኤኮ ማሰኪ ዑፆዎ ማሰቶንጎ፤ ማዔቴያ ዴንዲ ሳዓ ዓማንዳያ ሄላንዳኣና ዒኢቴያ ማዓንዳኔ።

7 ዬዮ ዓልቃ ባኮና ዓኣ ዓሢ ካኣማ ዓሲ ቢያ ማኣዓሢ ፔኤኮ ማሰኪ ዑፆዎ ማሰቶንጎ፤ ማዔቴያ ዴንዲ ሳዓ ዓማንዳያ ሄላንዳኣና ዒኢቴያ ማዓንዳኔ።

8 ዬይ ሃርጋ ዓሢ ጌኤሺ ማዔ ዓሲ ዑሰካ ጨቺ ጨቴያ ማዔቴ ጨቴጎቴ ዓሢ ማኣዓሢ ፔኤኮ ማሰኪ፤ ዑፆዎ ማሰቶንጎ፤ ማዔቴያ ዴንዲ ሳዓ ዓማንዳያ ሄላንዳኣና ዒኢቴያ ማዓንዳኔ።

9 ዬይ ሃርጋ ዓሢ፡- ቶጋኣና ዴዔ ኮኦራሢና ያይቶና ቢያ ዒኢቴያከ፤

10 ሃሣ ዒ ዴዔ ባኮ ቢያ ካኣማ ዓሲ፤ ዬያጉዲ ሃሣ ዬያ ባኮ ዔኪ ሸኣሻ ዓሲ ማኣዓሢ ፔኤኮ ማሰኪ ዑፆዎ ማሰቶንጎ፤ ማዔቴያ ዴንዲ ሳዓ ዓማንዳያ ሄላንዳኣና ዒኢቴያ ዒ ማዓንዳኔ።

11 ዬይ ሃርጋ ዓሢ ኩቺ ማሰቱዎፖ ፔቴ ዓሲ ካኣሜቴ ዬይ ካኣሚጎቴ ዓሢ ማኣዓሢ ፔኤኮ ማሰኪ ዑፆዎ ማሰቶንጎ፤ ማዔቴያ ዴንዲ ሳዓ ዓማንዳያ ሄላንዳኣና ዒኢቴያ ማዓንዳኔ።

12 ዬይ ሃርጎና ዓኣ ዓሢ ካኣሜ ዓይጎ ባአዚያ ማፆም ዓጪና ማዦና ሜሄ ቢያ ሃሃይቆንጎ፤ ሚሢና ኮሺንቴ ሜሄ ማዔቴ ጋዓንቴ ዎኣሢና ማሰኪንቶንጎ።»

13 «ዬይ ሃርጋ ዓሢ ዬዮ ዓልቁሳ ሃርጌሎይዳፓ ዳቄ ዎዶና ዎጎ ጎይፆ ጌኤሺኬያ ማዓኒ ላንካይ ኬሊ ሄላንዳኣና ዴፆንጎ፤ ሃሣ ማኣዓሢያ ፔኤኮ ማሰኪ ዑፆዎ ጌኤሺ ዎኣሢና ማሰኮንጎ፤ ዬካፓ ዒ ደምቦ ጎይፆና ጌኤሺኬያ ማዓንዳኔ።

14 ሳላሳ ከሎና ለምን ደኦሌ ሃንጎ ለምን ከሬ ዓፒሎና ማዢንቴ፣
ያኦሲ ዳሮና ካኦማ ማኦሮ ካሮ ዔኪ ሙኪ ናንጊና ናንጋ ጎዳ ቤርታ
ቄኤሳሢም ዒንጎንጎ።

15 ዬያይዴሰካፓ ቄኤሳሢ፣ ፔቴማ ጎሜ ጌኤሻኒ ዒንጎ ዒንጊሢ
ማሂ ዓቴማ ጊንሣ ሚቺ ዒንጎ ዒንጊሢ ማሂ ሺኢሾንጎ፤ ዬያይዲ
ቄኤሳሢ ዓሢ ጌኤሺያ ዳምቦ ናንጊና ናንጋ ጎዳ ቤርታ ኩንሦንጎ።»

16 «ዓይጎ ዓሲኮቀ ማምም ዓሲ ሾይዣ ዜርፃ ዑፃፓ ኬሰኪ
ለኣለንቴያ ማዔቴ ዬይ ዓሢ ዑፃ ቢያ ቀኣሢና ማሰቶንጎ፤ ማዔቴያ
ዒ ሳዓ ዓማንዳያ ሄላንዳኦና ዒኢቴያ ማዓንዳ።።

17 ዬይ ዜርፃ ሄሌ፣ ዓይጎ ማኦፖ ማምም ዜዲ ቀኣሢና
ማሰከንቶንጎ፤ ማዔቴያ ዬይ ባካ ሳዓ ዴንዲ ዓማንዳያ ሄላንዳኦና
ዒኢቴያ ማዓንዳ።።

18 ፔቴ ዓሲ ላኣለና ላሄቴ ለምንሢ ቢያ ዑፃ ቀኣሢና ማሰቶንጎ፤
ማዔቴያ ዴንዲ ሳዓ ዓማንዳኦና ዒኢቴያ ዔያታ ማዒ ዴዓንዳ።።

19 «ለኣሊኮ ሻቱሞ ሙኪ ጴዴ ዎዶና ላንካይ ኬሊ ሄላንዳኦና
ዒ ዜ ዒኢቴያ ማምንጎ፤ ዬኖ ዓሴሎ ካኦማ ዓይጎ ዓሲያ ዴንዲ ሳዓ
ዓማንዳኦና ዒኢቴያ ማዓንዳ።።

20 ዒዚኮ ሻቱሙ ጴዴ ዎዶና ዒ ዜ ዴዓ ባኮና ላሃ ባኮና ቢያ
ዒኢቴያ ማዓንዳ።።

21-23 ዒ ዜ ላሃ ሻኦሎ ማዔቴያ ዒ ዜ ዴዓ ባኮ ካኦሜ ዓሲ ቢያ
ማኦሣ ፔኤኮ ማሰኪ ዑፃዎ ፔኤኮ ማሰቶንጎ፤ ማዔቴያ ዴንዲ ሳዓ
ዓማንዳያ ሄላንዳኦና ዒኢቴያ ዒ ዜ ማዓንዳ።።

24 ሻቱማ ዒዚኮ ሙኪ ዓኣንቴ ዒዚና ዎላ ላሄ ዓቴንቄ ዓኣቴ ዬይ
ዓሢ ላንካይ ኬሊ ሄላንዳኦና ዒኢቴያ ማዓንዳ።፤ ዒዚ ላሃ ሻኦላኣ
ዒኢቴያ ማዓንዳ።።

25 «ፔቴ ላኣሊኮ ሻቱሞ ማዒ ሾኦታ ኬላፓ ዑሣ ዓኣዲ ሾኦታ
ሱጉሢ ጴዴቴ ዬይ ጋፓንዳያ ሄላንዳኦና ሻቱማ ጴዳኦና ማዓሢጉዲ
ዒኢቴያ ዒ ዜ ማዓንዳ።።

26 ዬማና ዒ ዜ ላሃ ሻኦሎ ማዔታቴያ ዴዓ ባካ ቢያ ዒኢቴያ
ማዓንዳ።፤

27 ዬንሢ ባኮንሢያ ካኦማ ዓሲ ቢያ ዒኢቴያ ማዓሢሮ ፔኤኮ
ማኦሣ ማሰኪ ዑፃዎ ማሰቶንጎ፤ ማዔቴያ ዴንዲ ሳዓ ዓማንዳኦና
ዒኢቴያ ማዓንዳ።።

28 ሻቱማ ዒዚኮ ሙኪያ ሃሺሰካፓ ላንካይ ኬሊ ሄላንዳኦና ዒ ዜ
ዴዓንጎ፤ ዬካፓ ዎጎ ዳምቦ ጎይዖና ዒ ዜ ጌኤሽኬያ ማዓንዳ።።

29 ሳላሳ ከሎና ዒ ዜ ለምን ደኦሌታቴያ ለምን ከሬ ዓፒሎና
ማዢንቴ፣ ያኦሲ ዳሮና ካኦማ ማኦሮ ካሮ ዔኪ ሙኪ ቄኤሳሢም
ዒንጎንጎ።

30 ይካገጥ ቁኔሳህ ፔቴማ ጎሜ ጌኤሻ ዲንገህ ማሂ፡ ዓቴማ ሚቸ ዲንጎ ዲንገህ ማሂ ዲንጎንጎ፤ ዩያይዲ ላኦሎኮ ጌኤሻኪያ ዳምቦ ናንገና ናንጎ ጎዳ ቤርታ ኩንሦንጎ።

31 «ጉርዶ ባኣካ ዔያቶኮ ዓኣ፡ ዓፒሎና ማዢንቴ ያኦሲ ዳርና ካኣማ ማኣር ዔያታ ዲኢሱዋጉዲ፤ ሃሣ ዩያ ዲኢሲ ዔያታ ሃይቁዋጉዲ ዲሰራዔኤሌ ዓሶ ዲኢሳ ባኣዚፓ ዲማሱዋቴ» ጌይ ኬኤዜኔ።

32 ሃርጌ ዛላና ዓቲንቴይዳፓ ዓልቃ ባኣዚ ኬሰካ ዓሲ፤ ሃሣ ጊንሣ ዓሲ ሾይዣ ዜርፃ ላኦሎንቴም ዲኢቴያ ማዔ ዓሲ።

33 ሻቱም ሙኬ ላኦሎ ዛላ፡ ዑሰካፓ ሾኦታ ባኣዚ ኬሰካ ዓቲንቴ ዛላኣ ማፃም ላኦሎ ዛላ፤ ዩያጉዲ ሻቱም ዛላና ዲኢቴ ላኦሎና ላሃ ዓሲም ቢያ ማዲንታ ዋጋ ያዲኬ።

16

ጎሜ ጌኤሻህ ኬሌ

1 ዓኣርኔኮ ላምፃ ዓቲንቴ ናኣቶንህ ያኦሲም ዲማዲባኣ ታም ናንገና ናንጎ ጎዳም ሸኢሻኔ ጌይ ሃይቁሰካፓ ናንገና ናንጎ ጎዳ ሙሴም፡-

2 «ጫኣቁም ሳኣፃኖኮ ጎም ጌኤሻኪያ ዔርዛ ጉኡፖ ዑፃ ሻኣሬና ታኣኒ ፔጋዲ ጴዳንዳሂር ጎኦቦ ዓፒሎ ጊዳና ያኦኪ ዓኣዲ ታኣም ዑሣ ዓኣዳ ዲማዳ ቤዞ ቢያ ኬሊቱዋንቴ ፔቴ ዔርቴ ኬሊና ጌላኒ ኮይሳያታሂ ኔ ጌርሲ ዓኣርኔም ኬኤዜ፤ ዩያ ዲ ማዲባኣቴ ሃይቃንዳኣኬ።

3 ታኣም ዑሣ ዓኣዳ ዲማዳ ቤዞ ጌላኒ ዲ ዳንዳዓሂ ጎም ጌኤሻያም ማዓ ፔቴ ዚያ ጌማይ፤ ሚቸ ዲንጎ ዲንገያም ፔቴ ማራይ ዓዳ ዔኪ ሙኪኬ።

4 «ዒዚ ታኣም ዑሣ ዓኣዳ ዲማዳ ቤዞ ጌላንዳሂኮ ቤርታ ዑያ ፔኤኮ ማሰቲ፡ ሚዛፃ ሱኡፓሂና ኮሺንቴ ቃሚሾ ማኣዲ፡ ቆንፃሂያ ቱኡቶንጎ፤ ሃሣ ሚዛፃ ሱኡፓሂና ኮሺንቴ ቃልሾዋ ቱኪ፤ ጊንሣ ሱኡፓሂና ኮሺንቴ ቶኦካ ማር ባኮዋ ማርንጎ፤

5 «ዩያይዳሰካፓ ዲሰራዔኤሌ ዳራ ጎም ጌኤሻያ ዛሎ ላምፃ ኮላይ፤ ሚቸ ዲንጎ ዲንገሂም ማዓ ፔቴ ዓዳ ማራይ ዔኪ ዲዛም ሙኮንጎ።

6 ይካገጥ ዒዚ ፔ ጎምና ፔ ማኣር ዓሶ ጎም ጌኤሻኒ ፔቴ ዚያ ጌማይ ሚቸ ዲንጎ ዲንገሂ ማሂ ሸኢሻንጎ፤

16:2 ዔ.ብ. 6:19። 16:3 ዔ.ብ. 9:7።

7 ይያይዳሰካ፣ ለምን ዋክሮንህ፣ ዓፒሎና ማዢንቴ፣ ያኦሲ ዳርና ካኣማ ማኣሮ ካሮ ዔኪ ዓኣዲ ናንጊና ናንጋ ጎዳ ቤርታ ዒ ሺኢሾንጎ።

8 ይካፓ ፔቴማ ናንጊና ናንጋ ጎዳም፤ ዓቴማ ጊንህ ዓዛዜሌም * ማዓሂ ዔራኒ ለምን ሹቹ ዔኪ ዒፃ ዓጎንጎ።

9 ይያይዱ ዔራሰካ፣ ናንጊና ናንጋ ጎዳም ማዔ ዋኣራሂ ጎሞ ጌኤሻኒ ዒንጎ ዒንጊሂ ማሂ ሺኢሾንጎ።

10 ዓዛዜሌም ማዔ ዋኣራሂ ሳዛና ዓኣንቴ ናንጊና ናንጋ ጎዳ ቤርቶ ሺኢሾ፣ ዳሮኮ ጎሞ ዔኪ ዓኣዳንዳጉዲ ዓሲ ናንጉዋ ዳውሎ ዳኮንጎ።

11 «ይካፓ ፔ ጎሞና ፔ ማኣሮ ዓሶ ጎሞ ጌኤሻያ ማሂ ጌሜ ዔኪ ሙኪ ሹኮንጎ፤

12 ናንጊና ናንጋ ጎዳም ሚቹ ዒንጎ ቤዘይዳ፣ ታሚ ቄንሂ ዑንጆ ጨቢሶ ሶኦቆይዳ ኩንሂ፣ ካኣሺ ዔኪ፤ ሃሃ ዑዲንቴ ሺኢቴ ዑንጆ ፔቴ ሾኦፓና ዔኪ ታኣም ዑሃ ዓኣዴ ዲማዴ ቤዘ ጌልዘንጎ።

13 ዒኢካ ናንጊና ናንጋ ጎዳ ቤርታ ታሞይዳ ዑንጆ ዋሆንጎ፤ ዒዚ ጎሞ ጌኤሺያ ዔርዛ ጉኡፖ ዛጊ ሃይቁዋጉዲ ዑንጆኮ ጨባ ዬያ ጉኡፖ ባይዛያ ማዖንጎ፤

14 ሃሃ ጌሜኮ ሱጉፃ፣ ዳካ ዔኪ ጎሞ ጌኤሽኪያ ዔርዛ ጉኡፖይዳ ዓባ ኬሰካ ባንፆና ኬኤላና ዉፀርቆንጎ፤ ሃሃ ጫኣቁሞ ሳኣፂኖ ቤርታኣ ላንካይ ማይንቴ ዒማ ዛሎና ዉፀርቆንጎ።

15 «ይካፓ ዳሮኮ ጎሞ ጌኤሻኒ ዒንጊንቴ ዋኣራሂ ሹኪ፣ ሱጉፃዎ ታኣም ዑሃ ዓኣዴ ዲማዴ ቤዘ ጌልዚ፣ ጌሜ ሱጉፃና ማዴ ጎይፆ ጎሞ ጌኤሽኪያ ዔርዛ ጉኡፖ ዑፆይዳ፤ ጊንህ ሃሃ ጫኣቁሞ ሳኣፂኖ ቤርቶይዳ ዉፀርቆንጎ።

16 ይያይዱ ታኣም ዑሃ ዓኣዴ ዲማዴ ቤዘ ዒሰራዔኤሌ ዳሮኮ ዲቢንቶና ጎሞናይዳ፣ ቢያ ዲማዲ ጌኤሽኪያ ማዓንዳጉዲ ጌኤሺያ ዳምቦ ኩንሃንጎ፤ ዋጎ ጎይፆ ዳምቤና ጌኤሺ ማዒባኣ ጉርዳ ሳዛይዳ ዓኣ፣ ዓፒሎና ማዢንቴ፣ ያኦሲ ዳርና ካኣማ ማኣሮ ዛሎዋ ዒዘ ጎይፆ ማዴንጎ።

17 ዓኣርኔ ጌኤሺያ ዳምቦ ኩንሂያሮ ፔ ጎሞና ፔ ማኣሮ ዓሶ ጎሞና፤ ሃሃ ዒሰራዔኤሌ ዓሶ ጎሞዋ ጌኤሻኒ ታኣም ዑሃ ዓኣዴ ዲማዴ ቤዘ ጌሌማ፣ ዳንዲ ዒ ኬሰካንዳ፣ ሄላንዳኣና ዓፒሎና ማዢንቴ፣ ያኦሲ ዳርና ካኣማ ማኣሮይዳ ያኦኒያ ጴዳ፣።

* 16:8 ዓዛዜሌ ጋዓዘኩ- ዓብሬ ዓሶ ሙኤጮና ሱሊፃ ፔጋዲ ዒርቴዋያኬ፤ ጋዓንቴ ሶኦሊዳ ዓኣ ፃላሄ ዓያና ሱንሂ ማዑዋፆ ዓታዓ ጌይንታኤ። 16:15 ዔብ. 9:12።

18 ዩካፓ ዒ ከሰካዖ ናንጊና ናንጋ ጎዳ ቤርታ ዓኣ፡ ሚቺ ዒንጎ ቤዞ ሙኪ ዩኖ ቤዞዋ ጌኤሾንጎ፤ ዒማና ጌሚና ዋኣራሢናኮ ሱጉፃፓ ዳካ ዳካ ዔኪ ሚቺ ዒንጎ ቤዞኮ ዖይዶ ዛላ ዓኣ፡ ዳንኮ ቲሽኮንጎ፤

19 ዒሰራዔኤሌ ዴሮኮ ዳቢንቶና ጎሞናይዳፓ ታኣሞ ዒንጎ ባኮ ሺኢሾ ቤዞ ጌኤሺ፡ ዲማሳኒ ሱጉፃይዳፓ ኬኤላና ዔኪ ዔኪ ላንካይ ማይንቲ ዒኢካ ወፀርቆንጎ።»

ዴሮኮ ጎሞ ዔኪ ዓሲ ናንጉዋ ዳውሎ ዳኪንታ ዋኣራሢ

20 «ዩካፓ ዓኣሮኔ ዑሣ ዓኣጳ ዲማጳ ቤዞ፡ ዓፒሎና ማዢንቴ፡ ዖኣሲ ዴሮና ካኣማ ማኣሮንታ ዖኣሲም ዒንጎ ባኮ ሺኢሾ ቤዞ ጌኤሺ ዖ ዳሞቦ ኩንሣሰካፓ ዓሲ ናንጉዋ ዳውሎ ዳኪንታኒ ድኔሪንቴ ዋኣራሢ ናንጊና ናንጋ ጎዳ ቤርቶ ሺኢሾንጎ።

21 ዩያይዴሰካፓ ፔኤኮ ላሞዖ ኩጮ ዋኣራሢ ቶኣካ ጌሣ ዒሰራዔኤሌ ዴሮኮ ዳቢንታ፡ ጎማ፡ ፑርቱሞንታ ቢያ ዩያ ዋኣራሢ ዑፃ ማዓንዳጉዲ ቡኡዳ፤ ዩያ ዋኣራሢ ዩኖ ማዶ ማዳንዳጉዲ ጌይንቴ ዓሢ ዓሲ ናንጉዋ ዳውሎ ዔኪ ዓኣዳንዳጉዲ ዳኮንጎ፤

22 ዩይ ዋኣራሢ ዔያቶኮ ጎሞ ቢያ ዔኪ ዓሲ ናንጉዋ ዳውሎ ጉር ቦኣላ ዳኪንታኒ ጌይሣኬ፤ ዩይ ዓሢ ዋኣራሢ ዔኪ ዴንዲ ቦኣሎ ጉራ ዳኪ ሃሾንጎ።

23 «ዩካፓ ዓፒሎና ማዢንቴ፡ ዖኣሲ ዴሮና ካኣማ ማኣሮ ዓኣሮኔ ጌሊ ዋንዴ ዑሣ ዓኣጳ ዲማጳ ቤዞ ጌላኒ ጋዓዖ ማኣዔ ማኣዓሢ ኬሲ ዒኢካ ሃሾንጎ፤

24 ታኣሞ ዲማጳ ቤዞይዳ ዑፃ ፔኤኮ ማሰቲ፡ ቢያ ዎዴ ዒ ማኣዓ ማኣዓሢ ማይንቶንጎ፤ ዩካፓ ኬሰኪ ፔ ጎሞና ዴሮ ጎሞ ጌኤሻኒ ሚቺ ዒንጎ ዒንጊያ ሺኢሾንጎ።

25 ጎሞ ጌኤሻኒ ዒንጊንቴ ቆልሞኮ ማሎ ሚቺ ዒንጎ ቤዞይዳ ሚቸንጎ፤

26 ቦኣሎ ዳኪንቴ ዋኣራሢ ዔኪ ዓኣጳ ዓሢ ጉርዶ ጌላንዳሢኮ ቤርታ ማኣዓሢ ፔኤኮ ማሰኪ፡ ዑፃዋ ፔኤኮ ማሰቶንጎ፤

27 ጎሞ ጌኤሻኒ ቲቂ ሱጉፃ ዔኮና ቆልሞንሢ ጉርዳፓ ዙሎ ኬሲ ታሚና ሚቺንቶንጎ፤ ዔያቶኮ ዒልዓ፡ ዓሽካ፡ ጎጶ ባኮንታ ሶኣካኣ ቢያ ዓቱዋዖ ሚቺንቶንጎ።

28 ዩያ ሚቺ ዓሢ ማዒ ጉርዶ ጌላንዳሢኮ ቤርታ ፔኤኮ ማኣዓሢ ማሰኪ ዑፃዋ ማሰቶንጎ።»

ጎሜ ጌኤሺሢ ዳሞቤ ኩንሥሢ ኬሊ

29 «ሃካፓ ሊካ ከኤዚንታ ዳምቦንሢ ከሰካ ዎዶ ቢያይዳ ማዲ ኩንሢ ካፑዋቱ፤ ለንካሳ ዓገሮኮ ታጳሳ ኬሎና ዒሰራዔኤሌ ዓሶንታ ዔያቶና ዎላ ናንጋ ሜሌ ዓጮ ዓሳ ሙኡዚ ሃሺ ሺኢቃንዳያ ኮይሳኔ፤ ዬኖ ኬሎና ዓይጎ ማዶዎ ማዶፓ።

30 ዬኖ ኬሎ ዎጎ ጎይፆና ጌኤሺፆ ዳምባ ዔያቶም ማዲንታንዳሢሮ ዎጎ ጎይፆና ናንገና ናንጋ ጎዳ ቤርታ ዔያታ ዳምቦና ጌኤሺኬያ ማዓንዳኔ።

31 ዬና ሙዎ ሃሺንታዘና ማዶ ማዲንቱዋ ኬሌላ ታኦም ዱማዴያ ማዓንዳኔ፤ ዬንሢ ዳምቦንሢ ሙካ ዎዶ ቢያይዳ ካፒንቲ ናንጋያ ማዎንጎ።

32 ዓዶ ቤዘይዳ ቄኤሶ ቢያኮ ሱኡጋሢ ማዒ ዶኦሪንቱ ቄኤሳሢ፤ ዬያ ጌኤሺፆ ዳምቦ ኩንሢንጎ፤ ዒዚያ ሱኡፓሢና ኮሺንቱ ቄኤሶ ማኦሳሢ ማኦሳ።

33 ዑሣ ዓኦዴ ዳማዴ ቤዘ፣ ዓፒሎና ማዢንቱ ፆኦሲ ዴሮና ካኦማ ማኦሮ፣ ፆኦሲም ዒንጎ ባኮ ዒንጎ ቤዘንታ ቄኤሶንታ ዴሮዋ ቢያ ጌኤሺፆ ዳምቦ ማዲ ኩንሢንጎ።

34 ዬንሢ ዳምባ ሙካ ዎዶ ቢያይዳ ካፒንቲ ናንጋያ ማዎም፤ ዬይ ጌኤሺፆ ዳምባ ዴሮ ጎማፓ ቢያ ጌኤሻኒ ሌዔይዳ ፔቴና ማዲንታያ ማዎንጎ» ጌዔኔ።

ናንገና ናንጋ ጎዳ ዓይሢ ጎይፆማ ሙሴ ዔቦ ማዲ ኩንሢኔ።

17

ሱጉሢ ሙይንቱዋጉዲ ላኦገንቲፆ

1-2 «ዓኦሮኔና ናኦቶናም፤ ሃሣ ዒሰራዔኤሌ ዴሮ ጉቤሢም ሃካፓ ሊካ ዓኦ ዳምቦ ከኤዛንዳጉዲ ናንገና ናንጋ ጎዳ ሙሴ ዓይሢኔ፤

3-4 ዒሰራዔኤሌ ዓሰ ማዔ ዓይጎ ዓሰያ ማዎም ዓፒሎና ማዢንቱ፣ ፆኦሲ ዴሮና ካኦማ ማኦሮ ካራ ማዒባኦንቱ ሜሌ ቤሰካ ባይ፣ ማራይ፤ ሃሣ ዋኦሪ ማዔቴያ ሹኪ ታኦም ዒንጎ ዒንገሢ ማሢ ዒንገቱ ዬይ ዎጎ ዳቤያ ማዓንዳኔ፤ ሱጉሢ ጉሪ ላኦሌያ ማዔሢሮ ታ ዴሮ ባኦካ ማዒ ዒ ፓይዲንታንዳያ ኮይሱዋሴ።

5 «ዬያሮ ዒሰራዔኤሌ ዴራ ዓይጎ ቆልሞዋ ማዎም ቦኦሊዳ ጉሪ ሹኪሢ ሃሺ ታ ቤርቶ ዔኪ ሺኢሻንዳያ ኮይሳኔ፤ ዬያ ዒንጎ ባኮ ዔያታ ዓፒሎና ማዢንቱ፣ ፆኦሲ ዴሮና ካኦማ ማኦሮ ካሮ ቄኤሳሢ ኮራ ዔኪ ሙኪ ፔቱዋና ዒንጎ ዒንገሢ ማሢ ሹኮንጎ።

6 ዩካፓ ቄኤሳሢ ሱጉያ ዓፒሎና ማዢንጌቴ፣ ያኦሲ ዴሮና ካኣማ ማኣሮ ካሮይዳ ዓኣ፣ ሚቺ ዒንጎ ቤዘኮ ጎኦቦ ቢያ ፑጮንጎ፤ ሃሃ ታና ዎዛሳ ሳውሞ ዓኣያ ማዓንዳጉዲ ማሎ ሚቸንጎ።

7 ዒሰራዔኤሌ ዴራ ታና ዔያታ ጉሙርቃ ጉሙርቁፓፓ ዳቢሻያ ማዔ ፑርቶ ዓያኖሞ ቆልሞ ፔኤኮ ሹኪ፣ ታና ናንገና ናንገ ጎዳሢሞ ዓይሢንቲሢ ዒፃንዳያ ኮይሱሞቤ፤ ዩያ ዒሰራዔኤሌ ዴራ ማዳንዶ ዳሞቤ ማሂ ሙካ ዎዶ ቢያይዳ ካፖንጎ።

8-9 «ዒሰራዔኤሌ ዓሶ ባኣካፓ ዓይጎ ዓሲያ ማዎሞ ዔያቶ ባኣካ ናንገ ሜሌ ዓጨ ዓሲያኣ ማዎሞ ዓፒሎና ማዢንጌቴ፣ ያኦሲ ዴሮና ካኣማ ማኣሮ ካራቱሞንጌ ሜሌ ቤሰካ ታኣሞ ሚቺ ዒንጎ ባኣዚ ማዔቴያ ሜሌ ዒንገሢ ዒንገ ጴዴቴ ዬይ ታ ዴሮ ባኣካ ማዒ ፓይዲንታንዳያ ኮይሱሞቤ።

10 «ዒሰራዔኤሌ ዓሶይዳፓ ዓይጎ ዓሲያ ማዎሞ ዔያቶ ባኣካ ናንገ ዓሲታቴያ ሱጉሢ ሙዓያ ማዔቴ ታኣኒ ሚርጌና ዒዛ ዒፃ ዓሲ ዒ ማዓንዳኔ፤ ታ ዴሮ ባኣካ ማሂ ታ ዒዛ ፓይዳዓኬ።

11 ዓይጎሞ ማዎሞ ሼሞፓ ዓኣ ማዢንጎቶኮ ቢያ ሼሞፓሢ ዓኣሢ ሱጉሢዳኬ፤ ዴሮኮ ጎሞ ጌኤሻንዳጉዲ ዒንጎ ባኮ ዒንጎ ቤዘኮ ጎኦቦይዳ ሱጉያ ሞሃንጎሞ ታኣኒ ጌዔሢ ዬያሮኬ፤ ሼሞፓ ዓኣ ሱጉሢ ጎሜ ጌኤሻኒ ዳንዳዓኔ።

12 ዒሰራዔኤሌ ዴሮ ማዔቴያ ዔያቶኮ ባኣካ ናንገ ሜሌ ዓጮ ዓሳ ሱጉሢ ሙዑሞጉዲ ታኣኒ ላኣጌሢ ዬያሮኬ።

13 «ዒሰራዔኤሌ ዓሲ ማዔቴያ ዔያቶ ባኣካ ናንገ ሜሌ ዓጨ ዓሲ ዎጎ ጎይያና ሙይንታኒ ዳንዳዓ ቦያታቴያ ካፒ ኬሚ ዎዴቴ ሹኪ ሱጉያ ሳዓ ላኣላዎ ዓጨና ሱጉያ ሲንሦንጎ፤

14 ፔቴ ፔቴ ሼሞፓ ዓኣ ማዢንጎቶኮ ሼሞፓሢ ዓኣሢ ሱጉያይታሢሮ ዒሰራዔኤሌ ዴራ ሱጉሢ ሙዑሞጉዲ ታ ላኣጌሢ ዬያሮኬ፤ ዩያ ሙዔ ዓይጎ ዓሲያ ታ ዓሶ ባኣካ ማዒ ፓይዲንታዓኬ።

15 «ዒሰራዔኤሌ ዓሲ ማዔቴያ ዔያቶ ባኣካ ናንገ ሜሌ ዓጨ ዓሲያኣ ማዎሞ ሃይቄ ቆልሞታቴያ ቦያ ዎዴ ቆልሞኮ ዓሻኪ ሙዔቶ ማኣዓሢ ፔኤኮ ማሰኪ ዑዎ ማሰቲ ዴንዲ ሳዓ ዓማንዳያ ሄላንዳኣና ዒኢቲያ ማዎንጎ፤ ዩካፓ ዒ ዳሞቦ ጎይያና ጌኤሽኬያ ማዓንዳኔ፤

16 ዒዚ ዬያይዲባኣያታቴ ጎሜ ማዴሢሮ ዒዛይዳ ሄላ ሜቶ ዒ ዔካንዳኔ» ጌዔኔ።

17:10 ማዢ. ማፃ 9:4፤ ሌዊ. ዓኬ 7:26-29፤ 19:26፤ ላሚ. ዎሞ 12:16፤ 23፤ 15:23።

17:11 ዔ.ብ. 9:22።

18

- 1 ናንጊና ናንጋ ጎዳ ሙሴም፡-
- 2 «ዲሰራዔኤሌ ዳርም ሂዚ ጌዔ፤ ታኣኒ ናንጊና ናንጋ ጎዳ ማዔ ዒንሢኮ ስኣዛሢ፤
- 3 በርታ ዒንሢ ናንጌ፡ ጊብፄ ዓጮ ዓሳ ማዳ ጎይፆ ማዲፖቴ፤ ሃሃ ታ ዒንሢ ጌልዛኒ ዔኪ ዓኣዳ፡ ካኣናኔ ዓጮ ዓሳ ማዳ ጎይፆ ጊኢጉፎ ማዳ ማዲፖቴ፤
- 4 ታኣኮ ሞጎ ቢያ ካፑፎፎ፤ ታ ዓይሢፆ ሞኮንሡፎፎ፤ ታኣኒ ናንጊና ናንጋ ጎዳ ማዔ ዒንሢኮ ስኣዛሢ።
- 5 ታኣኒ ዒንሢም ዒንጋ ዳምቦና ሞጎና ጎይፆ ማዲፎፎ፤ ዩያይዴቴ ዒንሢ ሹምፓሢ ዒንሢኮ ዓውሳንዳኔ፤ ታኣኒ ናንጊና ናንጋ ጎዳኬ» ጌዔኔ።
- 6 ናንጊና ናንጋ ጎዳ ኬኤዛፆ፡- «ዒንሢዳፓ ስና ማዔቴያ ዒጊኒና ላሃንዳያ ኮይሱፎሴ፤ ታኣኒ ናንጊና ናንጋ ጎዳኬ።
- 7 ኔ ዒንደና ላሂ ኔ ዓደ ቦርሲሲፖ፤ ኔ ዒንደፎ ዳውሲሲፖ።
- 8 ኔኤኮ ዒንደ ለጎንሢናኣ ላሂ ኔ ዓደ ቦርሲሲፖ፤
- 9 ኔ ጌርናኣ ላሂ፤ ሃሃ ኔኤና ሞላ ዲጩ። ኔ ዒንዳ ሜሌ ዓሲፓ ሹዔያ ማዔቴያ ኔ ዓዴ ሜሌ ዓሲፓ ሹዔያ ማዔ ኔ ጌርና ላሂ።
- 10 ዳውሲንቲ ኔኤኮ ማዕ-ሞጉዲ ኔኤኮ ናኣዚ ናዎና ላሂ፤ ሃሃ ኔ ናዎኮ ናዎና ማዔቴያ ላሂ።
- 11 ኔ ዒንደ ሌጎ ሹዔ ዉዲር ናይ ኔኤኮ ጌርታሢር ዒዛና ላሂ።
- 12-13 ኔኤኮ ዓደ ጌርና ዒንደ ጌርና ኔ ዓደና ኔ ዒንደናኮ ዑኬ ዒጊኒ ማዔሢር ዩያቶናኣ ላሂ።
- 14 ኔ ዓደ ዒሾ ማቸናታቴያ ኔ ዓደ ጌኤዚ ማቻ ኔኤኮ ዒንደ ማዔያታሢር ዒያቶና ላሂ።
- 15 ኔኤኮ ናኣዚ ማቸናኣ ላሂ።
- 16 ሃሃ ጌርሲ ማቸ ማዔ፡ ሞይሞናኣ ላሂ።
- 17 ኔ ዘኦሰካ ሞላ ኮኦማ ላኣሊኮ ናዎ ማዔቴያ ዒዛኮ ናኣዚ ናኣ ኔኤና ዒጊንቲያታሢር ዒያቶና ላሂ።
- 18 ማቻ ኔኤኮ ሳዛና ዓኣንቲ ኔኤኮ ማቸኮ ጌር ጊንፃኣ ማቸ ማሂ ዔኪ፤ ዒዛና ላሂያ ላሂ።
- 19 «ሻቱሞ ሙኪ ዓኣ፡ ላኣሊና ላሂ፤ ዓይጎር ጌዔቴ ሞጎ ጎይፆና ዒዛ ዒኣቴያታሢርኬ።

18:5 ኔሂ. 9:29፤ ሂዚ. 18:9፤ 20:11-13፤ ሉቃ. 10:28፤ ሮሜ 10:5፤ ጋላ. 3:12።
 18:9 ሌዊ. ዓኬ 20:17፤ ላሚ. ሞማ 27:22። 18:14 ሌዊ. ዓኬ 20:19-20።
 18:15 ሌዊ. ዓኬ 20:1። 18:16 ሌዊ. ዓኬ 20:21። 18:17 ሌዊ. ዓኬ 20:14፤ ላሚ. ሞማ 27:23።

- 20 ሜሌ ዓሲኮ ላኣሊና ላሃ ኔና ዒኢሲፖ።
- 21 ናኣቶይዳፓ ኔኤኮ ዓይጎናይያ ማፃሞ ሞሎኬ ጌይነታ ጾኦዞ ሚቶ ዒንጎ ባኣዚ ማሃ ዒንገ ኔ ጾኦሲኮ ሱንፖ ዒኢሲፖ፤ ታኣኒ ናንገና ናንጋ ጎዳኬ።
- 22 ጾኦሲ ዒፃ ባኣዚታሢሮ ላኣሊና ላሃ ጎይፆ ዓቲንቄና ላሃፖ፤
- 23 ዓይጎ ዓሲ ዓቲንቄታቲያ ላኣሊ ቆልሞና ላሆፓ፤ ዬያጉዴ ደውሲሳ ባኣዚ ማዲፃ ዳሞቦ ጎይፆና ዒኢቲያ ማሃኔ።
- 24 «ዔያቶኮ ዓጮ ዔኪ ኔና ጌልዛኒ ታኣኒ ዳውሴ፥ ሜሌ ዴራ ፔና ዬያ ባኮና ዒኢሴያታሢሮ ኔኤኒ ዬያ ባካፓ ፔቲማታዎ ማዲ ኔና ዒኢሲፖ።
- 25 ዔያቶኮ ማዲ ሳፆ ዒኢቲያ ማሃሢሮ ታኣኒ ዬና ሳፆም ሜቶ ዓገኔ፤ ዬያሮ ዬና ሳዓ ዒኢካ ናንጋ ዓሶ ፔ ዳንጋፓ ጩቲኔ።
- 26-27 ዔያታ ዬያ ፑርቶ ባኮ ቢያ ማዲፆና ሳፆ ዒኢሴኔ፤ ዒንሢ ጋዓንቲ ዬያ ባኮ ቢያ ማዲፖቲ፤ ዒሰራዔኤሌ ዓሶዎ ማፃሞ ዒኢካ ናንጋ ሜሌ ዓሲ ማዔቲያ ቢያሢ ዬያ ዎጎና ዳሞቦና ዒንሢ ካፓንዳያ ኮይሳኔ።
- 28 ዒንሢያ ዔያቶ ጎይፆ ሳፆ ዒኢሴያ ማዔቲ ዒንሢኮ ቤርታ ዓኣ ዓይሁዴ ማዒባኣ ዓሶ ሳዓ ፔ ዳንጋፓ ጩቲ ጎይፆ ዒንሢያ ጩታንዳኔ።
- 29 ዬንሢ ቦርሲሳ ባኮይዳፓ ፔቲማታፆ ማዲሢ ታኣኮ ዴሮ ባኣካ ማዒ ፓይዲንታኒ ኮይሱሞሴ።
- 30 «ታኣኮ ዓይሢፆ ቢያ ኩንሡዎቲ፤ ዬያኮ ቤርታ ሳዔሎይዳ ናንጋ ዓሳ ማዲ ፑርቶ ማዲ ፔቲታፆ ማዲፖቲ፤ ዬያ ማዲሢና ዒንሢ ዒኢሲፖቲ፤ ታኣኒ ናንገና ናንጋ ጎዳ ማዔ ዒንሢኮ ጾኦዞሢ» ጌዔኔ።

19

ዲማ ዲማ ዎጌ

- 1 ናንገና ናንጋ ጎዳ ሙሴም፡-
- 2 «ዒሰራዔኤሌ ዴሮም ሂዚ ጌዔ፤ ታኣኒ ናንገና ናንጋ ጎዳ ማዔ ዒንሢኮ ጾኦዞሢ ዲማዲያታሢሮ ዒንሢያ ታኣም ዲማዲያ ማዕባቲ፤

18:20 ሌዊ. ዓክ 20:10። 18:21 ሌዊ. ዓክ 20:1-5። 18:22 ሌዊ. ዓክ 20:13። 18:23 ኬሲ. ማፃ 22:19፤ ሌዊ. ዓክ 20:15-16፤ ላሚ. ዎማ 27:21። 19:2 ሌዊ. ዓክ 11:44-45፤ 1ጴጌ. 1:16።

3 ዲንሢ ፔቴ ፔቴሢ ዲንሢኮ ዓዶና ዲንዶና ቦንቹዋቴ፤ ታኣኒ ሃውሾንጎ ጌዔ ኬሎ ካፒ ቦንቹዋቴ፤ ታኣኒ ናንጊና ናንጋ ጎዳ ማዔ ዲንሢኮ ጾኦዛሢ።»

4 «ታና ሃሺ ሜሌ ጾኦዛ ካኦሽኪፖቴ፤ ዓንጊና ኮሾና ካኦሽኮ ባኦዚያ ማዢ ካኦሽኪፖቴ፤ ታኣኒ ናንጊና ናንጋ ጎዳ ማዔ ዲንሢኮ ጾኦዛሢ።»

5 «ፔቴሞና ዲንጊንታ ዲንጊያ ታኦም ዲንሢ ዲንጋ ዎዶና ዲንሢኮ ዲንጊያ ታ ዔካያ ማዓንዳጉዲ ማሂ ሸኢሹዋቴ።»

6 ሹኪንቴ ዓሸካ ሹኪንቴ ዓቦ፣ ሃንጎ ዚሮ ጉቴ ሙይንታንዳያ ኮይሳኔ፤ ሃይሣሳ ኬሊ ሄላንዳኦና ዓቲ ዴዔቴ ዓሸካ ታሚና ሚቹንቶንጎ፤

7 ሃይሣሳ ኬሎና ሙይንቴቴ ዩይ ዲኢቴያኮ፤ ዩያ ታ ዔካ ዲንጊሢቲዋሴ።»

8 ዩያ ሙዔ ዓሢ ታኦም ዲማዴ ባኮ ሹሌዔ ባኦዚ ማሂ ዛጌሢሮ ዳቢንቲ ዲዛኮ ማዓንዳኔ፤ ዩይ ዓሢ ታ ዴሮ ባኦካ ማዔ ፓይዲንታዓኮ።»

9 «ዲንሢ ዲንሢኮ ማኦሎ ቡራ ዎዶና ጎዢኮ ዓጮ ዛሎይዳ ዓኦ ሃኦኮ ዔኪፖቴ፤ ቶሊ ዓቲ ሃኦኮዋ ጊንሣ ማዔ ዚንጊፖቴ፤»

10 ዎይና ካፄም ኔ ማንፃ ዎዶና ዓቲ ዓኦፖንታ ሳዓ ዲኢኔሢንታ ለሚ ጊንሣ ሺሪ ማንፃፖ፤ ዩያ ቢያ ማንቆ ዓሶና ሜሌ ዓጪፓ ሙኮ ዓሶናም ሃሽ፤ ታኣኒ ናንጊና ናንጋ ጎዳ ማዔ ዲንሢኮ ጾኦዛሢ።»

11 «ዉኡቂፖቴ፤ ዓሲ ጌሺፖቴ፤ ሉኡቂፖቴ።»

12 ኔኤኒ ማዳኑዋ ባኦዚ ታ ሱንፆና ጫኦቂፖቴ፤ ዲንሢ ዩያይዳያ ማዔቴ ዲንሢኮ ጾኦዛሢ ሱንፆ ዲንሢ ዲኢሳኔ፤ ታኣኒ ናንጊና ናንጋ ጎዳኮ።»

13 «ኔ ለጋሢም ፑርታ ማዲፖ፤ ሃሃ ዲዛኮ ዓኦ ባኦዚያ ቡሪ ዔኪፖ፤ ዩያጉዲ ሚኢሹ ዲንጊ ኔ ማዲሻ ዓሢኮ ሚኢሹ ፔቴ ዓቢያ ኔ ኮይላ ዎይሡዋዎ ቤዘና ዲዛም ጪጌ።»

14 ዎይዚ ባይቄ ዓሲ ጫሽኪፖ፤ ዓኦፒ ባይቄ ዓሲኮ ቤርታ ዲቃንዳ ባኦዚ ጌሢፖ፤ ኔኤኮ ጾኦዛሢ ዲጊጮ፤ ታኣኒ ናንጊና ናንጋ ጎዳኮ።»

19:3 ኬሲ. ማፃ 20:8፤ 12፤ ላሚ. ዎማ 5:12፤ 16። 19:4 ሊዊ. ዓኬ 20:15-16፤ ላሚ. ዎማ 5:19-20። 19:12 ኬሲ. ማፃ 20:7፤ ላሚ. ዎማ 5:11፤ ማቴ. 5:33። 19:13 ላሚ. ዎማ 24:14-15። 19:14 ላሚ. ዎማ 27:18።

15 «ዓሲም ጌሰቲ ኔ ዋጋ ዋዶና ጉሙርቁንታያ ሃሣ ፒዜ ማዓ፤ ቢያሢም ሄኮ ዋጌ፤ ማንቃሢም ማንቃቶር ጌይ ያርጎጫሢ ያርጎቹዋር ጌይ ዲማሲ ዋጊ፡፡

16 ዓሲ ባአካ ሃንቲ ሃንቲ ዓሲ ደንኪ ሺሪፖ፤ ሃሣ ዓሲኮ ሹምፖ ባይዛኒ ዲንዳዓ ባአዚያ ማዲ ሺሪፖ፤ ታኣኒ ናንጊና ናንጋ ጎዳኬ፡፡

17 «ኔኤኮ ጌርሲ ዒኔና ዒዲፖ፤ ዒ ዲቤ ባአዚ ዓአቲ ኔኤኮዋ ዬይ ደቢንቲ ማዑዋጉዲ ፔጌና ጎሪ ዒዛ ዘሬ፡፡

18 ኔ ዓሶ ዓዳ ኔና ማሂ ናሽኬ፤ ኮሜ ኮዲፖ፤ ሃሣ ኮሜ ዓርቁያአ ዴፊፖ፤ ታኣኒ ናንጊና ናንጋ ጎዳኬ፡፡

19 «ታአኮ ዳምቦ ካፑዋቲ፥ ዲማ ዲማ ቶኦኪ ማዓ ቆልሞ ሹዓንዳጉዲ ዋላ ካንሢ ቤኤሊሲ፥ ሃሣ ዓኪሲሲፖ፤ ጎሹዳ ላምዖ ቶኦኪ ማዓ ሃአኮ ዜርቁፖ፤ ሃሣ ላምዖ ባአዚ ዋላ ካንሢ ሱኪ ዲይሶና ማአዖ ማይንቲ፡፡

20 «ፔቲ ዓሲ ፔኤም ማዲ ወዲር ናይ ሜሌ ዓሲም ጊአጊሹሰካፓ ናዔሎ ዓካሢ ሚኢሾ ጨጊ ዲኤዙዋንቲ ዒንጋ ዓሢ ወዲር ናዔሎና ላሄቲ ላምዖንሢ ዋጎ ደቤያ ማዒ ያኤጨንታንዳኔ፤ ጋዓንቲ ዒዛ ዓሢ ማአራፓ ጋፒ ኬሰኪባአሢር ዋዲ ዔያቶ ዋዲኒ ዲንዳዑዋሴ፡፡

21 ዬይ ዓሢ ደቢንቲ ዛላ ዒንጊንታ ዒንጊሢ ማዓ፥ ፔቲ ዓዴ ማራይ ዓፒሎና ማዢንቲ፥ ያኦሲ ዴርና ካአማ ማአር ካር ታ ቤርቶ ዔሲ ሙኮንጎ፡፡

22 ዬካፓ ቁኤሳሢ ዬያ ዓሢኮ ጎሞ ጌኤሻኒ ዒንጎ ዒንጊያ ዳምቦ ጎይያና ዒንጊ ጌኤሹያ ዳምቦ ኩንሦንጎ፤ ጎማአ ዒዛኮ ዓቶም ጌይንታንዳኔ፡፡

23 «ካአናኔ ዓጮ ጌላዖ ዓይጎዋ ማዖም ዓአፒ ዓአፓ ሚሢ ዒንሢ ቱኬ ዋዶና ሚያኮ ዓአፓ ዴንዲ ሃይሦ ሌዔ ሄላንዳአና ሙይንቲዋጉዲ ላአጊንቲሢር ሙይፖ፡፡

24 ያይዳሳ ሌያና ዓአፔ ዓአፖ ታና ዒንሢ ጋላታንዳ፥ ታአም ዒንጊንታ ዲማዴ ዒንጊሢ ማዖንጎ፡፡

25 ደንጋሳ ሌያና ጋዓንቲ ሚያኮ ዓአፖ ሙዑዋቲ፤ ዒንሢ ዬያይዴቲ ሚፃ ዒንሢኮ ቢያ ዋዴ ዓአፓንዳኔ፤ ታኣኒ ናንጊና ናንጋ ጎዳ ዒንሢኮ ያኦሲኬ፡፡

19:15 ኬሲ. ማፃ 23:6-8፤ ላሚ. ዋማ 16:19፡፡ 19:17 ማቲ. 18:15፡፡ 19:18 ማቲ. 5:43፤ 19:19፤ 22:39፤ ማር. 12:31፤ ሉቃ. 10:27፤ ሮሜ 13:9፤ ጋላ. 5:14፤ ያይ. 2:8፡፡ 19:19 ላሚ. ዋማ 22:9-11፡፡

26 «ሱጉሢ ዓኣ ዓሸኪ ሙይፖቴ፤ ዠዋቶታቴያ ማርሻኣ ማርሺፖቴ።

27 ቶኦኮ ጋፓኖኮ ዴዋ ታይዚ ዛኣሪፖቴ፤ ቡኡጮዋ ዒንሢኮ ቃሚሢ ታይዚፖቴ፤

28 ዑፃኣ ዒንሢኮ ኮንኮ ጫርጊፖቴ፤ ሃሃ ሃይቂ ዓሶርዋ ዑፃ ዒንሢኮ ቲቂ ኪፃሲፖቴ፤ ታኣኒ ናንጊና ናንጋ ጎዳኬ።

29 «ዓይሁዴ ማዒባኣ ዓሶኮ ካኣዠ ማኣራ ማዲንታሢጉዲ ዉዲሮ ናፃ ኔኤኮ ዬያ ማዲሺ ዒኢሲፖ፤ ኔኤኒ ዬያይዴቴ ሜሌ ካኣሺ ኔ ካኣሸካኔ ጌይሢኬ፤ ሳዓኣ ዒኢቴ ማዶና ኩሜያ ማዓንዳኔ።

30 ታኣኒ ሃውሾንጎ ጌዔ ኬሎ ካፒ ቦንቹዋቴ፤ ታኣም ዲማዴ ማኣርዋ ቦንቹዋቴ፤ ታኣኒ ናንጊና ናንጋ ጎዳኬ።

31 «ኔኤኒ ዒኢቱዋጉዲ ሶይናሢና ዠዋና ኮራ ዓኣዲፖ፤ ታኣኒ ናንጊና ናንጋ ጎዳ ማዔ ኔ ፆኦዛሢኬ።

32 «ጋርቹ ዓሲም ዴዔ ቤዛፓ ዔቂ፣ ቦንቹ፤ ታናኣ ዒጊጨ ቦንቹ፤ ታኣኒ ናንጊና ናንጋ ጎዳኬ።

33 «ዒንሢ ኮይላ ናንጋ፣ ሜሌ ዓጨፓ ሙኬ ዓሲም ጌኔ ማዲፖቴ፤

34 ዒንሢ ዓሶም ዒንሢ ማዳማጉዲ ኮሺ ባኣዚ ማዲዋቴ፤ ዓዳ ዒንሢ ማሢ ዔያቶ ናሽኩዋቴ፤ ሃያኮ ቤርታ ዒንሢ ጊብፄ ዓጮይዳ ሙኬ ዓሲ ማዒ ናንጌሢ ማሉዋቴ፤ ታኣኒ ናንጊና ናንጋ ጎዳ ማዔ ዒንሢኮ ፆኦዛሢኬ።

35 «ዒንሢ ማካ ባኮና ማፆም ዒንሢ ሚፃ ባኮና ዓሲ ጌሺ ማዶ ባኣዚ ማዲፖቴ።

36 ዒንሢ ማካ ባኮና ሚፃ ባካ ጉሙርቂንታያ ሃሃ ጎኔ ባኣዚ ማፆንጎ፤ ጊብፄ ዓጫፓ ዒንሢ ዔኪ ኬሴሢ ናንጊና ናንጋ ጎዳ ማዔ ዒንሢኮ ፆኦዛሢ ታናኬ።

37 ዒንሢም ታኣኒ ዒንጌ ዳምቦንታ ዋጎንታ ማዲ ኩንሣያ ማዑዋቴ፤ ታኣኒ ናንጊና ናንጋ ጎዳኬ» ጌዔኔ።

19:26 ማዢ. ማፃ 9:4፤ ሌዊ. ዓኬ 7:26-27፤ 17:10-14፤ ላሚ. ዋማ 12:16፤ 23፤ 15:23፤ 18:10። 19:28 ሌዊ. ዓኬ 21:5፤ ላሚ. ዋማ 14:1። 19:29 ላሚ. ዋማ 23:17። 19:30 ሌዊ. ዓኬ 26:2። 19:31 ላሚ. ዋማ 18:11፤ 1ጎሙ. 28:3፤ 2ካኣቶ. ማ 23:4፤ ዒሲ. 8:19። 19:34 ኬሲ. ማፃ 22:21፤ ላሚ. ዋማ 24:17-18፤ 27:19። 19:36 ላሚ. ዋማ 25:13-16፤ ኮኦኪ. 20:10።

20

ጎሜ ዛላና ሙካ ሜቶ

1 ናንጊና ናንጋ ጎዳ ሙሴም:-

2 «ዲሰራዔኤሌ ዴሮም ሂዚ ጌይ ከኤዜ፤ ዲንሢ ባአካፓ ማዔቴያ ዲንሢና ዋላ ናንጋ ማሌ ዓይጎ ዓሲያ ማፆም ሞሎኬ ጌይንታ ጾኦዞም ፔኤኮ ናኦቶይዳፓ ፔቴ ሚቺ ዲንጎ ዲንጊሢ ማሂ ዲንጋ ዓሢ ዴራ ሹቻ ዲይ ዋደንጎ፤

3 ፔኤኮ ናፆ ሞሎኬም ዲንጊፆና ዓፒሎና ማዢንቴ፥ ጾኦሲ ዴሮና ካአማ ጌኤዢ ማአሮ ዲኢሳያ ማዔቴ ሃሣ ታኦኮ ሱንፆዋ ጫሽኪሳያ ማዔቴ ዬያ ዓሢኮ ታኦኪ ሞርኬ ማዓንዳኔ፤ ታ ዴሮ ባአካፓ ታ ዲዛ ባይዛንዳኔ።

4 ጋዓንቴ ዬይ ዓሢ ማዴ ባኮ ቢያ ዴራ ዳኪሲ ዛጊ ዋዲዋፆ ሃሹቴ፥

5 ታኦኪ ታኦሮ ዬያ ዓሢና ዲዛኮ ማአሮ ዓሶ ጉቤ፥ ሃሣ ታኦም ጉሙርቁንቱዋያ ማሢ ሞሎኬ ካሽኪ፥ ዲዛና ዋላ ፔቴ ማዓ ዓሶይዳ ቢያ፤ ዳኤፒ ሜቶ ታ ዔኪ ዬዓንዳኔ፤ ታ ዓሶ ባአካፓኦ ታ ዔያቶ ባይዛንዳኔ።»

6 «ዓይጎ ዓሲያ ማፆም ዓሶ ሙዓ ዓሶና ዡኦና ኮይላ ዔኤቢ ጾኦኤኒ ዓኦዴቴ ዳኤፒ ሜቶ ታ ዲዛይዳ ዔኪ ዬዓንዳኔ፤ ታኦኮ ዴሮ ባአካፓኦ ታ ዲዛ ባይዛንዳኔ።

7 ዲንሢኮ ቡያ ጉቤ ታኦም ዲማዴያ ማሀዋቴ፤ ዓይጎሮ ጌዔቴ ታኦኪ ናንጊና ናንጋ ጎዳ ማዔ ዲንሢኮ ጾኦዞሢታሢሮኬ።

8 ታኦኮ ዓይሢያ ካፒ ማዴያ ማዕዋቴ፤ ዓይጎሮ ጌዔቴ ታኦኪ ዲንሢ ታኦም ዲማሳ፥ ናንጊና ናንጋ ጎዳኬ።»

9 «ፔ ዓድና ፔ ዲንድናም ጋዳንቃ ዓሲ ሹቻ ዲይንቴ ሃይቆም፤ ዬያ ሃይቦይዳ ዲ ጌላሢ ፔ ዳቢንቶናኬ።»

10 «ፔቴ ዓሲ ዓሲ ማቾና ላሃቴ ዲዛንታ ዲዛንታ ሹቻ ዲይንቴ ሃይቆንጎ።

11 ፔቴ ዓሲ ፔኤኮ ዲንዶ ሌጎና (ዲንድና) ላሃቴ ዲዛንታ ዲዛንታ ሹጮና ዲይንቴ ሃይቆንጎ፤ ዬያይዲ ዔያታ ሃይቃሢ ዔያቶ ዳቢንቶናኬ።

12 ፔቴ ዓሲ ናኦዚ ማቾና ላሃቴ ላምፆንሢ ሹጮና ዲይንቴ ሃይቆንጎ፤ ዬያይዲፆና ዔያታ ፔኤኮ ዲጊንቶ ዲኢሴሢሢሮ ዔያታ ሃይቃሢ ፔ ዳቢንቶናኬ።

20:9 ላሚ. ዋማ 21:17፤ ማቴ. 15:4፤ ማር. 7:10። 20:10 ከሲ. ማፃ 20:14፤ ሌዊ. ዓኬ 18:20፤ ላሚ. ዋማ 5:18።

13 ፔቴ ዓሲ ዓቲንቄና ላሄቴ ለምዖንሢ ስርሲሳ ባኣዚ ማዳሢር ለምዓሢ ሹጮና ዲይነት ሃይቆንጎ፤

14 ዩያይዲ ዔያታ ሃይቃሢ ዔያቶ ደቢንቶናኬ። ፔቴ ዓሲ ዒንድንታ ናዎንታ ዎላ ዔኬያ ማዔቴ ዩያ ዒ ማዳ ደውሲሳ ማዶር ሃይሣሢ ታሚና ሚቸንጎ፤ ሃይቆንጎ፤ ዩያጉዴ ማዶ ዒንሢ ባኣካ ማዲንታኒ ኮይሳያቱዎሴ።

15 ፔቴ ዓሲ ቆልሞ ዒኢሴቴ ዩያ ዓሢንታ ቆልሞማንታ ዎላ ሹጮና ዲይነት ሃይቆንጎ፤

16 ፔቴ ላኣሊ ቆልሞና ዒኢቴያ ማዔቴ ዒዘንታ ቆልሞማንታ ዎላ ቢያ ሹጮና ዲይነት ሃይቆንጎ፤ ዔያታ ሃይቃሢያ ፔ ደቢንቶናኬ።

17 «ፔቴ ዓሲ ፔ ዓዶ ናይ፤ ገንሣ ሃሣ ዒንዳ ሜሌ ቤስካፓ ሾዔ ጌር ዔኬያ ማዔቴ ዴር ቤርቶ ሺኢኪ፣ ደውሲሳ ማዳ ዒዘኮ ዔርቴሞ ዴር ባኣካፓ ዴንዲ ባይቆሞ፤ ፔ ጌርና ላሄ፣ ደውሲንቴ ደውሲንቶ ዒ ፔኤኮ ዳንደዎም።

18 ፔቴ ዓሲ ሻቱሞ ሙኪ ዓኣ ላኣሊና ላሄቴ ለምዖንሢ ዴር ባኣካፓ ደማዲ ባይቆንጎ፤ ዓይጎር ጌዔቴ ዒኢቴያ ዔርዘ ዎጎኮ ዔያታ ዑሣ ዓኣዳሢርኬ።

19 «ፔቴ ዓሲ ዓዶ ጌርና ማዖም ዒንዶ ጌርና ላሄቴ ለምዖንሢ ዒገኒታዎ ዩያ ማዳሢር ዩያ ዘሎ ዓገኒታ ሜቶ ዔያታ ዔካንዳኔ፤

20 ፔቴ ዓሲ ዓዶ ዒሾ ማቸና ማዖም ዓዶ ጌኤዚ ማቸና፤ ሃሣ ዓቦ ማቸና ላሄያ ማዔቴ ዩያ ማዲያና ዩኖ ዓሶ ደውሲሴያ ማዔሢር ዩያ ዘሎ ዒገኒታ ሜቶ ዔያታ ዔካንዳኔ፤ ናይ ሾውዎዎ ዔያታ ሃይቃንዳኔ።

21 ፔቴ ዓሲ ፔኤኮ ጌርሲ ማቸ ጌርሲ ሃይቁዎንቴ ዔኬቴ ዩይ ዓሢ ዒኢቴያ ማዓኔ፤ ሃሣ ጌርሲያ ዒ ደውሲሴሢር ናይ ባኣያ ማዒ ዓታንዳኔ።

22 «ዒንሢ ናንጋንዳጉዲ ታኣኒ ዒንሢ ጌልዘንዳ፣ ካኣናኔ ዓጫ ፔ ዳንጋፓ ዒንሢ ጨቱዎጉዲ ታኣኮ ዳምቦና ዎጎና ካፒ ማዲያ ማዑዎቱ፤

23 ዒንሢኮ ቤርታፓ ታ ደውሳንዳ፣ ዒኢካ ናንጋ ዓሳ ማዳ ባኮ ማዲፖቴ፤ ዔያታ ዩያ ባኮ ቢያ ማዳሢር ታ ዔያቶ ሻኣኪንቴኔ።

24 ዔኤዘና ዲኢቆና ኩሜ፣ ማሎ ዓጩሎ ዒንሢ ዳካልሳኒ ታኣኒ ጫኣቄኔ፤ ዒንሢ ዓጪያ ማሂ ታ ዒንሢሞ ዒንጋንዳኔ፤ ሜሌ

20:14 ሊዊ. ዓከ 18:17፤ ላሚ. ዎማ 27:23። 20:16 ከሲ. ማፃ 22:19፤ ሊዊ. ዓከ 18:23፤ ላሚ. ዎማ 27:21። 20:17 ሊዊ. ዓከ 18:9፤ ላሚ. ዎማ 27:22። 20:18 ሊዊ. ዓከ 18:19። 20:20 ሊዊ. ዓከ 18:12-14። 20:21 ሊዊ. ዓከ 18:16።

ደርይዳፓ ዲንሢ ዲማሴሢ ታና፡ ናንጊና ናንጋ ጎዳ ማዔ ዲንሢኮ ምዳዳሢ።

25 ዴያር ሙይንታንዳ፡ ሻቲ ማዔሢንታ ማዔባኣ ቆልሞና ቦያና ካፖዎ ዲማሴሢ ዲሩዎቲ፤ ሙይንታንቆ ማዔ ቆልሞ፡ ካዮ ቦያንታ ካፖንታ ሙይፖቲ፤ ዲኣቲ ባኣዚ ማዔሢ ታ ዲንሢም ኬኤዜሢረ ዔያቶ ሙዔቲ ዲንሢ ዲኢታንዳ።

26 ዲንሢ ታኣም ዲማዴያ ማዕዎቲ፤ ዓይጎር ጌዔቲ ታኣኒ ዲማዴያኬ፤ ዲንሢ ታ ዴሬ ማዓንዳጉዲ ማሌ ዴር ባኣካፓ ታ ዲንሢ ደኦሬ።

27 «ዓሶ ሙዓ ዓሶና ዡኣና ኮራ ዔኤቢ ምዳጌ ዓኣዴ፡ ዓቲንቄ ማዔቲያ ላኣሊ ሹጮና ዲይንቲ ሃይቆንጎ፤ ዩይ ዓሳ ዩያይዲ ሃይቃሢ ፔ ደቢንቶናኬ» ጌዔ።

21

ቄኤሶም ዓይሢንቲ ዳምቤ

1-4 ናንጊና ናንጋ ጎዳ ሙሴም፡- «ዓኣሮኔ ፃፃፓ ማዔ ቄኤሶም ሃዚ ጌዔ፤ ቄኤሴ ማዔ ዓይጎ ዓሴያ ዓጊኒ ሃይቄ ዎደና ዓንድ፡ ዓድ፡ ዓቲንቆ ናዖ፡ ዉዲሮ ናዖ፡ ጌርሲንታ ሌዒ ባኣፖ ጋራ ዓኣ ጌርንታኮ ሌሲ ማዔባኣንቲ ዔፔ ዛላና ዓጊንቲ ዓጊኒኮ ሌሲ ካኣሚ ፔና ዲኢሶፓ።»

5 «ዓይጎ ቄኤሴ ማዔቲያ ሃይቄ ዓሲ ዛላ ሲዩ፡ ፔኤኮ ቶኦኮ ጉኡሎፓ፤ ቡኡጮዎ ቲቄ ቃሚሢ፡ ዑያዎ ፔኤኮ ሙርቶፓ፤

6 ቄኤሴ ቢያ ታኣም ዲማዴያ ማዔ ሱንፆ ታኣኮ ጫሽኪሱዎያ ማዖንጎ፤ ሃሣ ዓዚ ታኣም ሙያ ዓንጊያ ዓንጋያ ማዔሢረ ታኣም ዲማዴያ ማዓኔ።

7 ቄኤሴ ማዔ ዓሲ ካኣዡ ማኣሮይዳ ናንጋ ላኣሎ ማዔቲያ ዞኣዛ ኮኣማ ላኣሊ ማዔቲያ ሃሣ ዓንጂንቲ ኬሰኬ ላኣሊ ዔኮፓ፤ ዓይጎር ጌዔቲ ቄኤሴ ቢያ ታኣም ዲማዴያ ማዓኒ ኮይሳሢሮኬ።

8 ቄኤሴ ታኣም ሙኡዚ ዓንጊሢ ዓንጋያታሢረ ዴራ ታኣም ዲማዴያ ማሢ ዔያቶ ዛጎንጎ፤ ታኣኒ ዲንሢ ታኣም ዲማሳ፡ ናንጊና ናንጋ ጎዳሢ ዲማዴያታሢረ ዔያታ ዲንሢ ቤርታ ታኣም ዲማዴያ ማዖንጎ።

9 ቄኤሴኮ ዉዲሮ ናይ ካኣዡ ማኣራ ናንጊ ዞኣሰካ ኮኣማያ ማዔቲ ዓደ ዓዛ ደውሲሳሢረ ታሚና ሚቺንቲ ሃይቆንጎ።»

21:5 ሌዊ. ዓኬ 19:27-28፤ ላሚ. ዎማ 14:1።

10 «ቄኤሶ ቢያኮ ሱኡጋሢ ዛይቶ ቲዠና ቲሽኪንቴያ፤ ቄኤሶ ማአዓሢያአ ማይንታገዳጉዲ ታአም ዲማዴያ ማዔሢሮ ዓሲ ሃይቄ ዋደና ሲዬ ዔርዘኒ ቶኦኮ ፔኤኮ ጉኡሊንቲ ማአዓሢያ ዳርዘፓ፤

11-12 ዒዚ ታአም ዲማዴያታሢሮ ዓፒሎና ማዠንገቴ፣ ፆኦሲ ዳርና ካአማ ማአራፓ ኬሰኪ ዴንዲ፣ ሃሃ ዓዶኮ ማዔቴያ ዒንዶኮ ሌሲ ዓአ ቤሲታቴያ ማሌ ዓሲ ሌሲ ዓአ ቤሲ ጌሊ ፔና ዒኢሶፓ፤ ታኣኒ ናንጊና ናንጋ ጎዳኬ።

13 ዬይ ቄኤሳሢ ኩሙሢ ዉዲሮ ናይ ዔኮንጎ፤

14 ዓኒ ሃይቄ ላአሊ፣ ዓንጃንቲ ኬሰኬ ላአሊታቴያ፤ ሃሃ ካአዠ ማአራ ናንጋ፣ ዘአዛ ኮአማ ላአሊያ ዔኮፓ፤ ጋዓንቴ ፔ ዳሮ ባአኮይዳፓ ኩሙሢ ዉዲሮ ናይ ዔኮንጎ።

15 ዬይ ያዲ ማዒባአያታቴ ታአም ዲማዴያ ማዓኒ ኮይሳ፣ ዒዛኮ ናአታ ዳምቦ ጎይያና ዒኢቴያ ማዓንዳኔ፤ ታኣኒ ናንጊና ናንጋ ጎዳኬ፤ ዒዛ ታአም ዲማሳሢ ታናኬ» ጌዔኔ።

16 ናንጊና ናንጋ ጎዳ ሙሴም፡-

17 «ዓአሮኔም ሂዚ ጌይ ኬኤዜ፤ ሕ ፃጳይዳፓ ጉንፆ ማዔ ዓሲ ታአም ሙኡዚ ዒንገሢ ሸኢሸ ዒንጋኒ ኮይሱቀሴ፤ ዬይ ዳምባ ሙካ ዋደ ቢያይዳ ካፒንቲ ናንጋያ ማፆንጎ፤

18 ጉንፆ ማዔ ዓይጎ ዓሲያ ጌይፆ፡- ዓአፒ ባይቄ ዓሲ፣ ዋቦ ማዔቴያ ሚዛጵቀ ዓሲ፣

19 ኩቺ ማዔቴያ ቶኪ ዋቦ ዓሲ፣

20 ጊኢሬ ዋቤ ዓሲታቴያ ቃሚሢ ዓሲ፣ ዓአፒ ሃርጌ ዓአ ዓሲ፣ ዲማ ዲማ ዑሢዳ ኬሰካ ደርዓ ዓርቄ ዓሲ፤ ሃሃ ዓሸቲሚ * ሙኡዚ ዒንገሢ ታአም ሸኢሸ ዒንጋንዳያ ኮይሱቀሴ።

21 ቄኤሳሢ ዓአሮኔ ፃጳፓ ጉንፆ ማዔ፣ ዓይጎ ዓሲያ ሙኡዚ ዒንገሢ ታአም ሸኢሸ ዒንጋኒ ዳንዳዑቀሴ።

22 ዬያጉዴ ዓሢ ታአም ዲማዴ ሙፆና ዑሢ ዓአዴ ታአም ዲማዴያ ማዔ፣ ታአም ሸኢሸገቴ ሙፆ ሙዓኒ ዳንዳዓኔ።

23 ጋዓንቴ ዒዛኮ ጉንፆ ማዔ ዑሢ ዓአሢሮ ታአም ዲማዴ ማአሮ ዒኢሱቀጉዲ ታአም ዲማዴ፣ ጎኦቦና ዓፒሎና ሚቺ ዒንጎ ቤዘና ባንሢ ዑኮፓ፤ ቄኤሶ ታአም ዲማሴሢ ታና ናንጊና ናንጋ ጎዳኬ » ጌዒ ኬኤዜኔ።

24 ዬያ ባኮ ቢያ ዓአሮኔና ናአቶናም፤ ሃሃ ዒሰራዔኤሌ ዳሮማኣ ቢያ ሙሴ ኬኤዜኔ።

* 21:20 ዓሸቲሚ ዬኖ ቤዘይዳ ኬኤዚንቴሢ ዓሲ ዲይ ዓሸቲንሢ ዓተንቄ ዛላኬ።

22

ጾአሲም ዲማዴ ዒንጊሢ

1 ናንጊና ናንጋ ጎዳ ሙሴም:-

2 «ዓአሮኔና ዒዛኮ ናአቶናም ሂዚ ጌዔ፤ ታኣኮ ዲማዴ ሱንጾ ዒንሢ ጫሽኪሱዋጉዲ ዒሰራዔኤሌ ዴራ ታኣም ዒንጋ ባኮ ቢያ ቦንቹ ዔኪጋፓ ታኣም ዲማዴያ ማሂ ካፑዋቴ፤ ታኣኒ ናንጊና ናንጋ ጎዳኬ።»

3 ዒንሢ ፃፀፓታፆ ዒኢቲ ዓሲ ዒሰራዔኤሌ ዴራ ታኣም ዲማሲ ዒንጌ ዒንጊያ ባንሢ ጫርቁ ዑኬቴ፣ ታ ቤርታፓ ዬይ ባይቆንጎ፤ ዬይ ዲምባ ሙካ ዎዶ ቢያይዳ ካፒንቲ ናንጋያ ማፆንጎ፤ ታኣኒ ናንጊና ናንጋ ጎዳኬ።»

4 «ዓአሮኔ ፃፀፓ ማዔ ዓይጎ ዓሲታቴያ ዑሰካ ኬሰካ ዶርዓ ዓኣያ ማዔቴ፤ ሃሣ ሃርጌ ዛላና ዑሰካፓ ዓልቃ ባኣዚ ዓኣ ዓሲ ዲምቦ ጎይፆና ጌኤሽካንዲያ ሄላንዳኣና ታኣም ዲማዴ ሙፆ ሙፆፓ፤ ዬያጉዲ ሃሣ ሌሲ ካኣሚ ዒኢቲ ባኣዚታቴያ ሾይዣ ዜርፃ ሾኦቲ ዓሲ ካኣሜቴ።

5 ዒኢሳያ ማዔ፣ ሳዓና ጎቹንቲ ሃንታ ባኮታቴያ ዒኢቲያ ማዔ ዓሲ ካኣሜቴ።

6 ዬያጉዴ ባኮ ቢያ ካኣሜ ቄኤሳሢ ዴንዲ ዒባኒ ሄላንዳኣና ዒኢቲያ ማዓንዳኔ፤ ዑፆ ዋኣሢና ማሰቲባኣቴ፣ ታኣም ዲማዴ ዒንጊያ ዒ ሙፆፓ።

7 ዓባ ጌሌሰካፓ ዒ ጌኤሽ ማዓንዳሢር ታኣም ዲማዴ፣ ሃኣኮ ዒንጊያ ዒዛሲ ዒ ሙዓኒ ዲንዳዓኔ፤

8 ሃይቄያ፣ ሃሣ ቦፆ ዎዴ ባኣዚኮ ዓሽኪ ሙፆፓ፤ ዬያ ሙዔቴ ዒዛ ዒኢሳንዳኔ፤ ታኣኒ ናንጊና ናንጋ ጎዳኬ።»

9 «ቄኤሳ ቢያ ታኣኒ ዔያቶም ዒንጌ ዲምቦ ካፖንጎ፤ ዬያ ዔያታ ካፒባኣቲ ጋዓንቲ ዓይሢንቲያ ዒዲፃ ዳቢንቲ ዔያቶኮ ማዔም ዔያታ ሃይቃንዳኔ፤ ታኣኒ ዔያቶ ታኣም ዲማሳ፣ ናንጊና ናንጋ ጎዳኬ።

10 «ታኣም ዲማዴ፣ ዒንጊንቲ ባኮ ሙዓኒ ዲንዳዓሢ ቄኤሳሢ ማኣር ዓሶ ሌሊኬ፤ ቄኤሳሢኮ ሾኦቹ ማዔቴያ ሚኢሾ ጨጊንቲም ዒዛም ማዳ ዓሲያ ሙፆፓ።

11 ጋዓንቲ ቄኤሳሢ ፔኤኮ ሚኢሾና ሻንቁ ዔኬያና ዒዛኮ ማኣራ ሾይንቲያ ማዔ፣ ዒዛም ማዳ ዓሳ ቄኤሳሢር ማዔ ሙፆ ሙፆንጎ።

12 ቄኤሴ ማዒባኣ ዓሲም ሌዔ፣ ቄኤሳሢኮ ናይ ታኣም ዲማዴ ሙፆ ሙፆፓ።

13 ጋዓንቲ ዬና ናዔላ ናይ ሾዑዋንቲ ዓኒ ሃይቄያ ማዔም ዓኒ ማኣራፓ ዓንጂንቲ ኬሰኪ ዓዶ ኮይላ ሙኪ ናንጋ ቄኤሴ ናይታቴ

በርታ ናይ ዓኣዖ ዒዛ ማዳሂጉዲ ዓደ ዛሎ ማዕፍ፣ ታኣም ዲማዕፍ ሙዖ ሙዋንጎ፤ ዬያ ጎይዖ ና ታኣም ዲማዕፍ ባኮ ሙዓኒ ዲንዳዓ ዓሳ ቄኤሳሂ ማኣሮ ዓሶ ሌሊኩ።

14 «ቄኤሴ ማኣሪ ዓሲ ማዒባኣ ዓይጎ ዓሲያ ማዖም ዔሩዋዖ ታኣም ዲማዕፍ ሙዖ ሙይ ጴዳቴ ዒንገንቴ ባኮኮ ዶንጎ ኩቺፓ ፔቴ ማዓያ ገዲ ቃሲ ቄኤሳሂም ማሆንጎ።

15 ዒሰራዔኤሌ ዳራ ታኣም ዒንጎ፣ ዲማዕፍ ዒንገይ ቄኤሳ ዒኢሳንዳያ ኮይሱዋሴ፤

16 ጌይፃ፡- ታኣም ዲማዕፍ ዒንገይ ሙዓኒ ኮይሱዋ ዓሲም ዒንገ ዓሂ ማቶይዳ ጌልዙዋጉዲኩ፤ ዒንገይ ቢያ ታኣም ዲማሳሂ ታና፣ ናንገና ናንጎ ጎደሂኩ» ጌዔኔ።

17 ናንገና ናንጎ ጎደ ሙሴም፡-

18 «ዓኣሮኔና ዒዛኮ ናኣቶና፤ ሃሃ ዒሰራዔኤሌ ዳሮም ቢያ ሃይፓ ዳማ ዓኣ ዳምቦ ኩኤኤ፤ ዒሰራዔኤሌ ዓሲ ማዕቴያ ዔያቶ ባኣካ ናንጎ ማሌ ዓጪ ዓሲ ዖኦሲም ናኣቤ ናኣቢ ኩሜም፡ ሃሃ ፔ ሼኔና ታኣም ሚቺ ዒንጎንዶ ባኣዚ ዔኪ ሺኢሻያ ማዕቴ ዒንገንታ ባካ ዓይጌያ ቦሂሳ ባኣዚ ባኣያ ማዖንጎ።

19 ዒዛኮ ዒንገይ ታ ዔካያ ማዓንዳጉዲ ዔኤቢ ቦሂሳ ባኣዚባኣያ ባይ፣ ማራይ፣ ዋኣሪ ማዕቴ ጌማይ ሃንጎ ዓደ ዔኪ ሺኢሻንጎ፤

20 ዔኤቢ ቦሂሳ ባኣዚ ዓኣ፣ ዓይጎ ቆልሞዋ ዒንሂ ታኣም ዒንጌቴ ዬያ ታ ዔካዓኩ።

21 ዓይጎ ዓሲኮዋ ናኣቤ ናኣባ ኩሜም፤ ሃሃ ፔ ሼኔና ዒንጎ ባኣዚ ፔቴሞና ዒንጎ ዒንገሂ ማሂ ዒንጎቴ ታኣኒ ዬያ ዔካያ ማዓንዳጉዲ ቦሂሳ ባኣዚባኣያ ማዖንጎ።

22 ዓኣፒ ባይቄያ፣ ማቄያ፣ ቶኪ ዲጴያ፤ ዬያጉዲ ሃሃ ገኢሻካ ከሂ ዓኣያ፣ ቃፃ ዓርቄያንታ ዑፃ ማሌ ከሂ ዓኣ ቆልሞ ታኣም ዒንጎ ዒንገሂ ማሂ ዔኪ ሺኢሻፓ፤ ዬንሂጉዳ ቆልሞ ሚቺ ዒንጎ ቤዘይዳ ሙኡዚ ዒንገሂ ማሂ ዒንገፓ።

23 ባይታቴያ ማራይ ዋቦ ማዕፍ ቆልሞ ዓሲ ፔ ሼኔና ዒንጎ ዒንገሂ ማሂ ዒንጎኒ ዲንዳዓኔ፤ ጋዓንቴ ናኣቢ ኩንሥሂ ማሂ ዬይ ዒንገንታኒ ዲንዳዑዋሴ።

24 ዒኢቄ ዲይንቴ ቆልሞንታ ጌንጎቴ ቆልሞ ማዕቴያ ታኣም ዒንጎ ባኣዚ ማሂ ዔኪ ሺኢሻፓቴ፤ ዬያጉዳ ባኣዚ ዒንሂ ዓጫ ታኣም ሺኢሻ ዒንገፓቴ።

25 «ዬያጉዳ ቆልሞ ማሌ ዓጪ ዓሲዳፓ ዔኪ ታኣም ሙኡዚ ዒንገሂ ማሂ ዒንገፓቴ፤ ዬያ ቆልሞኮ ቦሂሳ ባኣዚ ዓኣያታሂሮ ታኣኒ ዬያ ዒንገይ ዔካያቴዋሴ» ጌዔኔ።

- 26 ናንጊና ናንጋ ጎዳ ሙሴም፡-
- 27 «ናኦታቲያ ማራናይ፤ ሃሣ ዋናናይ ሾይንቴ ዋዶና ላንካይ ኬሊ ሄላንዳኣና ዒንዶና ዋላ ዴጎንጎ፤ ጋዓንቴ ሳላሳ ኬላፓ ዓርቃያ ሙኤዚ ዒንጊሢ ማዒ ታኣም ዒንጊንታኒ ዳንዳዓኔ።
- 28 «ሾዔ ባይ ናኦርማና ዋላ፡ ማራይታቲያ ዋኦሪ ናጎና ዋላ ሚቹ ዒንጎ ዒንጊሢ ማሃ ፔቴ ኬሊዳ ሹኪፖ።
- 29 ጋላታ ዒንጊሢ ታኣም ዒንሢ ዒንጋ ዋዶና ዒንጊያ ታ ዔካያ ማዓንዳ ጎይሢ ማሃ ሺኢሹዋቴ።
- 30 ዚሮ ሄላንዳኣና ዓይሱዋያ ዒንጊንቴ ኬሎና ዓሽኮ ጋፒሲ ሙዑዋቴ፤ ታኣኒ ናንጊና ናንጋ ጎዳኬ።
- 31 «ታኣኮ ዓይሢያ ካፒ ማዳያ ማዑዋቴ፤ ታኣኒ ናንጊና ናንጋ ጎዳኬ።
- 32 ታኣኮ ዱማዴ ሱንያ ጫሽኪሲፖቴ፤ ዒሰራዔኤሌ ዴራ ቢያ ታኣኒ ዱማዴያታሢ ዔሪ ታና ቦንቾንጎ፤ ዒንሢ ታኣም ዱማሳሢ፡ ታና ናንጊና ናንጋ ጎዳኬ።
- 33 ታ ዒንሢኮ ጎኦሲ ማዓኒ ጊብፄ ዓጫፓ ዒንሢ ዔኪ ኬሴኔ፤ ታኣኒ ናንጊና ናንጋ ጎዳኬ» ጌዔኔ።

23

ካኣሺ ኬሊ ማሃ ቦንቾንታ ቦንቾ

- 1 ናንጊና ናንጋ ጎዳ ሙሴም፡-
- 2 «ዒሰራዔኤሌ ዓሰም ሂዚ ጌዔ፤ ጎኦሲ ካኣሽካኒ ቡኪንቶ ቦንቾ ኬሊ» ጌይ ዒንሢ ዱማሲ ቦንቾንዳ ኬላ ሃኣቶኬ፡-
- 3 ላሆ ኬሊ ማዶ ዒንሢኮ ማዲዋቴ፤ ላንካሳ ኬላ ጋዓንቴ ሃውሽ ቦንቾ ኬሊታሢ ዔራዋቴ፤ ዩማ ኬሎ ታና ካኣሽካኒ ሌሊ ቡኪንቱዋቴ፡ ማሌ ማዶ ማዲፖቴ፤ ዒንሢ ናንጋ ቤዘ ቢያይዳ ሃውሽ ኬላ ታኣም ዱማዴያኬ።»

ዑሣ ዓኣዲያ ቦንቾንታ ላኣዳ ሙዒ ቦንቾ ኬሎ (ፓይ. ማፃ 28:16-25)

4 «ፔቴ ፔቴ ቦንቾ ኬላ ዔርቴም፤ ናንጊና ናንጋ ጎዳ ቤርታ ዒንሢ ቡኪ ቡኪ ቦንቾንዳ ዴኤፖ ዴኤፖ ኬሎንሢ ሃኣቶኬ፡-

23:3 ኬሲ. ማፃ 20:8-10፤ 23:12፤ 31:15፤ 34:21፤ 35:2፤ ላሚ. ዋማ 5:12-14።

5 ናንጊና ናንጋ ጎዳ ቦንቸንታንዳ፥ ዑሣ ዓኣዲያ ኬላ ቦንቸንቶ ዓርቃሣ ቤርታሳ ዓጊኖኮ ታጾ የይዳሳ ኬሎ ዓባ ጌሊ ሳዓ ሃባርታዛኬ፤

6 ታጾ ደንጋሳ ኬሎ ላኣድ ሙዒ ቦንቸ ኬላ ቦንቸንቶ ዓርቃኔ፤ ዩማፓ ዴንዲ ላንካይ ኬሊ ሄላንዳኣና ሙኑቃ ፃኣዛ ጌሊባኣ ላኣዳ ሙዑዋቱ።

7 ዬያቶ ኬሎኮ ቤርታሳ ኬሎ ታና ካኣሸካኒ ቡኪንቱዋቱ፤ ዒንሣ ማዶ ማዲፖቱ።

8 ላንካይ ኬሊ ሄላንዳኣና ሙዖ ዒንጊያ ታኣም ሸኢሹዋቱ፤ ሳላሳ ኬሎና ዒንሣ ማዶ ሃሺ ታና ካኣሸካኒ ቡኩዋቱ» ጌዔ።

ቤርቲ ዒንጊሣ ቦንቸ ኬሊ

9 ናንጊና ናንጋ ጎዳ ሙሴም፡-

10 «ዒሰራዔኤሌ ዳርም ሂዚ ጌዔ፤ ታኣኒ ዒንሣም ዒንጋ ሳዔሎ ጌላዖ ጎሽኪ ማኣሎ ዒንሣ ቡራ ዋደና ቤርታሳ ናኣር ቁኤሳሣም ዔኪ ዬይ ዒንጉዋቱ፤

11 ዬካፓ ዬያ ታ ዔኬያ ማዓንዳጉዲ ቁኤሳሣ ናኣር ዠገጊ ታኣም ዲማዴ ዒንጊሣ ማሂ ዒንጎንጎ፤ ዬያ ዒዚ ዒንጋኒ ኮይሳሣ ሃውሾ ኬሎኮ ዚሮ ጉቲ ማዖንጎ።

12 ዒንሣ ሃኣኮ ዒንጊያ ዒንጋ ኬሎና ቦሂሳ ባኣዚባኣ፥ ፔቴ ለዔ ማዔ ዳዴ ማራናይ ማቸ ዒንጎ ዒንጊሣ ማሂ ሃኣኮና ዋላ ዔኪ ናንጊና ናንጋ ጎዳም ሸኢሹዋቱ።

13 ሃሣ ዬያና ዋላ ሪሚቶ ዛይቶና ዲርኪንቱ፥ ላምዖ ኪሎ ማዓ ሸኢቸ ዲኢሊ ሙኡዚ ዒንጊሣ ማሂ ዔኪ ሸኢሹዋቱ፤ ዬያኮ ሳዋ ታና ዋዛሳ ማቸ ዒንጎ ዒንጊሣ ማዖንጎ፤ ሃሣ ፔቴ ደሎዜ ማዓንዳ ዋይኔ ዑሺያ ዔኪ ሙኪ ዒንጉዋቱ።

14 ዬያ ዒንሣ ታኣም ዒንጋንዳሢኮ ቤርታ ዓኮ ሃኣኮኮ ቲሻሣ ዓኣዔ ማዔቴያ ሻኣቁ፤ ሃሣ ዋዲ ላኣዲያ ሙይፖቱ፤ ዬይ ዒንሣ ናንጋ ቤዞ ቢያይዳ ሙካ ሾይንታ ካፒ ናንጋ ዳምቤ ማዖንጎ።»

ሃኣኮ ቡር ዋደና ቦንቸ ኬሊ

(ፓይ. ማፃ 28:26-31)

15 «ዠገጊ ዒንጊንታ ዒንጊያ ዒንጊንቲ ኬላፓ ሴካ ላንካይ ቃልሾ ኬሊ ፓይዱዋቱ።

23:5 ኬሲ. ማፃ 12:1-13፤ ላሚ. ዋማ 16:1-2። 23:8 ኬሲ. ማፃ 12:14-20፤ 23:15፤ 34:18፤ ላሚ. ዋማ 16:3-8።

16 ለንካሳ ቃልሾኮ ደንጊታሚ ከሌ ማዓ ዓቦና ለሚ ይኖ ዓኮ ሃኣኮይዳፓ ሙኡዚ ዒንጊሢ ታኣም ዒንጉዋቱ፤

17 ዒዚ ከሎና ፔቲ ፔቲ ዓሳ ፔ ማኣራፓ ለምዖ ኪሎ ማዓ ዛይቲና ዲርከንቴ ዲኢሊ፡ ሙኡቃ ፃኣዛ ዋሂ ለምዖ ኪሎ ማዓ ሺኢቹ ዲኢሊና ላኣዶና ላኣዳ ዠፍጊ ዒንጊንታ ዒንጊሢ ማሂ ዒንጎንጎ፤ ይያ ሃኣኮኮ ቤርቶ ዒንጊያ ማሂ ታኣም ዔኪ ሺኢሾንጎ፡፡

18 ይያ ካሦና ዋላ ቦሂሳ ባኣዚባኣ፡ ፔቲ ለዔ ኩሜ ለንካይ ዓዴ ማራናይ፡ ፔቲ ጌማናይና ለምዖ ዓዴ ማራይ ዒሰራዔኤሌ ዴራ ዔኪ ሺኢሾንጎ፤ ይያታ ሃኣኮ ዒንጊያና ዋይኖ ዐኩና ዋላ ሚቹ ዒንጎ ዒንጊሢ ማዒ ታኣም ዒንጊንቶንጎ፤ ይያኮ ሳዋ ታና ዋዛሳያ ማዓንዳኔ፡፡

19 ይያጉዲ ሃሃ ጎሚ ጌኤሻ ዒንጊሢ ማዓ ፔቲ ኮላይ፡ ፔቲ ለዔ ማዔ ለምዖ ዓዴ ማራናይ፤ ፔቱሞና ዒንጎ ዒንጊሢ ማሂ ሺኢሾቱ፡፡

20 ይካፓ ቁኤሳሂ ካሦንሢና ለምዖ ማራናኣቶንሢና ዋላ ዠፍጊ፡ ታኣም ዲማጅ ዒንጊሢ ማሂ ዒንጎንጎ፤ ይይ ቁኤሳሂ ዛላ ማዓያ ማዓንዳኔ፤ ይንሢያ ታኣም ዲማጅ ዒንጊሢ፡፡

21 ይኖ ከሎ ታና ካኣሽካኒ ቡከንቴዋቱ፤ ሜሌ ማዶ ማዲፖቱ፤ ይይ ዒንሢ ናንጋ ቤዞ ቢያይዳ ሙካ ሾይንታ ካፓ ዳምቤ ማዖንጎ፡፡

22 «ዒንሢ ማኣሎ ቡራ ዋዶና ጎዡኮን ዓጮይዳ ዓጮይዳ ዓኣ ሃኣኮ ዔኪፖቱ፤ ሃሃ ቶሊ ዓቲሢ ጊንሢ ዘንጊፖቱ፤ ይያ ማንቆ ዓሶና ሜሌ ዓጮፓ ሙኪ ዓሶናም ሃሹዋቱ፤ ታኣኒ ናንጊና ናንጋ ጎዳ ማዔ ዒንሢኮ ያኣዛሢ፡፡»

ዓኮ ሌዖ ቦንቾ ከሊ
(ፓይ. ማፃ 29:1-6)

23-24 ናንጊና ናንጋ ጎዳ ዒሰራዔኤሌ ዓሶም ሙሴ ሂዚ ጌዒ ከኤዛንዳጉዲ ዓይሢ፡- «ለንካሳ ዓጊኖኮ ቤርታሳ ከሎ ዲማ ቦንቾ ከሊ ማሂ ቦንቹዋቱ፤ ዛዬ ዋርቁንቴ ዋዶና ታና ካኣሽካኒ ዒዚ ከሎ ቡከንቴዋቱ፡፡

25 ይኖ ከሎ ታኣም ሙኡዚ ዒንጊሢ ዒንጉዋቱ፤ ሜሌ ዒንሢኮ ማዶ ማዲፖቱ»

ጎሚ ጌኤሻ ከሊ
(ፓይ. ማፃ 29:7-11)

26 ናንጊና ናንጋ ጎዳ ሙሴም፡-

23:18 ከሲ. ማፃ 23:16፤ 34:22፤ ላሚ. ዋማ 16:9-12፡፡ 23:22 ሌዊ. ዓኮ 19:9-10፤ ላሚ. ዋማ 24:19-22፡፡

27 «ለንካሳ ዓገሮኩ ታጸሳ ከሎና ዳሮኩ ጎሞ ጌኤሾ ከሌ ማግንጎ፤ ታና ካኣሽካኒ ቡኪንቲ፥ ፔቲታፖ ዔኤቢ ሙዑዋፖ ፔኤቁዋቲ፤ ታኣም ሙኡዚ ዒንገሢያ ዒንገታዋቲ።

28 ናንገና ናንገ ጎዳ ማዔ ዒንሢኮ ጾኦዛሢ ቤርታ ዬና ከሌላ ዳሮኩ ጎሞ ጌኤሾ ዳምባ ኩንሢንታ ከሎታሢረ ዬና ከሎ ዓይጎ ማደቀ ማዲፖቲ።

29 ዬና ከሎና ሙኡዚ ሙዔ ዓሲ ታ ዓሶ ባኣካፓ ባይቆንጎ፤

30 ዬያጉዲ ዓይጎ ማደቀ ማግም ማደ ዓሲ ታኣኒ ታ ዳሮ ባኣካፓ ባይዘንዳኔ።

31 ዬያሮ ፔቲታፖ ዒዞ ከሎና ማደ ማዲፖቲ፤ ዬይ ዒንሢ ናንገ ቤዘ ቢያይዳ ሙካ ሾይንታ ካፓ ዳምቤ ማግንጎ።

32 ዬና ዓገሮኩ ታዘጸሳ ከሎ ዓባ ጌሌማፓ ዳንዲ ዚሮ ዓባ ጌላንዳኣና ዓይጎ ባኣዚያ ሙዑዋፖ ዬና ከሌሎ ዲማሃውሺሢ ከሌ ማሂ ቦንቹዋቲ» ጌዔኔ።

ወልሾ ዳማ ዳዒ ቦንቾ ከሎ
(ፓይ. ማፃ 29:12-40)

33 ናንገና ናንገ ጎዳ ሙሴም፡-

34 «ዒሰራዔኤሌ ዳሮም ሂዚ ጌዔ፤ ለንካሳ ዓገሮኩ ታጸ ደንጋሳ ከላፓ ዓርቂ ለንካይ ከሌ ሄላንዳኣና ወልሾ ዳማ ዳዒ ቦንቹንታ፥ ታ ከሎ ቦንቹዋቲ፤

35 ዬንሢ ከሎይዳፓ ቤርታሳ ከሎ ቡኪ ታና ካሽኩዋቲ፤ ሜሌ ዓይጎ ማደቀ ማዲፖቲ፤

36 ዬንሢ ለንካዎ ከሎንሢ ቢያይዳ ሙፖ ዒንገፖ ታኣም ሽኢሹዋቲ፤ ሳላሳ ከሎና ታና ካኣሽካኒ ቡኪንቲዋቲ፥ ሙፖ ዒንገፖ ታኣም ዒንገታዋቲ፤ ዬና ጋፒንሢ ቡኪንቲ ከሌ ማዔሢሮ ሜሌ ማደ ዒንሢኮ ማዲፖቲ።»

37 «ሚቹ ዒንጎ ዒንገፖ፥ ሙፖ ዒንገፖ፥ ዑዡ ዒንገፖንታ ሜሌ ሜሌ ዒንገፖ ታኣም ኮይሳሢ ጎይፖ ቢያ ከሌ ዒንገ ታና ዒንሢ ካኣሽካንዳ ታኣኮ ቦንቾ ከሎንሢ ዬንሢኮ።

38 ዬንሢ ባኩ፥ ታኣኮ ቦንቾ ከሎና ዒንሢ ዒንገ ዒንገፖይዳ፥ ናኣቦ ዒንሢ ዒንገ ዒንገፖይዳ፤ ሃሃ ዒንሢ ሸኔና ዒንሢ ዒንገ ዒንገፖይዳ ቃሲ ዒንሢ ዒንገንዳ ባኣዚኮ።»

39 «ማኣሎ ዒንሢ ቡሬሰካፓ ለንካሳ ዓገሮኩ ታጸ ደንጋሳ ከላፓ ዓርቃፖ ለንካይ ከሌ ሄላንዳኣና ዎዛ ቦንቾ ታ ቤርታ ቦንቹዋቲ፤

23:32 ለዊ. ዓክ 16:29-34። 23:36 ለሚ. ዎማ 16:13-15።

ዩያቶይዳፓ ቤርታሳ ኬሎማና ሳላሳ ኬሎና ዲማ ሃውሺህ ኬሊ ዒንሂም ማፃም።

40 ዬኖ ቤርታሳ ኬሎይዳ ዒንሂ ቱኬ ኮዦ ሚያ ዓአፖንታ ሜኤፀ ዒላሸንታ ሃሃ ዓአዔ ሚሂ ዋላሺ ሚንሂ ዔኪ ናንጊና ናንጋ ጎዳ ማዔ ዒንሂኮ ፆአዛሂ ቤርታ ላንካይ ኬሊ ሄላንዳአና ዋዛዲዋቴ።

41 ዬኖ ቦንቾ ሌዓ ሌዓ ናንጊና ናንጋ ጎዳ ቤርታ ላንካይ ኬሊ ሄላንዳአና ቦንቾዋቴ፤ ዬይ ዒንሂኮ ናአቶኮ ናአቶና ናንጋ ዳምቤ ማፃንጎ፤ ላንካሳ ዓጊኖና ዓጊኖና ቦንቾዋቴ።

42 ዒሰራዔኤሌ ዴሪ ጉቤ ላንካይ ኬሊ ሄላንዳአና ወልሻ ዴንካ ዴፃንጎ፤

43 ዩያይዲያና ታኣኒ ዒሰራዔኤሌ ዴሪ ጊብፀ ዓጫፓ ኬሳአና፣ ዴሪ ዋዦ ዴንካ ናንጋንዳጉዲ ማሄሂ ዒንሂኮ ናአታ ዔራንዳኔ፤ ታኣኒ ናንጊና ናንጋ ጎዳ ማዔ ዒንሂኮ ፆአዛሂኬ» ጌዔ።

44 ናንጊና ናንጋ ጎዳ ዔያታ ካአሸኪ ቦንቻንዳ ኬሎ ዒሰራዔኤሌ ዓሶም ሙሴ ዩያይዲ ዔርዜ።

24

ፆኦሲ ካአሸኪንታ ማአሮ ጋራ ፖዓ ፖዒ (ኬሲ. ማፃ 27:20-21)

- 1 ናንጊና ናንጋ ጎዳ ሙሴም፡-
- 2 «ዓፒሎና ማዢንቴ፣ ፆኦሲ ዴሮና ካአማ ማአሮ ጋራ ዓአ ፖዓ ቢያ ዋዴ ፖዒ ዴዓንዳጉዲ ሪሚቶ ዓአፖ ጩኡጺ ጊሶና ዛይቶ ኔኤም ዔኪ ዩዓንዳጉዲ ዒሰራዔኤሌ ዴሮም ኬኤዜ።
- 3 ዩካፓ ዓአሮኔ ዋንቶ ዋንቶ ዓፒሎና ማዢንቴ፣ ፆኦሲ ዴሮና ካአማ ማአሮኮ ጋራ ዓአ ታአቦቶኮ ቤርቶ ዛላ፣ ጎአቦና ዓፒሎኮ ዙላ ታ ቤርቶይዳ ሳዓ ካራንዳያ ሄላንዳአና ዔኤሂ ጎይሃ ዋይሃንጎ፤ ዬይ ዴምባ ሙካ ሸይንታ ቢያ ካፒ ማዳያ ማፃንጎ።
- 4 ዓአሮኔ ዩንሂ ፖፃንሂ ጌኤሺ ዋርቄና ኮሺንቴ ሻሮይዳ ጊኢጊሺ ጌሃንጎ፤ ዩንሂ ፖዓ ታ ቤርቶይዳ ቢያ ዋዴ ዔኤቲ ዴዓያ ማዓሂ ዛጎንጎ።»

ፆኦሲም ዒንጎ ላኣዳ

5 «ዩያጉዲ ሃሃ ታጾ ላምፃ ኪሎ ማዓንዳ ሺኢቾ ዲኢሊ ዔኪ፣ ታጾ ላምፃ ዳካ ዳካ ላኣዳ ላኣዴ፤

6 ዩንሢ ላኣደንሢ ታ ቤርቶይዳ ዓኣ፡ ጌኤዠ ዋርቆና ጳርቆና ጳጌ ሎኦዠ ያይቶይዳ ላሆንሢ ፔቲ ዛላ፡ ዓቲ ላሆንሢያ ባጎ ዛላ ዋሊ ቤኤዚ ጌሢ።

7 ታኣም ሚቺ ዒንጎ ዒንጊያ ማሊሳ ላኣዳ ዒንጊሢ ማዔሢ ዔርዛኒ ጌኤሺ ዑንጃ ላምዎ ዋሊ ቤኤዚ ጌሦና ላኣደኮ ኮራ ኮራ ጌሢ፤

8 ዩይ ሙካ ዋደይዳ ሃውሾ ኬሎ ኬሎ ናንገና ናንጋ ጎዳ ቤርታ ጌሢንቲ ዴዎንጎ፤ ዩይ ዒሰራዔኤሌ ዓሳ ቢያ ዎዴ ማዲ ኩንሢኒ ኮይሳ ጫኣቁሞ ዳምቤኬ።

9 ዩይ ካሢ ዓኣርኔና ዒዛኮ ናኣቶናም ማዓያኬ፤ ዔያታ ታኣም ዲማዴ ቤዘይዳ ሙዎንጎ፤ ዩይ ሚቺ ዒንጎያ ማሢ ሺኢሾና ዒንጊያ ታኣም ዲማዴያ፡ ዔያቶ ዛላ ማዓያኬ» ጌራ ዓይሢ።

ያኦሲ ጫሽኬ ዓሲዳ ዋጊንታ ዋጌ

10-11 ዒንዳ ዒሰራዔኤሌ ዓሲ ዓዴ ጊብፃ ዓሲ ማዔ፡ ፔቲ ዓሲ ዓኣኔ፤ ዒዛኮ ዒንደ ሱንፃ ሴሎሚቶኬ፤ ዒዛ ዳኣኔ ዜርፃፓ ማዔያ ዲብሪ ጎዎሢኮ ናይ ማዔ ዒሰራዔኤሌ ዓሲኬ፤ ዩይ ዓሢ ጉርደይዳ ፔቲ ዒሰራዔኤሌ ዓሲና ዋላ ዑራዲ፡ ዑርይዳፓ ዔቆያና ናንገና ናንጋ ጎዳኮ ሱንፃ ጫሽኬሢረ ሙሴ ቤርቶ ዓሳ ዒዛ ዔኪ ዩዔኔ፤

12 ዒዛ ዎዳኒ ኮይሳቲ ናንገና ናንጋ ጎዳ ዔያቶም ኬኤዛንዳያ ሄላንዳኣና ቲኡሲ ማርካ ጌሢ ካፓ ዓሲና ዒዛ ዔያታ ካፒሴ።

13 ናንገና ናንጋ ጎዳ ሙሴም፡-

14 «ታና ጫሽኬ ዓሢ ጉርዳፓ ዙሎ ኬሴ፤ ዒዚ ጫሽካኣና ዋይዜ ዓሳ ቢያ ዩይ ዓሢ ዳቢንቲያ ማዔሢ ማርካዳኒ ቢያ ዓሳ ፔቲና ኩጮ ዒዛ ቶኦካ ጌሦንጎ፤ ዩካፓ ዴራ ቢያ ዒዛ ሹቻ ዲይ ዎድንጎ።

15 ዒሰራዔኤሌ ዓሰም ሂዚ ጌዔ፤ ዓይጎ ዓሲያ ፔኤኮ ያኦሲ ጫሽኬሢ ጎሜ ማዴሢረ ዩያ ዛሎ ዒዛይዳ ዓጊንታ ባኮ ዒ ዔካንዳኔ፤

16 ታኣኮ ሱንፃ ጫሽካ ዓሲ ዎዎዲንቶንጎ፤ ዒሰራዔኤሌ ዓሲ ማዔቲያ ማሌ ዓጪ ዓሲ ማዔ ዓሲ ቢያ ታ ሱንፃ ጫሽኬቲ ዒሰራዔኤሌ ዴራ ዩያ ዓሢ ሹቻ ዲይ ዎድንጎ።»

17 «ዓሲ ዎዳ ዓሲ ያና ማዔቲያ ሃይቃንዳጉዲ ዋጊንቶንጎ፤

18 ማሌ ዓሲኮ ቆልሞ ዎዳ ዓሲ ዒማጉዴ ቆልሞ ማሢ ጨጎንጎ፤ ዩይ ዎጋ ሽምፖ ዛሎ ሽምፖ ጨጎም ጌይሢኬ።»

19 «ዓይጎ ዓሲያ ማዎም ፔቲ ዓሲዳ ፑርታ ባኣዚ ማዴያ ማዔቲ ዒማጉዴ ባኣዚ ዩያ ዓሢዳ ማዲንቶንጎ፤ ጌይፃ፡-

24:6 ኬሲ. ማፃ 25:30። 24:9 ማቲ. 12:4፤ ማር. 2:26፤ ሉቃ. 6:4። 24:17 ኬሲ. ማፃ 21:12።

20 ዩይ ዓሢ ዓሲኮ ማገሢሢ ማንሢያ ማዕቲ ዒዛኮዋ ማገገፍ ማንሢንቶም፤ ማሌ ዓሲኮ ዓኣፒ ዋደያ ዒ ማዕቲ ዓኣፓ ዋደንቶም፤ ሃሣ ዓቶ ማንሢያታቲ ዓጫ ዒዛኮ ማቆም፤ ዩያጉዲ ማሌ ዓሲ ዑሢዳ ዓደጎ ባኣዚያ ዒ ማደ ባካ ዒዛይዳኣ ማደንቶንጎ፤

21 ቆልዎ ዋደሢ ሴዛ ማሌ ጨጎንጎ፤ ጋዓንቲ ዓሲ ዋደሢ ሃይቃንዳጉዲ ዋገንቶንጎ።

22 ሃይ ዋጋ ዒንሢ ዒሰራዔኤሌ ዓሶንታ ዒንሢኮ ባኣካ ናንጋ ማሌ ዓሶንታም ቢያ ሄኮ ማደያ ማዖንጎ፤ ታኣኒ ናንገና ናንጋ ጎዳ ማዕ ዒንሢኮ ዖኣሲከ» ገዔኔ።

23 ሙሴ ዩያ ቢያ ዳሮዎ ከኤዚ ጋፒሳዛ ዔያታ ዩያ ዓሢ ጉርዳፓ ዙሎ ከሲ፣ ሹቻ ዲይ ዋደኔ፤ ናንገና ናንጋ ጎዳ ሙሴ ዓይሄ ጎይዖ ዒሰራዔኤሌ ዳራ ማደኔ።

25

ለንካሳ ሌዖና ሃውሾ ሃውሺዖ (ለሚ. ዋማ 15:1-11)

1 ናንገና ናንጋ ጎዳ ሙሴም ሲና ዲኮይዳ፡-

2 «ዒሰራዔኤሌ ዓሶም ሂዚ ገዔ፤ ናንገና ናንጋ ጎዳ ዒንሢም ዒንጋንዳ ዓጮ ዒንሢ ገሌ ዋደና ለንካሳ ሌዖይዳ ፔቲታዖ ጎሺ ጎሽኩዋዖ ሃሺ ናንገና ናንጋ ጎዳ ቦንቹዋቲ።

3 ላሆ ሌዔ ሄለንዳኣና ጎዙ ዒንሢኮ ጎሽኩዋቲ፤ ዋይኖኮዋ ፑርቲ ካኣፖ ካሪ ኮሹዋቲ፤ ካፄ ሃኣኮዋ ማኣላፓ ቡሪ ዔኩዋቲ።

4 ለንካሳ ሌዓ ጋዓንቲ ታኣም ዲማደያ ማዖንጎ፤ ዩኖ ሌዖይዳ ጎዙ ዒንሢሲ ጎሽኪፖቲ፤ ሃሣ ዋይኖኮዋ ፑርቲ ካኣፖ ካሪ ካሪ ኮሺፖቲ።

5 ማኣሎይዳ ጉሪ ባቃሊ ካፄ ሃኣኮ ዔኪፖቲ፤ ሃሣ ፑርቲ ካኣፖ ካሪ ኮሺፖቲ ባኣ ዋይኖይዳፓ ዓኣፖ ዔኪፖቲ። ዩና ሌዓ ጎዙ ዒንሢኮ ጎሽኪንቲዋ ሌዔ ማዖንጎ።

6 ዩኖ ሌዖይዳ ዒንሢ ጎዙ ጎሽኩዋያ ማዕቲያ ዒንሢኮ ማኣሎይዳ ጉሪ ካፄ ባካ ዒንሢንታ ዒንሢም ማደ ዓሶንታም፣ ሃሣ ዒንሢ ማኣሊሽ ጨገ ማደሻ ዓሶንታም፤ ዩያጉዲ ዒንሢና ዋላ ናንጋ ማሌ ዓጮ ዓሶም፤

7 ዒንሢኮ ቆልዎና ካዮ ቦዖናም ሙኡዚ ማዖንጎ። »

24:20 ከሲ. ማፃ 21:23-25፤ ላሚ. ዋማ 19:21፤ ማቲ. 5:38። 24:22 ፓይ. ማፃ 15:16። 25:7 ከሲ. ማፃ 23:10-11።

ዓይሉሞጋ ኬስኪሢንታ ሻንቁንቲ ዔውቲ ሳዓ ማሂሢንታ ሌዔ ዛላ

8 «ላንካይ ሃውሾ ሌዔ ላንካይ ማይንቲ ገይዳ፤ ዬያ ኔ ገይዳዛ ሌዓ ዋሊ ዑፃ ያይዲታሚ ታዘጸ ሌዔ ማዓኔ።

9 ዬካጋ ላንካሳ ዓገሩኮ ታጸሳ ኬሎና ቦንቹንታ ጎሞ ጌኤሺያ ኬሎ ዒንሢ ዓጮ ቢያይዳ ዛዬ ዋርቃንዳ ዓሲ ዳኩዋቲ፤

10 ዬያይዲ ደንገታማሳ ሌዓ ታኣም ዲማሲ፣ ዓጮይዳ ቢያ ናንጋ ዓሶም ዓይሌ ማዒ ሻንቹንቲሢ ዓይሉሞጋ ኬስኪ ፔ ዒጊኖ ባንሢ ዴንዳንዳጉዲ፣ ሃሣ ሻንቹንቲ ጎሺያኣ ሻንቹ ዓሢም ማዓንዳጉዲ ኬኤዙዋቲ፤

11 ዬኖ ሌዓና ጎዡ ዒንሢኮ ጎሽኪፖቲ፤ ሃሣ ዒንሢ ጎሽኪባኣንቲ ማኣሎይዳ ጉሪ ባቃሊ ካፄ ሃኣኮ ዔኪፖቲ፤ ዬያጉዲ ፑርቲ ካኣጋ ካሪ ገኢጊሺንቲባኣ ዋይኖ ዓኣፖዋ ማንፂ ዔኪፖቲ።

12 ዬና ሌዓ ጉቤ ታኣም ዲማዴያ ማዖንጎ፤ ዒንሢ ጎሽኪባኣንቲ ማኣሎይዳ ጉሪ ባቃሊ ካፄ ሃኣኮ ዒኢካ ማኣላጋ ዔኪ ሙዑዋቲ።

13 «ዬያኮ ቤርታ ሻንቹንቲ ጎሺ ዬኖ ሌዓይዳ ሻንቹ ጎዡ ዓዳሢም ማሂ ዒንጊንታያ ማዖንጎ።

14 ዒንሢኮ ፃጲ ማዔ ዓሲም ሳዓ ዒንሢ ሻንቹቲ፤ ሃሣ ጊንሣ ሻንቁያ ዒንሢ ማዔቲ ፔቲይ ባጋሢም ጌኔ ማዶ ማዶፓ።

15 ሻንቹንቲ ሳዓ ማዓ ሌዓ ሄላንዳኣና ዓኣ ሌዓኮ ገይዶ ዔሪ፣ ኔ ፃጲሢጋ ሻንቁ፤ ዒዚያ ዬኖ ሌዓ ጋራ ዓኣ፣ ሃኣካ ካፃንዳ ሌዓኮ ገይዶ ዔሪ ሻንቹንጎ።

16 ዬኖ ሌዓኮ ገይዳ ሚርጌቲ ሚርጌ ሚኢሺ ዒንጌ፤ ሌዓኮ ገይዳ ዳካ ማዔቲ ዳካ ሚኢሺ ዒንጌ፤ ዓይጎር ጌዔቲ ዒ ሳዖ ሻንቻሢ ጎዡ ካፂሳንዳ ሃኣኮ ጎይዖታሢሮኬ።

17 ፔቲ ዒሰራዔኤሌ ዓሲ ፔ ባጋሢም ጌኔ ማዶ ማዶፓ፤ ዒንሢኮ ዖኣዛሢ ዒጊጩዋቲ፤ ታኣኒ ናንጊና ናንጋ ጎዳ ማዔ ዒንሢኮ ዖኣዛሢኬ።

18 «ዒንሢ ናንጋ ዓጮይዳ ኮሺ ናንጋኒ ታኣኮ ዋጎና ዓይሢያና ካፒ ኩንሣያ ማዑዋቲ።

19 ዒንሢኮ ሳዓ ዒንሢም ጊዳ ሃኣኮ ካሣንዳሢሮ ሙዓንዳ ባኣዚ ዴንቁ ሜታባኣያ ዒንሢ ናንጋንዳኔ።

20 «ጋዓንቲ ዒንሢ፣ ኦኡኒ ጎሺ ጎሽኪ ሃኣኮ ዓርሢባኣቲ ዬኖ ላንካሳ ሌዓ ዓይጎ ሙዓንዳይ?» ጌይ ዖኣጫያናንዳኔ፤

21 ላሃሳ ሌዓና ታኣኒ ዒንሢኮ ሳዖ ሚርጌና ዓንጃንዳሢሮ ሃይሣ ሌዔም ጊዳንዳ ሃኣኮ ካፃንዳኔ።

22 ሳላሳ ሌዎይዳ ማዕቲያ ጎዡ ዲንሢ ጎሽካ ዎድና ዲንሢ ሙዓንዳሢ ቤርታኦ ሃኦኮኬ፤ ዬያ ሃኦኮ ታዞጳሳ ሌዎ ሃኦኮ ዓርሣንዳያ ሄላንዳኦና ሙዒ ሙዒ ዲንሢ ዴዓንዳኔ።

ሻንቁንቲ ዔውቲ ባኦዚ ማሂሢ ዛላ

23 «ሳዎ ዲንሢኮ ማሂንቱዎ ጎይሢ ፔቶ ሻንቁንቲ፤ ዓይጎር ጌዔቲ ሳዓ ዲንሢሮቱዎንቲ ታኦርታሢሮኬ፤ ዲንሢ ሙኬ ዓሲጉዲ ማዒ ዲኦካፓ ጳደ ባኮ ሙዓንዳጉዲ ታ ዓይሣኔ።

24 «ሳኦ ዲንሢ ሻንቁ ዎድና ዬይ ሻንቁ ዓሢ ሳዎ ገንሣ ማሂ ሻንቁ ዔካኒ ላኦጋ ባኦዚ ባኦያ ማዓኒ ኮይሳኔ።

25 ፔቲ ዲሰራዔኤሌ ፃጲ ማዔያ ማንቁ፣ ሳዎ ፔኤኮ ሻንቁያ ማዔቲ ዒዛኮ ዑኬ ማዔ ዲገኒ ዲዛኮ ሳዎ ዲዛም ጨገ ማሂሳኒ ዳንዳዓኔ።

26 ዬያ ማዳንዳ ዑኬ ዲገኒ ባይቁቲ ዲዚ ናንገቤቃ ቆሎ ዴንቃዎ ጨገ ፔኤኮ ሳዎ ማሂሳኒ ዳንዳዓኔ፤

27 ዬያ ዒ ማዳኒ ዳንዳዔ ዎድና ሻንቁንቲ ባኮ ማሂዎ ሌዓ ሄላንዳኦና ጋራ ዓኦ ሌዎ ፓይዲ ዔሬሰካፓ ዓቲ ሌዎ ሚኢሾ ዓሢም ማሂ ፔ ሳዎ ዔኮንጎ።

28 ጋዓንቲ ዒዚ ጨገ ማሂሲ ዔካንዳ ሚኢሾ ዴንቁባኦያ ማዔቲ ሳዓ ዲዛሲ ሻንቁንቲ ባኮ ማሂዎ ሌዓ ሄላንዳኦና ዬያ ሻንቁ ዓሢሮ ማዒ ዴዎንጎ፤ ዬና ሌዓ ሄሌሰካፓ ሳዓ ዲዛሮ ማዎንጎ።

29 «ፔቲ ዓሲ ሹቸና ኬልቁ ዲርቆና ካታማይዳ ማኦሪ ሻንቁቲ፣ ሻንቁንቲ ኬላፓ ዴንዲ ፔቲ ሌዔ ማዓ ጋርሲዳ ጨገ ማሂ ዔካኒ ዳንዳዓኔ።

30 ጋዓንቲ ዒ ፔቲ ሌዔ ጋርካ ጨገ ማሂ ዔካኒ ዳንዳዒባኦቲ ጨገ ማሂ ዔካኒ ዳንዳዑዎያ ማዔም ዬና ማኦራ ናንገና ዬያ ሻንቁ ዓሢና ናኦቶናሮ ማዒ ዓታንዳኔ፤ ሻንቁንቲ ባኮ ማሂዎ ሌዎናታዎ ማሂ ዒ ዔካኒ ዳንዳዑዎሱ።

31 ሹቸና ኬልቁ ዲርቁንቲባኦ፣ ጉርዳ ባኦካ ዓኦ ማኦሪ ሻንቁሢ ጋዓንቲ ጎሽ ሻንቁያጉዲ ማሂ ጨገ ዔካኒ ዳንዳዓኔ፤ ሃሣ ሻንቁንቲ ባኮ ማሂዎ ሌዎይዳ ዒ ማሂ ዔካኒ ዳንዳዓኔ።

32 ዬይ ያዲ ማዔቲያ ሌዊ ፃጲ ማዔ ዓሳ ዔያቶ ካታሞይዳ ዓኦ ማኦር ፔኤኮ ዓይጎ ዎድናኦ ማዎም ጨገ ማሂ ዔካኒ ላኦጋ ባኦዚ ባኦያ ማዓኔ።

33 ፔቲ ሌዊ ፃጲ ማዔ ዓሲ ካታማይዳ ማኦሪ ሻንቁያ ማሂ ጨገ ዔካኒ ዳንዳዒባኦያ ማዔቲ ሻንቁንቲ ባኮ ማሂዎ ሌዎይዳ ዲዛም ማዓኒ ዳንዳዓኔ፤ ዓይጎር ጌዔቲ ሌዊ ፃጲ ማዔ ዓሳ ዔያቶ ካታሞይዳ ማኦ ማኦራ ቢያ ዎዴ ዔያቶሮ ማዒ ናንጋሢሮኬ።

34 ዔያቶኮ ካታሞ ዓጮይዳ ዓኣ ቆልማ ሄንቃ ቤዛ ፔቴታዖ ሻንቺንቴዋሴ፤ ዬይ ናንጊና ዔያቶሮ ማዒ ናንጋያኬ። »

ማንቆ ዓሲ ማኣዲሢ ዛላ

35 «ዒንሢ ባኣካ ናንጋ፣ ዒንሢ ፃጲ ማዔ ዒሰራዔኤሌ ዓሲ ማንቁ ፔና ማኣዲኒ ዳንዳዒባኣቴ ዒንሢ ባኣካ ናንጋኒ ማሌ ዓጪፓ ሙኬ ዓሲም ዒንሢ ማዳ ጎይዖ ዒዛም ኮይሳ ባኮ ናሹሞና ማዲዋቴ።

36 ዒንሢከ ፃጲ ማዔ ዓሢ ዒንሢና ዋላ ናንጊሹዋቴ፤ ሃሃ ዓይሳ ባኣዚያ ዑሣ ዓኣሢ ሸይቺና ዒንሢም ዒንጋንዳጉዲ ዔኤቢ ማዲፖቴ፤ ዒንሢከ ያኣዛሢ ዒጊጩዋቴ።

37 ዒንሢ ታልዓ ሚኢሽ ሸይቺና ማሃንዳጉዲ ጌይ ታልዒፖቴ፤ ሙኤዚ ዒዛም ዒንሢ ሻንቻ ዋዶና ዑሣ ዓኣሢ ዲቢ ሚኢሹም ሻንቺፖቴ፤

38 ካኣናኔ ዓጮ ዒንሢም ዒንጋኒ፣ ዒንሢከ ያኣሲ ማዓኒ ጊብፄ ዓጫፓ ዒንሢ ዔኪ ኬሴሢ ታና ናንጊና ናንጋ ጎዳ ማዔ ዒንሢከ ያኣዛሢ።»

ዓይላታፓ ኬሰኪሢ ዛላ

39 «ዒንሢ ባኣካ ናንጋ፣ ዒንሢ ፃጲ ማዔ ዒሰራዔኤሌ ዓሲይዳፓ ፔቴ ዓሲ ማንቆ ማዒ ኔኤም ዓይሌ ማሃ ፔና ሻንቺቴ ዓይሌ ማሃ ዒዛ ማዲሺፖ።

40 ሻንቺንቴ ባኮ ማሃዖ ሌዓ ሄላንዳኣና ሚኢሹ ጨገንቴም ማዳ ዓሲጉዲ ኔኤም ማዲ ማዲ ናንጎንጎ፤

41 ዬና ሌዓ ሄላዛ ዒዛንታ ናኣቶንታ ዓይላታፓ ኬሰኪ ፔ ማኣሮ ዓሲና ዒዛኮ ዓኣ ባኮና ባንሢ ዓኣድንጎ።

42 ዒሰራዔኤሌ ዴሮ ጊብፄ ዓጫፓ ታኣኒ ዔኪ ኬሴያ፣ ታኣም ማዲያታሢሮ ዔያታ ዓይሌ ማዒ ሻንቺንታንዳያ ኮይሱዋሴ።

43 ዔያቶ ዋልቁና ሄርቁ ዋይሢፖቴ፤ ታና ዒንሢከ ያኣዛሢ ዒጊጩ ታኣም ዓይሢንታያ ማዑዋቴ።

44 ዒንሢም ማዳ ዓሲ ዒንሢ ኮዔያ ማዔቴ ዒንሢ ኮይላ ዓኣ፣ ማሌ ዴሮፓ ሻንቁ ዔኩዋቴ።

45 ሃሃ ዬያጉዲ ዒንሢ ባኣካ ናንጋ ማሌ ዓጪፓ ሙኬ ዓሲና ዔያቶኮ ናኣቶናይዳፓ ማዳ ዓሲ ሻንቃኒ ዒንሢ ዳንዳዒኔ፤ ዔያታኣ ዒንሢሮ ማዖንጎ።

25:35 ላሚ. ዋማ 15:7-8። 25:37 ኬሲ. ማፃ 22:25፤ ላሚ. ዋማ 23:19-20።

46 ዲንሢኮ ሩኣቶም ዔያቶ ዲንሢ ዳካልሳኒያ ዳንዳዓኔ፤ ዔያታ ናንጋ ዎዶ ቢያይዳ ዲንሢ ሩኣቶም ማዳያ ማፖንጎ፤ ዲንሢኮ ፃጰ ማዔ፥ ዲስራዔኤሌ ዓሶ ባኣካፓ ዓይጎ ዓሲያ ማፖም ዎልቄና ሄርቄ ዎይሢፖ፡፡

47 «ዲንሢ ባኣካ ናንጋ፥ ማሌ ዓጪፓ ሙኬ ዓሲታፖ ፖርጎቹ ማዓም ዲንሢ ባኣካፓ ፔቴ ዓሲ ማንቄ ዬያ ዓሢም ማዔቴያ ዲዛ ፃጰ ማዔያም ዓይሌ ማዒ ሻንቹንቴቴ፥

48 ዲዚ ሻንቹንቴሰካፓ ሚኢሻ ጪጊንቴ ማዔም ዓይላታፓ ኬሰካኒ ዒ ዳንዳዓኔ፤ ዬያሮ ዬያ ዓሢኮ ፃጰ ማዔ ዓሶፓ ፔቴ፥

49 ጌይፆ፡- ዲዛኮ ዓዶ ዲሾታቴያ ዓዶ ጌኤዚ፤ ሃሣ ዬያቶኮ ናኣታ፤ ሃንጎ ሃሣ ዲዛኮ ዑኬ ዲጊኒ ማዔያ ሚኢሾ ማሃ ጪጊ ዲዛ ዓይሉማፓ ኬሳኒ ዳንዳዓኔ፤ ሃንጎታቴ ዲዚ ቆሎ ዳንቄሰካፓ ሚኢሾ ማሃ ጪጊ ኬሰካኒ ዳንዳዓኔ፡፡

50 ያዲ ማሃኒ ዒ ኮዓ ዎዶና ሻንቄ ዓሢና ዎላ ዘርቶንጎ፤ ዲዚ ፔና ሻንቹ ለዓፓ ዓርቃፖ ዳንዲ ሻንቹንቴ ባኮ ማሃፖ ሌፖ ሄላንዳኣና ዓኣ ሌፖ ፓይዶንጎ፤ ዲዛ ዓይላታፓ ኬሳኒ ዳንዳዓ ሚኢሾ ዬንሢ ለፖንሢዳ ፔቴ ዓሲ ለዔና ለዔና ማዳም ጪጎ ሚኢሾፔዬያ ማለንቴ ዓርቄንቶንጎ፡፡

51-52 ሃጊ ቤርታ ማዳንዳፖ ዓቴ ሌፖኮ ሚኢሾይዳፓ ዛላ ሚኢሾ ማሃ ጪጎንጎ፡፡

53 ዬይ ያዲ ማዓኒ ኮይሳሢ ለዔይዳ ሚኢሾ ጪጊንቴም ማዳ ዓሲ ማለንቴኬ፤ ዲዛ ዎይሣ ዓሢ ዲዛ ዎልቄና ሄርቄ ዎይሣ፡፡

54 ዬያይዲ ዓይላታፓ ዒ ኬሰካኒ ዳንዳዒባኣቴ ሻንቹንቴ ባኮ ማሃፖ ሌዓ ሄላዛ ዲዛና ዲዛኮ ናኣቶና ዓይላታፓ ኬሰኮንጎ፡፡

55 ዲስራዔኤሌ ዓሳ ታኣም ማዳያ ማዔሢሮ ዲስራዔኤሌ ዓሲ ማዔ ዓይጎ ዓሲያ ማፖም ናንጊና ዓይሌ ማዒ ሻንቄንቴ ናንጋንዳያ ኮይሱዎሴ፤ ዓይጎሮ ጌዔቴ ዲስራዔኤሌ ዓሳ ጊብፄ ዓጫፓ ታኣኒ ኬሴ ዓሲኬ፤ ታኣኒ ናንጊና ናንጋ ጎዳ ማዔ ዲንሢኮ ፆኦሲኬ» ጌዔኔ፡፡

26

ናንጊና ናንጋ ጎዳም ዓይሢንቴሢና ጰዳ ዓንጅ
(ላሚ. ዎማ 7:12-24፤ 28:1-14)

1 ናንጊና ናንጋ ጎዳ ኬኤዛፖ፡- «ዚጊ ካኣሽካኒ ዓይጎ ባኣዚያ ማፖም ፆኦኮ ማሃ ማዚፖ፡፡ ዔኤቢ ማሊሲ ኮሾና ባኣዚያ ማፖም

25:46 ኬሲ. ማፃ 21:2-6፤ ላሚ. ዎማ 15:12-18፡፡

ሹቸና ደኣቦዋ ካኣሸካኒ ደኣቢፖቴ፤ ሹቸ ዓርሲያኦ ካኣሸኮ ባኣዚ ማሂ ጌሢፖቴ፤ ታኣኒ ናንጊና ናንጋ ጎዳ ማዔ ዒንሢኮ ጾኦዚኮ።

2 ታኣኒ ቦንቸንፋንጎ ጌዔ ኬሎ ካፒ ቦንቸዋቴ፤ ታኣም ዲማዔ ማኣሮዋ ቦንቸዋቴ፤ ታኣኒ ናንጊና ናንጋ ጎዳሢኮ።

3 «ታ ዋጎ ኩንሢ ዒንሢ ናንጋያ፤ ሃሣ ታ ዓይሢያዋ ካፓያ ማዔቴ፡-

4 ሳዓ ዒንሢኮ ሃኣኮ ካዒሳንዳጉዲ ዒንሢ ቴካ ሚያኦ ዓኣፓያ ማዓንዳጉዲ ዒሮ ኮይሳ ዋደና ዒንሢም ታ ዋርቁሳንዳኔ።

5 ሃኣካ ዒንሢኮ ሚርጌና ካፃንዳሢሮ ሃኣኮ ዒንሢ ማኣላፓ ቡሪ ጋፑዋንቴ ዋይና ካፃ ዋዳ ሄላንዳኔ፤ ዋይናኮ ዓኣፖ ዒንሢ ዔኪ ጋፑዋንቴ ጎዡ ጎሽኮ ዋዳ ሄላንዳኔ፤ ዒንሢ ሙዓንዳ ባኣዚያ ዴንቁ፤ ሳይዳ ኮሺ ናንጊ ናንጋንዳኔ።

6 «ዒንሢ ዓጮም ኮሹም ታ ዒንጋንዳኔ፤ ያናኦ ዒጊጨዋዎ ሂርጋባኦ ዒንሢ ጊንዓንዳኔ፤ ቸርታ ማዔ ቦዎ ዒንሢ ዓጮፓ ታ ባይዛንዳኔ፤ ዒንሢ ያላ ዓሲያኦ ባኣያ ማዓንዳኔ።

7 ዒንሢኮ ሞርኮ ዒንሢ ባሻንዳኔ፤

8 ዒንሢዳፓ ደንጎ ዓሲ ሞርኮኮ ጭታ ዓሲ ያሊ ባሻንዳኔ፤ ጊንሣ ሃሣ ሞርኮኮ ታጾ ሺያ ዓሲ ዒንሢኮ ጭታ ዓሲ ያሊ ባሻንዳኔ።

9 ታ ዒንሢ ዓንጃንዳኔ፤ ሚርጌ ናይያ ታ ዒንሢም ዒንጋንዳኔ፤ ታ ዒንሢና ዋላ ጫኦቄ ጫኦቄዋዋ ዋሉዋዎ ካፓንዳኔ።

10 ለዓፓ ሊዎ ሄላ፡ ሴሚ ሃኣኮ ዒንሢኮ ዓኣያ ማዓንዳኔ፤ ዬያር ዓኮ ሃኣኮ ዓርሢኒ ሴም ሃኣኮ ኮናፓ ኬሲ ዒንሢ ላኣላንዳኔ።

11 ዓፒሎና ማዡንቴ፡ ታ ማኣሮይዳ ዴዒ ዒንሢ ባኣካ ታኣኒ ናንጋንዳኔ፤ ፔቴታዎ ታ ዒንሢ ዒዒ ሻኣኪንታዓኮ።

12 ዒንሢ ባኣካ ታኣኒ ሃንታንዳኔ፤ ዒንሢኮ ታ ጾኦዚኮ ማዓንዳኔ፤ ዒንሢያ ታ ዴሪ ማዓንዳኔ።

13 ጊብፄ ዓጮ ዓይሌ ማዒ ዒንሢ ናንጉዋጉዲ ታ ዒንሢ ኬሴ፡ ናንጊና ናንጋ ጎዳ ማዔ ዒንሢኮ ታኣኒ ጾኦዚኮ፤ ባቃናኦ ዒንሢኮ ዓጎና ዓይሉም ቃምባር ሜንሢ፡ ዴግ ጌይሲ ታ ዒንሢ ሃንቲሴኔ» ጌዔኔ።

ያኦሲም ዓይሢንቲ ዒዒሢ ዔኪ ሙካ ሜቶ (ላሚ. ዋማ 28:15-68)

14 ናንጊና ናንጋ ጎዳ ኬሌዛዎ «ዒንሢ ታኣም ዋይዞ ዒዒ ታኣኮ ዓይሢያዎ ካፒ ኩንሡዋያ ማዔቴ፡

26:1 ኬሲ. ማፃ 20:4፤ ሌዊ. ዓኹ 19:4፤ ላሚ. ዋማ 5:8፤ 16:21-22፤ 27:1።
26:5 ላሚ. ዋማ 11:13-15፤ 28:1-14። 26:12 2ቆር. 6:16።

15 ታኦኩ ዋጎና ዓይሢኖና ካፖ ዒዒ፥ ታ ዒንሢና ዋላ ጫኦቄ ጫኦቄዋ ዒንሢሢ ሃሹቴ፥

16 ታ ዒንሢሢ ሂዲ ሜታሳንዳኔ፤ ዬይያ፡- ዓኣፖ ዒንሢኩ ባይዘንዳያ፥ ዑያ ዒንሢኩ ያኦፐሳንዳያ፥ ጋፑዋ ቆሢ ዶርያ ታ ዒንሢሢ ዳካንዳኔ፤ ዒጊቹዋ ሂርጋኦ ታ ዒንሢዳ ጌልዘንዳኔ፤ ዒንሢሢ ጎሽኪ ሃኦኩ ሞርካ ሙዓንዳሢሮ ጉሪ ዒንሢሢ ጎሽኪ ላባያ ማዓንዳኔ።

17 ታ ዒንሢሢዋ ዋይዘ ዒፃንዳሢሮ ዒንሢኩ ሞርካ ዒንሢሢ ባሻያ ማዓንዳኔ፥ ዔያታ ዒንሢሢ ዋይሣንዳኔ፤ ሚርጌና ዲቃታያ ዒንሢሢ ማዓንዳሢሮ ዒንሢሢ ዳውሳ ዓሲ ባኦንቴ ጉሪ ዒንሢሢ ጳሽካያ ማዓንዳኔ።

18 «ዬይ ያዲ ማዕንቴያ ዒንሢሢ ታኦም ዓይሢንቴዋያ ማዕቴ ዬያጉዴ ሜቶ ላንካይ ጳንጩ ማሂ ታ ዒንሢዳ ሄሊሳንዳኔ።

19 ዒንሢኩ ያቶርሙዋ ታ ባይዘንዳኔ፤ ዒርዚ ዒንሢሢዋ ዋርቄንዲዋኦሢሢሮ ሳዓ ዒንሢኩ ሜሊ ዓንገ ማዓንዳኔ።

20 ላቢ ዒንሢሢ ማዲ ባካ ቢያ ዒንሢሢ ማኦዲዋያ ማዓንዳኔ፤ ዓይጎር ጌዔቴ ሳዓኦ ዒንሢኩ ሃኦኩ ካሢንዲዋኦሢሢሮ፤ ሃሣ ዒንሢሢ ቴካ ሚፃኦ ዓኦፐንዲዋኦሢሢሮኩ።

21 «ዬይ ቢያ ማዕንቴ፥ ታኦም ዓይሢንቴያ ዒዒያ ሃሹዋያ ዒንሢሢ ማዕቴ ዒንሢሢ ማዲ ጎዋ ሚርጌዋ ጎይያ ሜታሢ ላንካይ ጳንጩ ማሂ ዒንሢሢ ቃሳንዳኔ።

22 ዒንሢሢ ባኦኩ ፑርታ ቦያ ታ ዳካንዳኔ፤ ዬይ ቦዓ ናኦቶ ዒንሢኩ ሙዓንዳኔ፤ ባኦቶዋ ዒንሢኩ ሙይ ባይዘንዳኔ፤ ዳካ ዓሲ ሌሊ ዒንሢሢፓ ዓታንዳሢሮ ጎይያ ዒንሢኩ ሴማንዳኔ።

23 «ያዲ ማዕንቴያ ዒንሢሢ ታኦም ዋይዘ ዒዒቶ፥

24 ታ ዒንሢዳ ዲጋዲ ዋንዳሰካፓ ዑሣ ዓኦዴ ላንካይ ጳንጩ ማዕቴ ሜቶ ዒንሢዳ ታ ሄሊሳንዳኔ።

25 ታኦና ዋላ ጫኦቄ ጫኦቄዋ ዒንሢሢ ሃሹሢሮ ዒንሢሢ ሜታሳኒ ያልዚ ታ ዔኪ ዬይሳንዳኔ፤ ሜታ ባኦያ ኮሺ ናንጋንዳኔ ጌይ ካታዋይዳ ዒንሢሢ ቡኪንቴቴያ ሃሹዋ ዶርያ ታ ዒንሢሢ ዳካንዳኔ፤ ዒንሢሢ ሞርኩዋ ባሽንቴ ኩቹ ዒንሢሢ ዒንጋንዳኔ።

26 ዒንሢሢ ሙዓንዳ ባኦዚ ታ ባይዘንዳሢሮ ታጳ ላኦሊ ፔቴ ቦኦቆይዳ ሌሊ ላኦዳንዳኔ፤ ዬይ ካሣ ጌዳንዳቴያ ጌዳንዲዋቴያ ዓርቄ ዘገ ዔያታ ገሽካንዳኔ፤ ዬያ ዒንሢሢ ሙዓንዳኔ ጋዓንቴ ሚሽካዓኩ።

27 «ዬይ ቢያ ያዲ ማዕንቴያ ታና ዒዒ፤ ሃሣ ታኦም ዓይሢንቴዋ ዒንሢሢ ዒፃያ ማዕቴ፥

28 ታኣኒ ዲንሢዳ ዳጋዲ፡ ቤርታ ሄሊሴ ማታሢዳፓ ዑሣ ዓኣዳ ማቶ ለንካይ ጳጌጮ ማዓያ ዲንሢዳ ዔኪ ዩዓንዳኔ።

29 ናያ ዲንሢ ሚርጌና ባሻንዳሢሮ ናኣቶ ዲንሢኮ ዲንሢ ሙዓንዳኔ።

30 ጌሜራ ጌሜራ ዲንሢኮ ዘጊ ካኣሽኮ ቤዘ ታ ሻሃንዳኔ፤ ዑንጆ ጩቢሶ ቤዘዋ ዲንሢኮ ታ ዶይሲ ባይዘንዳኔ፤ ሌዘ ዲንሢኮ ታኣኒ ዲንሢ ካኣሽካ ባኮኮ ሻሂ ኬኤርናሢዳ ኬኤራንዳኔ፤ ሃሣ ዒናፓ ታ ዒዲ ሻኣኪንታንዳኔ።

31 ዲንሢ ናንጋ ካታሞ ታኣኒ ዶይሳንዳኔ፤ ዲንሢ ካኣሽካ ቤዘዋ ዲንሢኮ ታ ባይዘንዳኔ፤ ዲንሢ ታኣሞ ሚቹ ዲንጋ ባኮዋ ታ ዔካዓኬ።

32 ዓጮ ታ ዲንሢኮ ጉቤና ባይዘንዳኔ፤ ዒኢካ ናንጋ ዲንሢኮ ሞርካ ዬያና ዲቃቲ ሄርሻንዳጉዲ ታ ማሃንዳኔ።

33 የልዚ ታ ዲንሢዳ ዔቁሲ ሜሌ ዴሮ ባኣካ ዲንሢ ታ ዜርቃንዳኔ፤ ዬያሮ ዓጫ ዲንሢኮ ዓሲ ናንጉዋያ፡ ካታማኣ ዲንሢኮ ዶዔያ ማዓንዳኔ።

34 ሳዔላ ጉሪ ማዓ ዎዶና፤ ዲንሢኮ ሞርኮ ዓጫ ዲንሢ ዓኣዳ ዎዶና ሳዓ ጎሽኪንቱዋያ ሌዎይዳ ሃውሼሢሮ ዎዘዳንዳኔ፤

35 ዲንሢ ዲዘይዳ ናንጋኣና ሃውሻ ኬሎናታዎ ዒዛ ሃውሽባኣሴ፤ ጉሪ ዒዛ ማዔ ዎዶና ጋዓንቴ ዬያ ቢያ ዒዛ ዴንቃንዳኔ።

36 «ዲንሢዳፓ ሽምፔና ዓቴ ዓሶ፤ ሃሣ ሞርኮ ዓጫ ዴንዲ ዓኣ ዓሶይዳ ዲጊቹሞ ታ ጌልዘንዳኔ፤ ዠባራ ዓጊሣ ቡኡር ዑኡዘ ዔያቶ ዲቃሣያ ማዓንዳኔ፤ ዔያቶ ዳውሳ ዓሲ ባኣንቴ የልዚሮ ዓኣሺንታ ዓሲጉዲ ጳሽኪ ሎኦሚ ዔያታ ሜቃንዳኔ።

37 ዔያቶ ዳውሳ ዓሲ ባኣንቴ የልዚፓ ቶላኒ ጳሽካ ዓሲጉዲ ጳሽኪ ፔቴይ ባጋሢዳ ዲቁንቴ ሎኦማንዳኔ፤ ዲንሢኮ ሞርኮ ቤርታ ዲንሢ ዶዲ ዔቃኒ ዳንዳዓዓኬ።

38 ሜሌ ዴሮ ባኣካ ዲንሢ ሃይቂ ጋፓንዳኔ፤ ዲንሢኮ ሞርኮ ዓጫይዳኣ ዲንሢ ዓኣዲ ዓታንዳኔ።

39 ዲንሢኮ ሞርኮ ዓጫይዳ ሃይቁዋዎ ዓታንዳ ዳኮ ዓሶንሢ ዔያቶ ጎሞና ዔያቶኮ ቤርታኣ ዓዶንሢ ጎማፓ ዔቁያና የኦፒ፣ ዳቁዋያ ማዓንዳኔ።

40 «ጋዓንቴ ዲንሢ ፃጶ ማዔ ዓሳ ፔ ጎሞና ዔያቶኮ ዓዶንሢ ጎሞ ቡኡፃቴ፡

41 ዬይያ፡- ታኣኒ ዔያቶ ዑፃ ዳጋዲንዳጉዲና ዔያቶኮ ሞርኮ ዓጫ ዔያቶ ታ ዳካንዳጉዲ ማሄ ጎሞ ዔያታ ቡኡፃቴ፡ ዋይዘ ዒዲ ዶዳ ዒና ዔያቶኮ ሺኢቴቴ፤ ሃሣ ዔያታ ማዴ ጎሞ ዘሎ ዲንጊንታ ማቶ ዔካያ ማዔቴ፡

42 ታኣኒ ያይቆኑቤና ዩሳኣቄና ሃሣ ዓብራሃሚና ዋላ ጫኣቄ ጫኣቄሞ ጳቂሣንዳኔ፤ ዓጮማኣ ዔያቶኮ ታ ማላንዳኔ።

43 ሰዔላ ዔያታ ሃሺ ዓኣዳሢሮ ጉሪ ማዒ ዓታንዳኔ፤ ዔያታ ባኣያ ማዔሢሮ ጉሪ ማዒ ናንጋሢሮና ሃውሺ ዳዔሢሮ ዋዛዳንዳኔ፤ ታኣኮ ዋጎ ዔያታ ሹሌዒሲ ዛገ፤ ሃሣ ታኣኮ ዓይሢያዎ ቦሂያና ዔያቶኮ ጎሞ ዛሎ ዒንገንታ ሜቶ ዔያታ ዔካንዳኔ።

44 ዬይ ያዲ ማዔቴያ ዔያቶና ዋላ ታ ጫኣቄ ጫኣቄሞ ሃሺ ዔያታ ፔኤኮ ሞርኮ ዓጫ ዓኣቴያ ፔቶ ዔያታ ባይቃንዳያ ሄላንዳኣና ታ ዒዒ ሃሻዓኬ፤ ታኣኒ ናንገና ናንጋ ጎዳ ማዔ ዔያቶኮ ያኣዛሢኬ።

45 ታኣኒ ዔያቶኮ ያኣዛሢ ማዓኒ ሜሌ ዴራ ዛጋንቴ ጊብፄ ዓጫይዳፓ ታኣኒ ኬሴ፤ ዔያቶኮ ዓደንሢና ዋላ ጫኣቄ ጫኣቄሞ ዔያቶሮ ጌይ ታ ጳቂሣንዳኔ፤ ታኣኒ ናንገና ናንጋ ጎዳኬ» ጌዔኔ።

46 ሙሴ ሲና ዲኮይዳ ዓኣንቴ ዒዚ ዒሰራዔኤሌ ዴሮም ኬኤዛንዳጉዲ ናንገና ናንጋ ጎዳ ዒዛም ዔርዜ ምጎንታ ዳምቦንታ ያዲኬ።

27

ያኣሲም ዒንገሢ ዛላ ኬኤዛ ዎጌ

- 1 ናንገና ናንጋ ጎዳ ሙሴም፡-
- 2 «ዒሰራዔኤሌ ዴሮም ሂዚ ጌዔ፤ ዓይጎ ዓሲያ ማዎም ናንገና ናንጋ ጎዳም ዓሲ ዒንጋኒ ናኣቤያ ማዔቴ ሃካፓ ሊካ ዓኣ ሚኢሾ ዓሢ ዛሎ ጪጎንጎ፤
- 3-7 ሌዓ ላማታሚፓ ዴንዲ ላሂታሚ ሄላ ጋራ ዓኣ ዓሲ ማዔቴ ጌኤዡ ማኣሮይዳ ሹጮ ቢሮኮ ዴኤሡሞ ዔሮ ባኮና ላሆ ፄኤታ ገራኣሚ ማዓ ሹቺ ቢራ፤ ዬኖ ሌዎ ጋራ ዓኣ ላኣለም ሃይሃ ፄኤታ ገራኣሚ ማዓ ሹቺ ቢራ፤ ሌዓ ደንገታሚፓ ዴንዲ ላሂታሚ ሄላ ጋራ ዓኣ ዓቲንቁ ናይም ላምዎ ፄኤታ ገራኣሚ ማዓ ሹቺ ቢራ፤ ሃሣ ዬኖ ሌዎ ጋራ ዓኣ ዉዲሮ ናይም ፄኤታና ታጳ ገራኣሚ ማዓ ሹቺ ቢራ፤ ሌዓ ሃሣ ፔቴ ዓገኒዳፓ ዴንዲ ደንጎ ሌዔ ማዔ ዓቲንቁ ናይም ደንገታሚ ደንጎ ገራኣሚ ማዓ ሹቺ ቢራ፤ ዬኖ ሌዎ ጋራ ዓኣ ዉዲሮ ናይም ሃይሢታሚ ደንጎ ገራኣሚ ማዓ ሹቺ ቢራ፤ ሌዓ ላሂታሚፓ ዑሣ ዓኣዴ ማዔ ዓቲንቁም ፄኤታና ላንካይታሚ ገራኣሚ ማዓ ሹቺ ቢራ፤ ዬኖ ሌዎ ጋራ ዓኣ ላኣለም ፄኤታና ታጳ ገራኣሚ ማዓ ሹቺ ቢራ ጪጎንጎ።»

26:42 ማዢ. ማፃ 17:7-8፤ 26:3-4፤ 28:13-14።

8 «ጋዓንቴ ናኣባ ናኣቤ ዓሢ ዬያ ጌይንቴ ሚኢሾ ጨጋኒ ዳንዳዑዎያ ማዔቴ ዒዚ ዒንጌ ዓሶማ ቄኤሳሢ ኮይላ ዔኪ ዒ ሙካዛ፥ ቄኤሳሢ ዒዚ ጨጋኒ ዳንዳዓሢጉዴያ ዓርቂ ዳካ ጨገሶንጎ።»

9 «ናኣቦና ናኣባ ያኦሲም ዒንጎ ዒንጊሢ ማዓኒ ኮይላ ቆልሞ ማዔቴ ዒንጊንቴ ዒንጊያ ቢያ ናንጊና ናንጋ ጎዳም ዲማጴያ ማዖንጎ።

10 ዬይ ዓሢ ዒንጊንቴ ኮሺ ቆልሞ ሜሌ ፑርታ ዔኪ ሙኪ ላኣሚ ዒንጋኒ ኮይሱዋሴ፤ ሃሣ ፑርታ ዒንጌዎዋ ኮሺና ላኣሚ ኮይሱዋሴ፤ ዬያይዳኒ ዔኪ ሙኪንቴቴ ላምዖ ቆልሞንሢ ቢያ ናንጊና ናንጋ ጎዳም ዲማጴያ ማዖንጎ።

11 ዒንጊንቴሢ ዳምቦ ጎይዖና ናንጊና ናንጋ ጎዳም ዒንጊንታኒ ኮይሱዋ ቆልሞ ማዔቴ ዓሢ ዬያ ዒንጊንቴ ባኮ ዔኪ ቄኤሳሢ ኮይላ ሙኮንጎ፤

12 ዬካፓ ቄኤሳሢ ዒንጊንቴ ቆልማ ኮሺታቴያ ፑርታታቴያ ዛጊ ዔካንዳ ሚኢሾ ዓርቂ ኬኤዞንጎ፤ ዬይ ሚኢሻ ቄኤሳሢ ጌዔሢጉዲ ማዓንዳኔ።

13 ቆልሞ ዒንጌ ዓሢ ፔኤር ሻንቃኒ ኮዔቴ ዒንጎንጎ ጌይንቴ ሚኢሾ ዑፃ ደንጎፓ ፔቴ ኩቺ ቃሶንጎ።

14 «ፔቴ ዓሲ ፔኤኮ ማኣር ናንጊና ናንጋ ጎዳም ዲማጴያ ማሢ ዒንጌቴ ቄኤሳሢ ዬና ማኣሬላ ኮሺታቴያ ፑርታ ማዒዎኮ ጊቶ ዛጊ ኬሳንዳ ሚኢሾ ዓርቆንጎ፤ ቄኤሳሢ ጌዔ ጎይዖ ዬይ ማዓንዳኔ።

15 ዬና ማኣሬሎኮ ዓዳሢ ማሢ ሻንቃኒ ኮዔቴ ዒንጎንጎ ጌይንቴ ሚኢሾይዳ ደንጎፓ ፔቴ ኩቺ ቃሶንጎ።

16 «ፔቴ ዓሲ ፔኤኮ ሳዖይዳፓ ፓቂ ናንጊና ናንጋ ጎዳም ዲማጴ ዒንጊሢ ማሢ ዒንጌቴ ሳዔላ ዒኢካ ዜርቂንታኒ ዳንዳዓ ዜርዖ ጎይዖ ሚኢሻ ዓርቂንቶንጎ፤ ላማታሚ ኪሎ ማዓ ዔልዓ ዜርቂንታንዳ ሳዓኮ ደንጊታሚ ሹቺ ቢራ ጨሳንጎ፤

17 ዬይ ዓሢ ሳዖ ፔኤኮ ሻንቂንቴ ባኮ ማሢዖ ሌዓ ዒንጌያ ማዔቴ ጌይንቴ ሚኢሾ ቢያ ጨጋንዳያ ኮይሳኔ።

18 ጋዓንቴ ዒ ዒንጌሢ ሻንቂንቴ ባኮ ማሢዖ ሌዓ ዓኣዳንቴ ኔጌዖ ዒንጌያ ማዔቴ ቄኤሳሢ ሻንቂንቴ ባኮ ማሢዖ ሌዓ ሄላንዳሢኮ ገራ ዓኣ ዓቴ ሌዖ ሌሊ ማሊ ሚኢሾ ዓርቆንጎ፤ ዬያር ሚኢሻ ፓጩ ማዓንዳኔ።

19 ሳዖ ዒንጌ ዓሢ ፔኤር ሻንቃኒ ኮዔቴ ዒንጎንጎ ጌይንቴሢዳ ደንጎፓ ፔቴ ኩቺ ቃሶንጎ፤

20 ዬይ ዓሢ ሳዔሎ ሚኢሾ ጨገ ማሢሲ ዔኩዋዖ ዓሲም ሻንቺያ ማዔቴ ዬና ዒ ማሢ ዔካኒ ዳንዳዑዋሴ፤

21 ሳዔላ ሻንቸንቴ ባኮ ማሂያ ሌዖይዳ ናንገና ናንጋ ጎዳም ዲማዴያ ማዒ ዓታ ቤሲ ማዔም ቄኤሳ ዔካ ቤሲ ማዓንዳኔ።

22 «ፔቴ ዓሲ ባጋሂዳፓ ሻንቁ ዔኬ ሳዓ ናንገና ናንጋ ጎዳም ዲማዴ ዒንገሂ ማሂ ዒንገቴ።

23 ቄኤሳሂ ሳዔሎ ዛጋዖ ሻንቁንቴ ባኮ ማሂያ ሌዖ ሂላንዳኣና ጋራ ዓኣ ሌዖ ማሊ ኬሳንዳ ሚኢሾ ኬኤዛዛ ዓሂ ጌይንቴ ሚኢሾ ናንገና ናንጋ ጎዳም ዒንጋያ ማሂ ዬኖ ኬሎ ጨጎንጎ።

24 ሻንቁንቴ ባኮ ማሂያ ሌዖና ሳዔላ ቤርታ ሻንቹ ዓሂም ማዔቴያ ዒዛኮ ዜርዖም ማዓንዳኔ።

25 «ፔቴ ፔቴ ባካ ሰዲ ዔካንዳኔ» ጌይንቴ ዔርታሂ ጌኤዦ ማኣሮይዳ ሚኢሾኮ ዴኤሡሞ ዔር ባኮና ዛገንቴኬ።

26 «ቆልሞኮ ቤርታ ሾይንቴ ናይ ናንገና ናንጋ ጎዳሮ ማዔሂሮ ዖናታቴያ ፔ ማሊሂና ናሽኪ ዒንጋ ዒንገሂ ማሂ ዒንጋኒ ዳንዳዑቀሴ፤ ናኣሪታቴያ ማራናይ፤ ዬያጉዲ ሃሃ ዋናናይያኣ ቤርታዲ ናንገና ናንጋ ጎዳም ዲማዴያኬ።

27 ዋጎ ጎይዖና ናንገና ናንጋ ጎዳም ዒንገንታኒ ዳንዳዑቀ ቆልሞኮ ቤርቲ ናይ ማዔቴ ዒንጌ ዓሂ ሰዲ ኬሳንዳኔ» ጌይንቴ ሚኢሾ ዑፃ ደንጎፓ ፔቴ ኩቹ ቃሲ ጨገ ማሂ ዔካኒ ዳንዳዓኔ፤ ዔቦኮ ዓዴ ማሂ ዔካኒ ኮይባኣቴ ጋዓንቴ ሰዲ ኬሳንዳኔ» ጌይንቴ ሚኢሾና ማሌ ዓሲ ሻንቆንጎ።

28 «ፔቴ ዓሲ ዓሲ ማዔቴያ ቆልሞ፤ ገንሃ ሃሃ ሳዓ ጉቤና ናንገና ናንጋ ጎዳም ዲማዳንዳጉዲ ማሂሰካፓ ሻንቻኒያ ማሂ ሻንቃኒያ ኮይሱቀሴ።

29 ዓሲ ማዔቴያ ሃይቃንዳጉዲ ዋገንቴሰካፓ ላሚ ገንሃ ማሂ ሻንቃኒ ኮይሱቀሴ፤ ሰዲ ጌይንቴ ዓሂ ዋዋዲንታንዳያ ኮይሳኔ።

30 «ጎዣፓ ጴዴ ሃኣኮ ማዔቴያ ቱኪ ዓኣፒሶና ሚዖ ዓኣፖኮ ታጳይዳፓ ፔቴማ ናንገና ናንጋ ጎዳሮ ማዒ ዒዛም ዲማዴያኬ።

31 ዬያ ዒንገንቴ ባኮ ዓይጎዋ ማዖም ማሂ ሻንቁ ዔካኒ ኮዓ ዓሲ ሰዲ ኬሳንዳኔ» ጌይንቴ ሚኢሾይዳ ደንጎፓ ፔቴ ኩቹ ቃሳንዳያ ኮይሳኔ።

32 ቆልሞ ዒንሂኮ ዒንሂ ፓይዳንዳቴ ታጳ ኩሜቴ ፔቴማ ናንገና ናንጋ ጎዳሮኬ፤ ዬማ ቆልሞማ ናንገና ናንጋ ጎዳም ዲማዴያ ማዓኔ።

33 ቆልሞ ዒንጌ ዓሂሂ ዒንገንታ ቆልሞ ኮዦ ፑርቶፓ ፑርቶዋ ኮዦፓ ዲማሶፓ፤ ገንሃ ማሂ ሃሃ ቤዛ ማሌ ቆልሞ ዒንጎፓ፤ ዬያይዲ ላኣማኒ ዔኪ ሺኢሹቴ ላምዖንሂ ናንገና ናንጋ ጎዳም ዲማዴያ

27:28 ፓይ. ማጻ 18:14።

ማግኘት፤ ማሂ ገንሣ ዩይ ዓሂ ሻንቂ ዔካኒ ዳንዳዑቀሴ» ጌዔኔ።

³⁴ ዒሰራዔኤሌ ዳርሞ ከኤዘነታንዳጉዲ ሙሴ ሰና ዲኮይዳ ዓአንቴ ናንጊና ናንጋ ጎዳ ዒዛ ዔርዜ ዋጎና ዳምቦና ያዲኔ።

27:33 ፓይ. ማፃ 18:21፤ ላሚ. ዋማ 14:22-29።

ጌሌዢ ማጻሕፍት

**The Holy Bible in the Maale language of Ethiopia,
using Ethiopic script**

copyright © 2008 The Word for the World International and The Bible Society of Ethiopia

Language: Maale (Male)

Translation by: The Word for the World

Contributor: Bible Society of Ethiopia

ጌሌዢ ማጻሕፍት

Maale Full Bible

The Word For The World International

Bible Society of Ethiopia

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-13

PDF generated using Haiola and XeLaTeX on 13 May 2025 from source files dated 13 May 2025

bbcfb90a-3ae3-5452-983d-6c4c02375929